

## **Hechos de los Apóstoles** **Llëbo shäryara Sbö tjlökwo roy** **lagaga Jesús äskarë** **Kjibokwo ëre sorë**

Domer shäng kjlara ko Lucas. E no dwlomnega. Woyotjlikoba ga e judío llëm wleniyo. Domer shäng kjlara obi ko Teófilo. Woyotjlikoba ga e Roma so, domer tjlwö ara wleniyo bakoe.

Bäm go ga kjibokwo ko *Evangelio según Lucas* li tara Lucasdë Teófilo kong, Jesús roy li miyde pjlú wlo. Kjibokwo ërera jyã tara ba kong, llëbo weno e irgo li miyde pjlú bako wlo. Jesús to jem kjok dogo irgo ga Sbö Sëya ichara ba nopga kong, ga llëbo shäryara ara epga tjok sorë li tara ba kong. Tjlëno eni Hechos 1.8 go. Tjlë ga «Gueniyo ga Sbö Sëya tjwe bomi go kjlarashko kjlarashko, ga pjây kong dbo twe kësbange. Kjrromi ga pjây opshik tja ñomi, kuromi li sorë roy lë Jerusalén kjokyo, Judea kjokyo, Samaria kjokyo, äär jong kjok kjwang jïkong bakoe.»

E irgo ga Pablo öötong beno shäng Jesús tjlökwo kjraga, ga Jesús roy pjlú lara kjok shto oblë oblë sorë li tara ba kong bakoe. Eshkoshko ga Lucas jëktong shäng parkë ba tjok, tak pjang Colosenses 4.14 go, Filemón 24 go, 2 Timoteo 4.11 go sorë li eni. Eni ga llëbo shäryara Sbörë Pablo tjok li ñna om go, ga jyã tara kjibokwo ëre go.

<sup>1-2</sup> Teófilo, kjibokwo toror bäm go li, e Jesús roy loklo. Shäng kjok ëre kjing go obishko ga llëbo

shäryara, pina kës li toror beno pjang eshko. Jemdë kjok dogo llëm obishko ga jëk shäng Sbö tjlökwo roy lagaga kjrara beno tjeng ba äska li tjok. Ga kong llëbo shärye wlo li lara beno ba kong. Leshko ga kjimtara Sbö Sëyarë.

<sup>3</sup> Zröraba irgo ga weno shäng Sbö tjlökwo roy lagaga li tjrëko obi, ga llëbo shäryara oblë oblë, miyde lok e go wlo ga shäng së obi. Dbar kop sak pkëng (40) tjrëko ga olö ga wen shäng ba tjrëko, ga ña lok. Eshko ga Sbö ber no pjluyo sorë li roy lara beno ba kong.

<sup>4-5</sup> Pjlara ga sök ië ba tjokshko ga tjlë ba kong ga «Pjäy go Sbö Sëya iche bor Datarë tjwe, lara jlökoyo sorë li eni. E lanyotkoror bomi kong tjän. Juan, e no wono di goshko. Gueniyo ga dbar kjwöbö obi ga pjäy go Sbö Sëya iche Sbörë tjwe ber kësbang bomi tjok. Pjäy opshik Jerusalén kjokyo dwayo llëm, e shäryono eni pjir guing» le.

### *Jesús to jem kjok dogo*

<sup>6</sup> Pjlara ga tönö löng Jesús tjokshko ga tjlë ba kong ga «Tjlapga, ¿eni tjok ga Israel tjëyoga döp ber ichaga tjëyoga oblërë ame dbaryo li öötongde?»

<sup>7</sup> «E miydaga pjäydë llëme. Dbar lëmi löng li, e miydaga Data Sbörë. Llono le ga eshko jä.

<sup>8</sup> Gueniyo ga Sbö Sëya tjwe bomi go kjlarashko kjlarashko, ga pjäy kong dbo twe kësbage. Kjroromi ga pjäy opshik tja ñnomi, kuromi li sorë roy lë Jerusalén kjokyo, Judea kjokyo, Samaria kjokyo, äär jong kjok kjwang jikong bakoe» le ba kong.

<sup>9</sup> Tjlëno eni pjir ga ñya lok ga Jesús söra Sbörë to jem kjok dogo, ga pjäng shrono kjrina eshko, jek yöw e roshko jëktëng erä, ga ña lok ame.

<sup>10</sup> Kajok dogo ñya beno löng wopro ga domerga wen löng do pjök ba soshko, shwong ko pjlublúne.

<sup>11</sup> Ga tjlë lok ba kong ga «Galilea sopga, ¿kajok dogo ñmi löng kjër llënoró? Jesús ñnómi söraba to jem kajok dogo bomi tjrëko dwayo sorë ga llono ga ter tjwe iröng eni bakoe» le.

*Matías kjrara lok beno shäng Judas shtoshko*

<sup>12</sup> Kajok eshko li ko Olivos dlupyo. E irgo ga Sbö tjlökwo roy lagaga Jesús äska to ter lok iröng Jerusalén kjoyo. Olivos dlupyo li ber äär Jerusalén kjoyo wlo ga wop tjok eröe. Wosh-tozlong dbaryo ga judíoga jëk lok wop eni eröe.

<sup>13</sup> E irgo ga ter shrono löng Jerusalén kjoyo lishko ga opzrëno jek u jong kjwara eshko li roshko, ga tnyono jem kjomo, ga beno löng eshko. Nopga löng eshko li ko eni:

Pedro;  
Santiago;  
Juan;  
Andrés;  
Felipe;  
Tomás;  
Bartolomé;  
Mateo;  
Santiago, e Alfeo wa;  
Simón, e zelote;  
Judas, e Santiago wa.

<sup>14</sup> Dbar kjwobi go ga epga tön lok tjë jikong eshko syöshhtë Sbö kong Jesús lëmga tjok, ba meké María tjok, walëga oblë tjok bakoe.

<sup>15</sup> Eni ga dbar kjwara ga epga tönö löng kop sak dbäw kjjngsho sak pjök (120). Eshko ga Pedro

kojono shäng ba pjeयोग llama löng li tjrëko, ga tjlë ba kong ga

16-17 «Pjeयोग, Judas, e kjrara Jesúsde jëk shäng borwa tjok wlo, ga parkono borwa tjok bakoe. Gueniyo ga Jesús shakoba wlo ga pingga erë, ga beno Jesús roy laga ame. Dënashko ga tjlökwo lara Sbö Sëyarë Judas kjishko, tjlökwo li tara Pjlu Daviddë. E kjishko ga tjlökwo lara li shäryono eni tjan.

18 »(Llëbo owa shäryara Judasde li potjwlëkklo dburyo li go ga kjok tjwlëna kjrina. Eshko ga lono jer jong kälëkong, bögwö dloktong, llangkogro tuktong drete.

19 Nopga löng Jerusalén kjokyo li, e miydara lok pjir, ga kjok eshko kowara lok Acéldama, lëy bi tjlökwo go ga “Srëng kjokyo.”)

20 »Dënashko ga kjibokwo ko *Salmos* li tak beno pjang eni:

»“Ba u jong lishko, e kworkwë ber buk kjok ëye llëmshko.

Ëye ber sök eshko ame.”\*

»Eshko ga tak pjang eni bakoe:

»“Ba pak, e ber sogo oblë.”†

21 »Eni kuzong ga domer kjrërwa kjlara parkë ber shäng Judas äska. Jüşko ga domerga löng, jëktong löng bi tjok bebi, Tjlapga Jesús shäng bi tjok lishko.

22 Jesús wara Juandë li ña lok. E irgo ga jëktong löng ba tjok, ga dbaryo öötong söra to jem kjok dogo ga ña löng obie. Woyde ga kjwepga kjwe kjlara tek ber borwa tjok. Eni ga llëbo ña, kura li roy le borwa tjok wlo» le.

\* 1:20 Salmo 69.25. † 1:20 Salmo 109.8.

<sup>23</sup> Eni ga kjrara lok do pjök. Kjlara ko José, kowëba Barsabás, kowëba Justo bakoe. Kjlara obi ko Matías.

<sup>24</sup> Eshko ga syöshtono lok Sbö kong, tjlä ga «Tjlapga, tjawa uunkong wotjlik löng borwa pjlúshko sorë li, e miydëp pjire. Nopga do pjök ëre kjrorop kjone dey ga pīs borwa kong.

<sup>25</sup> E ber bop tjlökwö roy laga Jesús äska. Pak li, e Judas ĩ, gueniyo rayara to ba shdüzlong kjokyo lishko» le.

<sup>26</sup> Eni ga llëbo jyäglo shira lok, ga jyã lono beno Matías kong. Eshko ga Matías beno shäng Sbö tjlökwö roy lagaga Jesús äska doglo sak kjwara kjingsho kjlara (11) li kjlarayo.

## 2

*Jesús tjlökwö kjrägaga go Sbö Sëya shrono beno kësbanq ba tjok*

<sup>1</sup> Öötong judío dbar shrëzlong dbaryo kowe lok Pentecostés\* ga Jesús tjlökwö kjrägaga tönö löng uunkong uyo kjwaraso.

<sup>2</sup> Jekdo eshko ga kuya lok ga llëye ter kjok dogo dwayo pjluk träk llëm, pjluk tjwe jong ri ri dbo träk llëm wleni, ga tönö beno pjang u li roshko, epga löng lishko.

---

\* **2:1 Pentecostés**, e judíoga dbar shrëkklo. E kowëba dwla bo kjrozlong dbaryo bakoe. Israel tjëyoga döktong tek Egipto kjokyo dwayo dbaryo shrëkklo pjir irgo ga äar dbargwo sak shkëng (50) go ga Pentecostés dbaryo li shrëya lok. Eshko dbaryo ga dwla bo mite kjrara li twe lok Sbö kong, ba sëngglo, tak pjang Levítico 23.15-22 go sorë li eni.

<sup>3</sup> Eni ga llëbo weno kãã iök pjë jong ri ri wleni, so kjoykwo kjoyo, ga beno eni kjlara kjlara kjing go.

<sup>4</sup> Eshko ga uunkong go Sbö Sëya shrono beno kësbang ba tjok. Eni ga tjëlë löng kjok shto oblë oblë so tjëlökwo go, iara Sbö Sëyarë tjëlë sorë ga tjëlë löng eni.

<sup>5</sup> E dbaryo ga judíoga löng Jerusalén kjokyo, Sbö poshrëk löng enido wleniyo shrono löng kjok shto oblë oblë uunkong dwayo.

<sup>6</sup> Pjluk jong kës li kura lokshko ga töno löng eshko. Eshko ga kura lok ga Jesús tjëlökwo kfragaga tjëlë löng kjlara ï ï ba tjëlökwo baïya layde. Ga wojeno lönge.

<sup>7</sup> Eni ga beno löng polläk, yëy le erä. Ga tjëlë lok ëng kong ga «¿Kjwepga Galilea sopga dö llëmdo?

<sup>8</sup> ¿Kuy ga tjëlë lok bi tjëlökwo bishïya kjlara ï ï, e sorëro?

<sup>9</sup> Jüshko shji nopga tjeng kjone pogo so: Partia so, Media so, Elam so, Mesopotamia so, Judea so, Capadocia so, Ponto so, Asia so,

<sup>10</sup> Frigia so, Panfilia so, Egipto so, Libia so shrono löng Cirene kjokyo worbo goshko, Roma so,

<sup>11</sup> Creta so, Arabia so bakoe. Shji kjong kjong judíoga weno bukshko. Shji kjong kjong weno judío llëm, gueniyo shji kjlopswono beno Sbö tjëlökwo kfraga judíoga ï dik. Ga kuy löng ga llëye shäryara Sbörë kësbang li le löng bi kong bi tjëlökwo om go li go» le.

<sup>12</sup> Löng yëy le tjë jïkong, llëbo woyotjïya löng miyde llëme. Ga tjëlë lok ëng kong ga «¿Llëbo tjeng kës ëre llë loklo?» le lok eni.

13 Ga tjrëko löng kjlöbö ba läywë owa, tjlä ga «jKjwepga löng nelöe!» le.

*Pedro tjläno nopga ara kong*

14 Eni ga Pedro kojono shäng Sbö tjlökwö roy lagaga Jesús äska llamo doglo sak kjwara kjingsho kjlara (11) li tjok, nopga li bokshto. Eshko ga tjläno ba kong lok dbo go. Tjlä ga «Pjäy judíoga, pjäy löng ëreshko Jerusalén so tjë jíkong, llëye inomi kës ëre pjllölgwer bomi kong. Llëye lër bomi kong li kuzi yötsoe.

15 Woyotjlämi ga domerga löng ëre löng nelöe lämi, miga eni llëme. Eni tjok ga dlo wenzong jä. Kjok eni ga ëye shäng nelö llëme.

16 Llëye shäryë pjang ëreshko lara Sbö tjlökwö laga tek dënashko so Joeldë ba pjeyoga kong pjir tjän. Tjläno beno eni:

17 »“Sbö tjlä ga ‘Kjok pjir lëshko ga pjäy go bor Sëya ichër äär ber kësbang bomi tjok.

Tjlökwö lër bomi wapga domerga, walëga kong, ga le lok oba kong eni.

Dwlasga,  
era kong llëbo botoya ichër wen ñya lok yoshko wlo.

Tjlapga domerga këkboga,  
era kong yo llë botoya ichër ñya lok wlo bakoe.

18 Eshko dbaryo ga bor parkagaga domerga, walëga,

era go bor Sëya ichër äär ber kësbang ba tjok,  
e irgo ga llëye lara ba kong li le lok oba kong.

19 Kjopkwö go ga

llëbo ãydëba llëm wleniyo shãryër ara kësbang  
eshko.

Klung kjing go ga

ïmi ga nopga ëng zrök ara, iök ara, yõ sho ara  
bakoe.

E ber tja tjwe döröe loklo.

<sup>20</sup> Tjlapga tjwe dbaryo,

e tjwlõ kësbang, e pjlu, owa llëme.

Tjwayde llëm obishko ga

dlo, e kjlopswë ber kjok ro yët,

mok, e kjlopswë ber srëzrën, srëng wleni.

<sup>21</sup> Eshko ga ëye, tja rokara ba kjimtë ga

era döktonge'le Sbörë eni."†

<sup>22</sup> »Israel tjëyoga, llëye lër li kuziã. Jesús, Nazaret so li llëbo ãydëba llëm wleniyo shãryono oblë oblë bomi tjrëko. E miydoromi pjire. Shãryono eni, e ichaga Sbörë miydëmi e go wlo.

<sup>23</sup> Eni gueniyo ga e twaraba shäng bomi kongshko ga sharomi, ga löromi pjang kjlös go, zrömi wlo, ga pjây kjimtaga nopga owa wleniyorë. Tek dënashko ga e miydara, lara Sbörë eni.

<sup>24</sup> Gueniyo ga woshrara Sbörë iröng obi. Bäm go ga wolono. E irgo ga döra eshko dwayo. Wolono beno buk eshko, ber buk shinmo ãyado wlo llëme.

<sup>25</sup> Dënashko ga Pjlu David tjlëno Jesús kjïshko. Tjlëno beno eni:

»“Tja Tjlapga ãk enido bor bokshto.

Shäng bor zlong bäng orkwo këlëkong,

eni kuzong ga llëye bangkjrër llëme.

<sup>26-27</sup> E kjïshko ga tja wopjlu,

tja të bor kjamo go woowa llëme.

† **2:21** Joel 2.28-32.



Miydër ga bor doyo woshrëp iröng obi ber shäng sê.

Tjlapga, tja iëp ber buk sakshko llëme.

Tja bop parkaga iak beno shäng dboy bop kong,  
ga bor doyo iëp an ber buk eshko llëm bakoe.

Pja koshër shäng wopjlu íyado e kjishko.

<sup>28</sup> Tja woshrë iröng obi wlo ga irboyo pinop bor kong,

tja iorop beno sök bop bokshto ga tja ber wopjlu, woowa llëme.”‡

<sup>29</sup> »Pjeyoga, tja tjlä bomi kong jlökoyo ga kuzi sira. Bi tjlapga tek dënashko so tjwlö ara David, e wolono, ga jnenaba buke. Ga ba sak'li buk bi tjrëko obi.

<sup>30</sup> Gueniyo ga e Sbö tjläkwo laga. Miydara ga Sbö tjläno ba kong jlökoyo li shäryë eni kjluwe. Sbö tjläno ba kong ga “Llono ga bop tjëyo tek ber bop irgo li tjrëko pjlu wen kjlara ber no pjluoyo pja dik bakoe” lara Sböre eni.

<sup>31</sup> Eni ga pjlu li weno ina shäng tjän wleni, ga ina ga shinmotkono, gueniyo woshrono iröng obi. E kjishko ga tjläno ga pjlu li, e ie Sböre ber buk sakshko llëm, doyo ie an ber buk eshko llëm, woshre iröng obi kjluwe le.

<sup>32</sup> Pjlu le li, e Jesús layde. Era woshrara Sböre iröng obi, ga tjawa tjë jikong beno löng e inorwa jlöe laga.

<sup>33</sup> E söra Sböre to jem öötong sirkeno beno sök ba tjok ba orkwo këläkong, ga iara beno tjwlö kësbange. Ga “Sbö Sëya, e twër ber bop kong” lara Data Sböre ba kong jlökoyo li, e twara beno ba kong. Ga borwa go Sbö Sëya ichara ba Warë ber

‡ 2:28 Salmo 16.8-11.

kësbang borwa tjok. Llëbo tjeng kës ñnomi, kuromi li e.

<sup>34-35</sup> Dënashko ga David tjlë ga

»«Tjlapga tjlëno bor Tjlapgayo kong ga

‘Pja tek wlar ber sök bor orkwo këlkong,  
äär jong bop moskwoga zanor pjir guing,  
eshko ga iër ber tjeng bop wloshko, ichëp wlo’  
le Tjlapgarë”Š le Daviddë eni, to jem kjok  
dogo llëm gueniyo.

<sup>36</sup> »Israel tjëyoga tjë jïkong, tjlökwo lër li kuzi  
yõtsoe. E jlëe. Jesús zröromi pjang kjlôs go. Gueniyo  
ga iara Sbörë beno shäng bi Tjlapgayo. No pjlyo  
iche tjwe lara li e» le.

<sup>37</sup> Kuya lok ga woydono ara, wosonkono ara erä.  
Ga tjlë lok Pedro kong, Sbö tjlökwo roy lagaga Jesús  
aska llamo li kong ga «Pjeyoga, ¿llëye shäryërwa?» le.

<sup>38</sup> Kuya Pedrorë ga tjlë ba kong ga «Llëbo owa  
shäryëmi löng li, e owa jlëe lozi, ga rayozï, ga  
pjäy nom kjlarashko kjlarashko, pjäy wëba jer di  
roshko Jesucristo ko go, owa pjang bomi go li löya  
Sbörë ber dret wlo. Eshko ga ba Sëya twe Sbörë  
bomi kong jlökoyo.

<sup>39</sup> Tjlökwo ëre, e ber ëye rokara Sbörë ber ba  
nopga wlo li kong uunkong, bomi kong, bomi  
wapga kong, ëye löng pjola li kong bakoe» le.

<sup>40</sup> Pedro tjlëno ara obi, nopga li poshduna tjlökwo  
oblë oblë go. Tjlë ga «Nopga löng eerishko wotjlik  
owa li shdüya Sbörë. E kjïshko ga pjäy wotjlik  
baïya dik llëm, pjäy opkjös nopga owa löng lishko  
dwayo» le.

<sup>41</sup> Eni ga ëye ba tjlökwo kjrono ga wara lok jer di roshko tjë jïkong. E dbaryo ga tjlökwo kragaga beno doglo sak dbäw dbäw pjoglo mya (3,000) dik obi, ga tönö löng bäm go li tjok.

<sup>42</sup> Eshko jek lëkong ga beno löng tjlökwo le Sbö tjlökwo roy lagaga Jesús äskarë li kuk, ga tön lok ëng tjok ara ië wlo, syöshtë Sbö kong wlo bakoe.

### *Jesús tjlökwo kragaga, e löng ëng tjok sorë*

<sup>43</sup> Sbö tjlökwo roy lagaga Jesús äska llëbo ïydëba llëm wleniyo shäryono oblë oblë nopga li bokshto ara. E kjïshko ga ïna Jerusalén sopgarë ga yëy le lok tjë jïkong.

<sup>44</sup> Ga Jesús tjlökwo kragaga tön tjeng ëng tjok ïyado, ga ba llëbo kës li shdöya lok ëng kong.

<sup>45</sup> Kjong kjong kjok tjok ga soyneya, kjong kjong llëbo oblë tjok ga soyneya, ga dburyo shdöya ëng kong, kjone ï llëm ga twe lok ba kong opkjimtë wlo.

<sup>46</sup> Dbar kjwobi go ga tön löng Sbö u zlong bäng. Löng ushko ga ië lok ëng tjok, ga ba dli shdöya ëng kong enido. Eshko ga löng wopjlú, wotöy kjlara kjlara kong.

<sup>47</sup> Sbö, e poshrëya lok ara. Ga nopga oblë beno wopjlú ba tjok uunkong. Dbar kjwobi go ga nopga döya Sbörë obi ber ba nopga wlo. Ga Jesús tjlökwo kragaga tön jek këgong këgong.

## 3

### *Domer sök töshko jëk llëm wleniyo kojona Pedrorë kjlara Jesucristo dbo go*

<sup>1</sup> Dbar kjwara ga syöshtozlong dlöyo, dlo töy wleni ga Pedro, Juan, e jem löng Sbö u zlong bäng.

<sup>2</sup> Eshko ga domer sök töshko kjlara jëk llëm wleniyo, weno buk eni. Dbar kjwobi go ga sökoba tjwe Sbö u zlong bäng. U bäng jong eshko kjwara kowëba Wolësowa, iëba sök eshko li ëye jem opzrëk eshko ga kong dbur roke wlo le.

<sup>3</sup> Pedro, Juan, e jem opzrëk löng eshko kjwlë ga kong dbur rokara ba kong.

<sup>4</sup> İya lok drëng ga Pedro tjlë ba kong ga «¡Tjawa İzong!» le.

<sup>5</sup> Eni ga İya beno sök drëng, kong dbur twero le ga koshe sök.

<sup>6</sup> Gueniyo Pedro tjlë ba kong ga «Tja dbur llëm, dbur sho shöylör llëm bakoe. Gueniyo ga llëbo tjeng bor tjok li twër bop kong. Tja kong dbo twara Jesucristo, Nazaret so lirë. E go ga pja kojözong, pja jëkzong» le ba kong.

<sup>7</sup> Eni ga shara Pedrorë ba orkwo këlëkong go, ga kojonaë. Jekdo eshko ga ba dreglo, e dbokjronoe.

<sup>8</sup> Eni ga jek zrow shäng erä, kojongö shäng ba dre li go, eni ga jëktong, opzrëno jek Sbö u zlong bäng ba tjok lok. Jëk jong, zron jong, Sbö poshrëk arae.

<sup>9-10</sup> Domer li İkoba sök eshko u bäng jong kjwara ko Wolësowa li zlong bäng, sök dbur rokë eshko enidoe. E kjishko ga shäng jëk, Sbö poshrëk ara li İya lok ga beno löng yëy le, polläktëng erä.

### *Pedro tjlëno nopga ara kong obi*

<sup>11</sup> Eshko ga swlo kayo poptono li, Pedro, Juan, e raye woydë ame. Ga nopga löng kjlobi beno löng yëy le erä, ga tek zron jong tjwe löng lishko, Salomón Shto buk lishko. E ber buk Sbö u jong lishko.

12 Īya Pedrorë ga tjlë nopga löng kës li kong ga «Israel tjęyoga, ¿pjây beno löng yëy lëmi ega? ¿Tjawa ĩmi löng kjër egaro? ¿Woyotjĭmi ga domer kjwe iororwa jëk shäng borwa woshko lëmire? Eni llëme. ¿Shäryororwa, tjawa jëk pjlo bek kjĭshko lëmire? Eni llëm bakoe.

13 Sbö, e Abraham, Isaac, Jacob, e Sbö, bi tjlapgaga tek dënashko so Sbö bakoe. Ba parkaga Jesús, e iara beno kësbang, tjwlö ara. Gueniyo bomi kongda, e tjwlö llëme. Tworomi beno shäng no shdunggaga kong. Eni ga döya Pilatorë larashko ga “Woydërwa llëme” loromi. “Zrös pjang kjlös go” loromi eni.

14 No pjlo bek iak beno shäng dboy Sbö kong li, e woydoromi llëme. No rokoromi kjlara no zrök ä wleniyo, “Era dözĭ borwa kong dey” loromi eni.

15 Eni ga shji löng së laga li, e zröromie. Gueniyo ga woshrara Sbörë iröng obi, ga tjawa beno löng e ĩnorwa jlöe laga.

16 Eni ga domer kjwe poptono shäng, e miydoromi pjluë. Tjawa mär Jesús go. E kjĭshko ga domer kjwe dreglo dbokjronoe. Kjwe poptara Jesúsdë, tjawa mär ba go kjĭshko, ga ĩmi löng wëlleë.

17 »Pjeyoga, miydër ga Jesús zröromi, e ichak Sbörë miydoromi llëm kjĭshko, bomi tjlapgaga om-miydono llëm bakoe.

18 Dënashko ga Sbö tjlëno ba tjlökwo lagaga kong ga bi pjluyo iche le li kong llëbo owa wen ara. Llëye shäryoromi ba kong li shäryono eni e kjĭshko.

19 E kjĭshko ga llëbo owa shäryëmi löng li, e owa jlöe lozĭ, ga rayozĭ, ga pjây optwos Sbö kong dey, owa pjang bomi go li löya ber dret wlo.

20 Shäryëmi eni ga pjäy iche Sbörë dbokjrë, ga Jesús, e dënashko ga kjrara Sbörë ber bomi pjlyo li, e iche ber shäng bomi tjok.

21 Eni gueniyo ga eerishko ga sök kjok dogo. Äär jong eni, llëbo uunkong, e kjlopswara Sbörë beno tjaglën guing. Tjlökwo lara ba tjlökwo lagaga tek dënashko sorë li beno eni.

22 »Dënashko ga Moisés tjläno bi tjlapgaga kong eni. Tjläno beno eni: “Tjlapga bomi Sbö, pjäy kong tjlökwo laga kjre bomi tjräko kjlara, so tja kjoyoe. Llëye le bomi kong li kolozĩ uunkong.

23 Ëye omkolono llëm ga kje Sbörë ber sök ba nopga tjok ame”\* lara Moisésdë eni.

24 »Llëye wen eerishko dbaryo li lak tek dënashko Sbö tjlökwo lagaga uunkongdë, Samuel dwayo tek lëkong.

25 Eni ga llëye lara Sbörë ba tjlökwo lagaga tek dënashko so kong jlökoyo li, e beno bomi kong, tjlökwo twara bomi tjlapgaga tek dënashko so kong, beno iyado wlo li, e beno bomi kong bakoe. Dënashko ga Sbö tjlä Abraham kong ga “Tjäyo löng kjrina kjrina kjok kjwang jikong kjimtër, bop tjëyo tek ber bop irgo kjlara li kjishko”† le.

26 Eni ga ba Wa ichara Sbörëshko ga ichara bomi shwoy bäm go, pjäy kjlobi li kjimte wlo, llëbo owa shäryëmi löng li rayëmi wlo» le.

## 4

### *Pedro, Juan, e söraba tjlapgaga kong*

\* **3:23** Deuteronomio 18.15, 18-19. † **3:25** Génesis 22.18; 26.4.

<sup>1</sup> Ga Pedro, Juan, e tjlē löng oba kong wopro ga syōshtagaga Sbō kong ba pjeyoga kjīshko shrono löng eshko kjlōböso, Sbō u daga kägäyo tjok, saduceoga kjong kjong tjok bakoe.

<sup>2</sup> Pedro, Juan, e löng oba ping ga Jesús, e wolono, ga woshrono iröng obi, ga shji ëmdë ga wolonoshko ga shji woshre eni bakoe. E kjīshko ga shrono löng li iirkë ara ba kong.

<sup>3</sup> E kjīshko ga shara lok, söra to no shdüzlong uyo, ga bängzara lok eshko. Kajok sëng anmoyō kjīshko ga llgwewa wëshko jã le.

<sup>4</sup> Gueniyo ga ba tjlökwo kugaga löng li ara, ga ara eni, e omtjlökwo kjronoe. E tjok ga Jesús tjlökwo kragaga shtëy domerga dö wleni ga öötong kop sak dbäw dbäw pjloglo shkëng (5,000) dik.

<sup>5</sup> Wëshko ga tjlapgaga kës-kës li tōno löng Jerusalén kjokyo, epga syōshtagaga kägäyoga, judío tjlapgaga kjok llgwegaga wleniyo kägäyoga, no pingga kjok llgwekklo tara Moisésdë go li kägäyoga bakoe.

<sup>6</sup> Löng eshko li Anás, e syōshtagaga kës-bangyo, Caifás, Juan, Alejandro, epga syōshtagaga kës-bangyo li pjeyoga obi.

<sup>7</sup> Eshko ga nopga ichara lok Pedro, Juan, e söya tek löng lishko dwayo. Ga shrono löngshko ga kojonga löng ba boksho. Eshko ga tjlapgaga li tjlē ba kong ga «¿Domer li poptoromi sorë? ¿Pjã kong dbo twaga ërë no poptëmi eni wlo?» le ba kong lok.

<sup>8</sup> Eni ga Pedro go Sbō Sëya shrono beno kës-bang ba tjok, ga tjlē ba kong ga «Pjã syōshtagaga kägäyoga, tjlapgaga,

<sup>9</sup> llëbo pjlú shäryororwa swlo sök kjlara kong, ga poptërwa sorë lëmi löng borwa kong eni.

<sup>10</sup> Eni ga pjây ommydë wlo ga Israel tjëyoga uunkong ommydë wlo bako ga lërwa ga kuzïa. Domer poptono shäng pjlú ëre, e poptororwa Jesu-cristo, Nazaret so li dbo go. Zröromi pjang kjlös go kjupä li e. Zröromi, gueniyo woshrara Sbörë iröng obi.

<sup>11</sup> »“Akkwo woydoromi pjây u shäryagagarë llëm li, e iak beno buk bäm go,

beno tjwlö ara, oblë kjinmo.”\*

Akkwo le li, e Jesús layde.

<sup>12</sup> Shji döga erë. Ëye oblë iara Sbörë beno kjok ëre kjing go shji döya wlo llëme. E kjïshko ga ëye oblë shji döya wlo drete» le ba kong eni.

<sup>13</sup> Ìna tjlappagarë ga Pedro, Juan, e tjlë löng dbo go ba kong, llëye bangkjre lok llëme. Miydara lok eshko ga epga kjok miydë llëm, oppino ara llëm bakoe. E kjïshko ga kuya lok ga tjlë lok eni ga beno löng ba woyotjlik arae. Ga miydara lok ga Jesús shäng obishko ga epga jëktong löng dâw ba tjok.

<sup>14</sup> Eshko ga domer poptara li kojono shäng ba tjok eshko. E kjïshko ga beno löng kjing, llëye le lok ga äe.

<sup>15</sup> Eni ga ichara lok eshko dwayo. Ga epga beno löng tjoksa, ga tjlökwo kjlopswe lok ëng tjok kar kare.

<sup>16</sup> Tjlë ëng kong ga «¿Domerga kjwe kong llëye shäryëy? Llëbo ïydëba llëm wleniyo shäryara lok kësbang jlökoyo bi bokshto, e miyde Jerusalén soppagarë uunkong. E jyö lëy ga äe.

---

\* **4:11** Salmo 118.22.



17 Llëbo, e iëy ber eni. Gueniyo ga tjlökwo le oba kong ame wlo ga kjweri kroyoywëy. Shji tjlë ba kong ga “Eeri jek lëkong ga Jesús roy lëmi ë kong ame” lëy ba kong eni» le.

18 Eni ga rokara tek iröng obi, ga tjlë ba kong lok ga «Pjãy Jesús roy lë ë kong ame, ga ëye pimi Jesús tjlökwo go ame bakoe» le.

19 Kuya lok ga tjlë ba kong ga «Woyotjliãzi pjãydë om goshko. ¿Pjãy bangkjrako bãm gore, de bangkjrako li Sbö? ¿Kjone dey ber pjlu Sbö kong?»

20 Llëbo ñorwa, kurorwa li, e läyworwarë ñyado, tjawa ber löng kjing ga äe» le.

21 Kuya tjlapgaga lirë ga kroyoywara lok jek obi, gueniyo llëye shäryara ba tjok llëm, rayara to, shduna llëm bakoe. Shdüya lara, gueniyo Sbö poshrëkoba ara, llëbo ñnaba to jek shäryono li kjishko. E kjishko ga shdüya ga bangkjre lok ara.

22 Domer poptara li, e lu pjloglo sak pkëng (40) kjingsho tjok.

### *Jesús tjlökwo kjrägaga syöshtono Sbö kong*

23 E irgo ga Pedro, Juan, e rayara lok toe. Eshko ga jek öötong löng ba pjeyoga Jesús tjlökwo kjräga töno löng lishko. Ga tjlapgaga li tjlëno ba kong llëro li lara lok ba kong pjire.

24 Kura lok pjir ga syöshtono lok Sbö kong tjë jikong. Tjlë ga «Tjlapga, pja borwa pjluoy. Kjopkwo, e shäryaga pjarë. Kjok kjwang jikong, e shäryaga pjarë. Dlung, e shäryaga pjarë. Llëbo tjeng eshko kës li, e shäryaga pjarë bakoe.

25 Bop Sëya kjishko ga lorop borwa tjlapga tek dënashko so David kong. Tjlëno beno eni:  
»“¿Tjëyoga tjeng kjok kjwang jikong li,

e shdöktong iirkë ara egaro?

¿Wotjlik löng ‘¿Llëye shäryëy Sbö kong owa ga äe?’ le egaro?

26 Pjlupga, no kägäyoga,  
e ëng töno lok bi Tjlapga wloyo,  
bi pjluyo iche le li wloyo bakoe.”†

27 Jyā tak beno pjang ëre, e jlöe. Kjpübāshko ga Herodes, Poncio Pilato, e töno kjok ëreshko Jerusalén kjokyo Israel tjëyoga tjok, nopga judío llëm wleniyo tjok bakoe. Opyono lok Jesús, bop parkaga iak beno shäng dboy li wloyo. E kjrorop. Borwa pjlū ichëp lorop li e.

28 Tek dënashko ga llëye shärye lok ba tjok li, e miydrop, ga laga beno pjarë. Ga shäryara lok eni.

29 Tjlapga, is ga tjawa kroyoywëba arae. Ga tjawa bop parkaga ëre kjimtos bop tjlökwō roy lë wlo, llëye bangkjrërwa llëm wlo bakoe.

30 Bop dbo go ga swlopga dwlomnezong. Llëbo ÿydëba llëm wleniyo shäryos ara, bop parkaga iak beno shäng dboy Jesús li ko goshko» le lok Sbö kong eni.

31 Syöshtono lok pjir ga töno löng lishko ga kjok eshko jek dete yo wleni. Eni ga uunkong li go Sbö Sëya shrono beno kësbang ba tjok, ga Sbö tjlökwō le lok dbo go, llëye bangkjre lok llëme.

*Jesús tjlökwō kjrägaga ba llëbo shdöno ëng tjok*

32 Eshko ga Jesús tjlökwō kjrägaga uunkong wotjlik jong kjrinaso. Ëye wotjlik ga «Llëbo ëre, e botoya döe» le llëm, sogo uunkong.

33 Ga Sbö tjlökwō roy lagaga Jesús äska li, e jek löng Tjlapga Jesús woshrra Sbörë iröng obi li

† 4:26 Salmo 2.1-2.

lanyotkë dbo go oba kong. Ga uunkong li kjimte Sbörë ara.

<sup>34</sup> Llëye woydako ba kong lok eshko drete. Olö ga ëye kjok tjok, u tjok, e soyneya, dburyo söya tjwe,

<sup>35</sup> ga twe Sbö tjlökwo roy lagaga kong. Eni ga shdöya lok kjone kjone löng llëye dret wleniyo kong.

<sup>36-37</sup> Tjrëko domer shäng kjlara ko José. E Leví tjëyo, dlung tjrëko ko Chipre li so, kowe Sbö tjlökwo roy lagaga lirë Bernabé. Bernabé, e no wojega loklo. Pjlara ga kjok baïya soynena kjrina, ga dburyo söra, twara Sbö tjlökwo roy lagaga kong.

## 5

### *Ananías, Safira*

<sup>1</sup> Domer shäng kjlara obi ko Ananías, ba boy ko Safira. Pjlara ga epga kjok soyneno kjrina bakoe.

<sup>2</sup> Eshko ga domer li tjlë ba boy kong ga «Dbur kjrër kjrina, ga llamo sör, twër Sbö tjlökwo roy lagaga Jesús äska kong, tworor uunkong wleni» le ba kong eni. Kuya ga «jölö» le. E irgo ga shäryara Ananíasdë eni.

<sup>3</sup> Tweshko ga Pedro tjlë ba kong ga «Ananías, ¿Ä iorop tjwe bop go, pja wotjlik kjok li dburyo kjrëp kjrina wlo, pja jyörké Sbö Sëya kong wlo ega?

<sup>4</sup> ¿Kjok li, e bopoya llëmdo? ¿Eni kuzong ga soynenopshko ga dburyo bopoya llëmdo? ¿Pja opshäryë eni ega? Pja jyörkono nopga kong dö llëm, pja jyörkono Sbö kong bakoe» le.

<sup>5</sup> Kuya ga jek rish buk töshko, ga wolonoe. Nopga omroy kuno kjlobi li beno löng dete erä.

<sup>6</sup> Eni ga dwlasga löng eshko li ëng töno kjlöbö, shinmo doyo li popgara shwong go, söra jek sakshko, ga jnenae.

<sup>7</sup> E irgo wop ara ga Ananías boy tek tjwe shäng eshko, gueniyo llëye shäryono li miyde shäng llëme.

<sup>8</sup> Eshko ga Pedro tjlä ba kong ga «Los bor kong jlökoyo. ¿Bomi kjok soynenomi dburyo lara bop lanmarë li eni jlöre?»

«Ëng, tjwlö lara sorë li eni» le ba kong.

<sup>9</sup> Kuya ga tjlä ba kong ga «¿Pjây opyë wotjlik kjrinaso ëng tjok eni ega? ¿Tjlapga Sëya tjlinomi eni ega? Këm kjoko ga bop lanma jnegaga löng sakshko li tek löng kjwlëe. Eni ga pja söya lok jongya sakshko, pja jneya lok eshko wlo bakoe» le.

<sup>10</sup> Jekdo eshko ga jek rish buk töshko Pedro zlong bäng, ga wolonoe. Ga dwlasga li opzrek tek löng kjwlë ga İya ga Safira wolono buk, ga shira lok jek eshko dwayo, söra jek sakshko, ga jnena lok buk ba lanma zlong bäng.

<sup>11</sup> Eni ga Jesús tjlökwö kjrägaga uunkong beno löng dete erä. Ga nopga omroy kuno kjlobi li beno löng dete eni bakoe.

### *Nopga poptono ara*

<sup>12</sup> E irgo ga llëbo İydëba llëm wleniyo shäryara Sbö tjlökwö roy lagaga Jesús äskarë oblë oblë oba boksho ara. Eshkoshko ga Jesús tjlökwö kjrägaga tön löng enido uunkong Salomón Shto buk lishko. E ber buk Sbö u jong lishko.

<sup>13</sup> Jesús tjlökwö kjrägaga woydëba ara ëmdë ga ëye oblë opyë tön ba tjok eshko llëm, bangkjre lok ara kjishko.

<sup>14</sup> Eni ëmdë ga nopga ara mär beno löng Tjlapga Jesús go, ga ba tjlökwö kragaga tön jek këgong këgong, domer, walë.

<sup>15</sup> Eshko ga swlopga shikoba ba ushko dwayo, sökoba tjwe irbo bäng, ie ba bukklo kjing go, llëm ga swlo sökklo kjing go. Pedro jek e go ga ba jyäglo pjë ba go sira kjwe le lok eni.

<sup>16</sup> Nopga löng kjok shto oblë oblë soshko, Jerusalén kjokyo sor go, e tjwe jong Jerusalén kjokyo tira llëm, ba swlopga, nopga goshko Ä sëyaga, e söya lok eshko. Ga uunkong li poptono lok pjire.

*Sbö tjlökwö roy lagaga Jesús äska li shdunaba ara*

<sup>17</sup> Eni ga İya syöshtaga kësbangyo, saduceoga löng ba tjok lirë ga ymoyotkara ara.

<sup>18</sup> E kjışhko ga Sbö tjlökwö roy lagaga shara lok, iara lok beno löng no shdüzlong uyo roshko.

<sup>19</sup> Gueniyo kjok shkë ga Sbö parkaga kjok dogo so shrono shäng kjlara eshko, no shdüzlong uyo li u bäng döra, ga löng eshko li shira jek ey dwayo. Ga tjle ba kong ga

<sup>20</sup> «Pjäy nomo. Pjäy opyos löng kojong Sbö u zlong bäng. Eshko ga tjlökwö ëre, shji ie Sbörë ber löng së İyado ba tjok li, e lëmi nopga kong pjire» le ba kong.

<sup>21</sup> Eni kjok shröngto ga öötong löng Sbö u zlong bäng, ga nopga löng eshko li pina lok.

E wopro ga syöshtaga kësbangyo, ba dboryagaga, e nopga rokono tjwe lan ëng tjok wlo, nopga rokara li, e judío tjlapgaga kjok llgwega wleniyo. Eni ga Judío Kjok llgwega Käskësyö ëng tönö

l'ong, ga nopga ichara to Sbö tjlökwo roy lagaga tjeng no shdüzlong uyo li kjrë le.

<sup>22</sup> Gueniyo ga no dagaga li öötong löng no shdüzlong uyo li roshko ga eye wlëna llëme. Ga roy söra tjwe löng iröng,

<sup>23</sup> tjlë kjok llgwegaga li kong ga «Tjawa opzrëno jek löng no shdüzlong uyo roshko, ga bängzak jong yötso, ga no dagaga obi bë löng u bäng li dë. Gueniyo u bäng li dörorwa ga këm kjër roshko eye drete» le.

<sup>24</sup> Kuya Sbö u dagaga kägäyo, syöshtaga kägäyogarë ga wotjlík lok ga «¿Llëbo ëre, e pjir äär jong kjone?» le eni.

<sup>25</sup> Eshko ga domer shrono shäng kjlara, tjlë ga «¡Pjäy wlëp llëme! Domerga zrëromi jek löng kjër roshko kjurgue bë löng oba ping träk llëm llöm Sbö u zlong bäng» le.

<sup>26</sup> Eni ga Sbö u daga kägäyo öör ba kjrë ba parkagaga tjok. Ga söra lok tek obi, gueniyo llëye shäryara ba tjok llëm, oba bangkjre lok ara, lökoba ak go le kjishko.

<sup>27</sup> Eni ga söra, iara lok Judío Kjok llgwegaga Këskësyo töno löng li bokshto, ga syöshtaga kësbangyo tjlë ba kong ga

<sup>28</sup> «Tjawa tjlëno bomi kong jlökoyo ga “Pjäy Jesús roy lë ë kong ame, ga Jesús tjlökwo pimi ë kong ame bakoe” lororwa bomi kong. ¿Eni ga llëye shäryoromiro? Bomi tjlökwo loromi Jerusalén sopga löng kës li kong, ga domer wolono li wloyo tjawarë lëmi eni bakoe» le.

<sup>29</sup> Kuya Pedro, Sbö tjlökwo roy lagaga Jesús äska llamo lirë ga tjlë lok ba kong ga «Sbö tjlökwo

kolorwarë dey, nopga ï llëme.

<sup>30</sup> Jesús zröromi, löromi pjang kjlös go kjupä li, e woshrara bi tjlapgaga tek dënashko so Sbö lirë iröng obi,

<sup>31</sup> ga söra, iara beno sök ba orkwo këlëkong, beno tjwlö kësbang bi ichaga, bi döga, Israel tjëyoga li, llëbo owa shärye löng li, e owa jlöe le, ga raye wlo, owa pjang ba go li löya Sbörë ber dret wlo.

<sup>32</sup> Ga tjawa beno löng e ïnorwa jlöe laga. Sbö Sëya beno shäng ba roy laga bakoe. E twara Sbörë ba kolagaga uunkong kong» le.

<sup>33</sup> Kuya lok ga iirkono ara, zröya lok woydë erä.

<sup>34</sup> Gueniyo fariseo sök kjlara eshko ko Gamaliel, e no pingga kjok llgwekklo tara Moisésdë li go, e bangkjrëba arae. Kojono shäng eshko, ga tjlë no dagaga löng li kong ga «Domerga kjwe jek sözi kjoko sira» le, ga sörae.

<sup>35</sup> E irgo ga tjlë tjlapgaga llamo tjeng li kong ga «Israel tjëyoga, pjây sjëke. Llëye shäryëy domerga kjwe kong li, e woyotjlïy yötso guing.

<sup>36</sup> Woyotjlïzi ga domer weno shäng kjlara dënashko ko Teudas. E opyono shäng tjwlö kësbange. E irgo ga domerga töno tjeng ba tjok doglo sak dbäw pjloglo pkëng (400) dik. Miga, e irgo ga zröraba, ga llamo li shdöktonge. Eshko ga llëbo li pjitonge.

<sup>37</sup> »E irgo ga öötong shji ko kjrëba dbaryoshko ga domer weno shäng kjlara obi ko Judas, e Galilea so. E irgo ga oba töno ba tjok ara bakoe. Miga, e ëmdë zröraba ga llamo li shdöktong bakoe.

<sup>38</sup> »E kjïshko ga pjây poshdun ga nopga kjwe wëyë, rayozï, shji opzrëk ba tjok llëme. Llëbo li, e

sogo no wleni ga e pjir.

<sup>39</sup> Gueniyo e Sbö i wleni ga e zangga pjäydë llëme. Eni wleni ga pjây opzrëk woydë Sbö wloyo llëme» le.

Kuya lok ga jlö lara, ga zröra llëme.

<sup>40</sup> Eni ga domerga li rokara, ga shpora ara no shpokklo go erä. E irgo ga tjlë lok ba kong ga «Pjây nomo. Pjây Jesús roy lë è kong ame, ga Jesús tjlökwo pimi è kong ame bakoe» le lok ba kong. E irgo ga rayara toe.

<sup>41</sup> Eshko ga Sbö tjlökwo roy lagaga Jesús äska opshino lok tjlapgaga li bokshto wopjlúe. Opmiydë lok ga Sbö kong ga epga shdungoba Jesús kjishko li, e tjwłö ara. Ga iara Sbörë shdungoba eni kjishko ga beno löng wopjlúe.

<sup>42</sup> Eni ga dbar kjwobi go ga oba pïya löng enido Sbö u zlong bäng, u kjwarashko kjwarashko bakoe. Jesús, e ichara Sbörë ber bi pjluoyo sorë li roy pjlu le löng oba uunkong kong eni.

## 6

### *Domerga kjararaba doglo kjäk (7), parkë wlo*

<sup>1</sup> Eshkoshko ga Jesús tjlökwo kjaragaga tjwe tön jong arae. Epga tjlë tjlökwo kkring pjök, kjong kjong tjlë Grecia so tjlökwo, kjong kjong tjlë hebreo tjlökwo. Ga nopga tjlë Grecia so tjlökwo li kjiloshtë ara, tjlë ga «Kjwepga kjwe dli pjlorguë syäpga Grecia so kong ga twe chira anmoyö» le eni.

<sup>2</sup> Eni ga Sbö tjlökwo roy lagaga Jesús äska doglo sak kjwara kjingsho pjök (12) li, ba pjeyoga llamo tona löng uunkong ba tjok. Ga tjlë lok ba kong ga «Tjawa Sbö tjlökwo roy lagaga Jesús äska. Borwa



pak rayërwa, tjawa ber'löng dli pjlorgaga wlo ga äe. E bëy llëme.

<sup>3</sup> E kjïshko ga pjeyoga, domerga kjrozï bi tjrëko doglo kjäk (7), miydëmi ga pjlú wleniyo, kjok miydë ara, go Sbö Sëya jlökoyo. E irgo ga kjroromi li ber'löng pak li shäryaga.

<sup>4</sup> Tjawara ber'löng syöshtë, Sbö tjlökwo roy'le oba kong» le.

<sup>5</sup> Kuya lok ga «Jölä» le uunkongdë ga domerga kjrara lok eni. Kjrara li beno Esteban, domer go Sbö Sëya jlökoyo, e mär Jesús go eröe. Llamö beno Felipe, Prócoro, Nicanor, Timón, Parmenas, Nicolás. Nicolás, e Antioquía so, gueniyo dënishko ga kjlopsono beno shäng Sbö tjlökwo söga judíoga tjok.

<sup>6</sup> Kjrara lok irgo ga söra lok öötong löng Sbö tjlökwo roy lagaga Jesús äska shwoy, ga epga syöshtono Sbö kong ba kjïshko, orkwo iono lok ba dlu kjing go, pak li twe ber ba kong wlo.

<sup>7</sup> Dbar kjwobi go ga Sbö tjlökwo le lok ara, ga Jerusalén kjokyoshko ga ba kjragaga tön jek këgong këgong. Tjlapgaga syöshtaga Sbö kong ba pjeyoga kjïshko li ëmdë ga omtjlökwo kjrono ara bakoe.

### *Esteban sharaba*

<sup>8</sup> Esteban, e kjimtara Sbörë ara beno dbo ara, ga llëbo İydëba llëm wleniyo shärye kësbang oblë oblë oba boksho ara.

<sup>9</sup> Gueniyo kjong kjong omwoydonö llëme. Epga opping löng judíoga syö uyo ko No Döktong Uyo. Epga Cirene so, Alejandría so, Cilicia so, Asia so

bakoe. Lano Esteban tjok ara, ga ëng dboryono kar kare.

<sup>10</sup> Gueniyo Esteban kjimte Sbö Sëyarë ara, kjok miydë ara e kjïshko. E kjïshko ga epga löng ba bokstoshko ga dborye ga äe

<sup>11</sup> Eni ga nopga wlëna lok pjök mya, ba jyöyotkë wlo. Tjlë lok ga «Jlökoyo ga kurorwa pjlara ga Moisés läywara owa, Sbö läywara owa bakoe» le eni.

<sup>12</sup> Eni ga oba shdöra jong träk llëm, iirkë ara. Löng eshko li judío tjlapgaga kjok llgwega wleniyo, no pinggaga kjok llgwekklo tara Moisésdë li go bakoe. Eni ga Esteban shara lok, söra jek, öötong shäng Judío Kjok Llgwegaga Këskësyo tön löng lishko.

<sup>13</sup> Eshko ga nopga wlëna pjök mya, ba jyöyotkë wlo. Tjlë lok ga «Domer kjwe tjlä arae. Sbö u kjwe läywe owa träk sira llëm, kjok llgwekklo tara Moisésdë li läywe owa bakoe.

<sup>14</sup> Tjlëno kurorwa ga Jesús, Nazaret so li Sbö u pjik ber dret, shji iara Moisésdë jëk löng sorë li, e kjlopswe bakoe» le lok eni.

<sup>15</sup> Eshko ga tjlapgaga, llamo sirkeno löng eshko li, Esteban ïya lok drëng ga bokkwo kälä shjiy, so Sbö parkaga kjok dogo so kjoyoe.

## 7

*Esteban tjläno Judío Kjok Llgwegaga Këskësyo kong*

<sup>1</sup> Eni ga syöshtaga kësbangyo tjlä Esteban kong ga «¿Tjlökwo lëba bop kjïshko kës li eni jlöre?»

<sup>2</sup> «Pjeyoga, tjlapgaga, tja kuzïa. Bi kjokë tek dënashko so Abraham sök Mesopotamia kjokyo,

jekdë Jarán kjokyo llëm obishko ga Sbö Kësbangyo weno shäng ba kong eshko.

<sup>3</sup> Eshko ga tjlë ba kong ga “Bop kjok, bop tjëyoga, e rayos ber, ga pja nom jek kjokyo kjone pin bop kong lishko” le.

<sup>4</sup> Eni ga Abraham opshino Caldea kjokyo dwayo, ga to beno sök Jarán kjokyo.

»Ba data wolono irgo ga Abraham tek söra Sbörë shrono sök kjok ëreshko, eeri ga shji löng jüşhko.

<sup>5</sup> Gueniyo sök jüşhko ga kjok baïya dret, sëna kjok sira jüni ba dre shtoyo wlo ëmdë llëme. Gueniyo ga Sbö tjlëno ba kong jlökoyo. Tjlë ga “Kjok ëre twër ber bop kong, pja wolonoshko ga e ber bop tjëyo tek ber bop irgo li kong wlo” le. Eshko dbaryo ga Abraham wapga llëm obi.

<sup>6</sup> Sbö tjlë ba kong obi ga “Bop tjëyo tek ber bop irgo li, e to löng kjok shto oblë, ga parkë oblë kong, ga bokrotkëba, opshik ga ä äär luyo pjloglo sak dbäw pjloglo pkëng (400).

<sup>7</sup> Gueniyo ba bokrotkaga li shdun tjarë. Ga bop tjëyoga tjwe iröng kjok ëreshko, ga tja poshrëya lok jüşhko” le Sbörë ba kong eni.

<sup>8</sup> »Sbö tjlökwo twono Abraham kong, beno ïyado wloshko ga Abraham ichara ba doyo jyã të. E kjışhko ga ba wa Isaac bukshko ga dbargwo kj-wong (8) ga doyo jyã tara eni bakoe. Isaac omshäryono eni ba wa Jacob kong. Ga Jacob omshäryono eni ba wapga domerga doglo sak kjwara kjingsho pjök (12) li kong. Israel tjëyo tjlapgaga tjwlö ara li epga.

<sup>9</sup> »Kjłara jüni ko José. Ba shjiyga uunkong ymorkono ba kjışhko, ga soynena lok, söra

to Egipto kjokyo parkaga tjwlëk shäng wleniyo, gueniyo Sbö shäng José tjok.

<sup>10</sup> Eshko ga song, shdungobashko ga döra Sbörë llëbo owa li dbo dorko dwayo, ga iara beno kjok miydë ara, woyde Egipto so pjluyorë pjlú wlo. Ga iara pjlurë beno sök Egipto sopga uunkong kägäyo, ba parkagaga ichaga bakoe.

<sup>11</sup> »E irgo ga pjli shrono ara Egipto kjokyo kjok kjwang jikong, Canaán kjokyo bakoe. Eshko ga oba woydë arae. Bi tjlapgaga tek dënashko so löng kjok jüshko obi ga woydë ara bako, dli llëm kjishko.

<sup>12</sup> Gueniyo ga kuya Jacobdë ga Egipto kjokyo dli tjok ga bi dataga löng li ichara to eshko dli tjwlëk. Epga öör löng eshko e jä.

<sup>13</sup> Ga öör pjloglo pjök goshko ga José tjlä ba kong lok ga “Tja José, bomi lëng” le ba kong. E go ga miydara ba pjeyogarë. Ga pjlü ëmdë, José, e tjëyo llërba miydara bakoe.

<sup>14</sup> »E irgo ga ba data rokara Josërë tek ba pjeyoga uunkong tjok. Epga doglo sak kjäk kjingsho shkëng (75).

<sup>15</sup> Eni ga Jacob to jek beno sök Egipto kjokyo, ga wolono buk eshko. Bi dataga li wolono beno löng eshko bakoe.

<sup>16</sup> Gueniyo ba doyo söraba tek Siquén kjokyo, jnenaba beno tjeng eshko, sak eshko tjwlëna Abrahamdë dbur go, domer ko Jamor, e wapga kong.

<sup>17</sup> »Sbö tjlökwo lono Abraham kong jlökoyo li dbaryo äätoshko ga Israel tjëyoga weno jong träk sira llëm Egipto kjokyo.

<sup>18</sup> Eshko ga Egipto so pjluyo poyono oblë, José, e ë miydara llëme.

19 Eshko jek lëkong ga bi tjlapgaga löng kës li jyãpgwara ara, ga bokrotkara ara bakoe. Ichara dbo go ga ba wapga chilawa weno löng jã wleniyo li raye lok, wolon pjir wlo.

20 »Eshko dbaryo ga Moisés weno buk. Chida li wolësowa, ga dara ba data, ba mekerë buk ba ushko moglo mya.

21 E irgo ga rayara ba data, ba mekerë dbo goshko ga wlojrrara pjlu wa walë lirë, ga dara, kuna ba wa baïya wleni.

22 E kjishko ga Moisés, e kuno jem shäng Egipto soppa tjreko, ga pina lok ara, kjok miydë ara Egipto so kägäyoga dik. E domer dbo ara, tjlëga dbo ara bakoe.

23 »Moisés öötong lu pjloglo sak pkëngshko (40) ga wotjlino u ik ba pjeyoga Israel tjeyoga löng lishko.

24 Jek shäng u ikshko ga Egipto so wlëna shäng kjlara, Israel tjeyo shpok kjlara träk llëme. Eni ga tjwlö shira Moisésdë, ga Egipto so li zrörae.

25 Ga wotjlík ga “Ëre goshko ga tja woyotjlíya bor pjeyogarë ga tja iaga Sbörë beno shäng ba dök jüshko dwayo le lok” le. Gueniyo ga e woyotjlína lok llëme.

26 »Wëshko ga Israel tjeyoga wlëna löng do pjök ëngkwë. Woydara ga ber löng wopjlú ëng tjok, ga tjle ba kong ga “¿Pjäy epenga dö ga pjäy ëngkwë ëng tjok ega?” le ba kong.

27 »Eni ga shäng ba kjlara kwë li Moisés poskakza jek jong, ga tjle ba kong ga “¿Pja iaga ërë beno shäng jüshko borwa ichaga, borwa llgwega?”

28 ¿Tja zröp woydë, Egipto so zrörop kjupkeshko sorë ga eni lepdo?” le.

29 Kuya ga töktong, ga to jek Madián kjokyo, ga öötong beno sök eshko, no shto oblë so wleni. E irgo ga wapga do pjök.

30 »Öötong lu pjloglo sak pkëng (40) obi ga dbar kjwara ga Moisés jëk shäng kjok dogro no llëmshko, Sinaí dlupyo jong soshko. Eshko ga Sbö parkaga kjok dogo so weno shäng ba kong, kji sho pjë jong ri ri roshko.

31 Ga Moisés sëya llëm, kji sho pjë jong ri ri li ïna kjïshko. Ïya woydë yötso ga öötong jek shäng soshko ga Sbö tjlë ba kong ga

32 “Tja bop data Sbö. Tja Abraham, Isaac, Jacob, e Sbö bakoe” le. Kuya ga bangkjre ara, dete erä, ga ïya woydë ame.

33 »Eshko ga Tjlapga tjlë ba kong ga “Bop drepkwota kjwe dözong. Klung sho shglëp shäng kjwe iak beno buk dboy bor kong.

34 Bor nopga löng song Egipto kjokyo li ïgör wëllë, kur ga kjloshtë ara, ga tja ter shäng ba döga. Eni ga pja ichër to Egipto kjokyo” le ba kong.

35 »Dënashko ga ba pjeyoga tjlëno Moisés kong ga “¿Pja iaga ërë beno shäng borwa ichaga, borwa llgwegaga?” lara lok ba kong eni. Eni ëmdë ga Sbö parkaga weno shäng ba kong kji sho pjë jong ri ri roshko li ichara Sbörë ba kong, iche ber ba pjeyoga ichaga wlo, ber ba döga wlo bakoe.

36 »Eni ga bi tjlapgaga tek dënashko so shira Egipto kjokyo dwayo. Llëbo ïydëba llëm wleniyo shäryara oblë oblë Egipto kjokyo, Dlung Srëzrën buk lishko, kjok dogro no llëmshko bako, öötong lu pjloglo sak pkëng (40).

37 Domer li tjlëno Israel tjëyoga kong ga “Pjãý kong tjlõkwo laga kjre Sbörë bomi tjrëko kjlara, so tja kjoyoe”\* le.

38 Eni ga Israel tjëyoga löng kjok dogro no llëmshkoshko ga Moisés öör ëng töno Sbö parkaga weno shäng Sinaí dlupyo li tjok. Sbö parkaga li tjlëno ba kong, ga shji jëk sorë tjlõkwoyo li lara ba kong, le bi kong wlo.

39 »Gueniyo ga bi tjlapgaga tek dënashko so, Moisés woydara lok llëm, kolara lok llëm bakoe. Woydara lok ga to Egipto kjokyo iröng obi.

40 Tjlë lok Aarón kong ga “Tjawa kong sböpga jyäglo shäryos pjök mya, tjawa söya wlo, Moisés, bi shiga tek Egipto kjokyo dwayo, e oto miydërwa llëm kjishko” le lok eni.

41 Eni ga sögla wlënggla llgwoklë jyäglo shäryara kjlara. E irgo ga öng zröra, sho sura ba sbö li kong. Ga bë shäryara pjlara, ba sbö shäryara om go li poshrëkklo.

42 »E kjishko ga epga rayara Sbörë, iara beno löng dbala poshrëk shara. E kjishko ga tak beno pjang Sbö tjlõkwo laga tek dënashko so li kjibokwoyo go eni:

»“Israel tjëyoga,  
 ¿pjãý öör löng kjok dogro no llëmshko lu pjloglo  
 sak pkëngshko (40) ga  
 tja kong öng zröromi, sho suromi bor kongde?  
 Llëme.

43 Bomi sbö Moloc syõ uyo li sömirë bomi tjok.  
 Bomi sbö Refán dbalayo jyäglo li söromi bakoe.

\* 7:37 Deuteronomio 18.15.

Llëbo jyãglo shäryoromi om go li, e poshrëmirë  
löng erä.

E kjïshko ga pjäy ichër bomi kjok jÿshko dwayo  
to kjok ko Babilonia pjlor kalëkong.”†

44 »Bi tjlapgaga tek dënashko so löng kjok dogro  
no llëmshkoshko ga Sbö u shäryak öng kwota go li  
jong ba tjok iyado. “E shäryak jyãglo jÿni” lara Sbörë  
Moisés kong, ga shäryara lok eni.

45 Wolono lokshko ga Sbö u li kjrara ba wapgarë  
beno ba kong. Ga shrono tek löng Josué tjok, ga  
nopga kjok jÿshko so zana lokshko ga söya pjang  
ba tjok, tjëyoga oblë oblë kjara Sbörë kjok twe ba  
kong wlo lishko. Eni ga beno jong eshko äär jong  
Pjlu David dbaryo lishko.

46 E ïna Sbörë, ga beno pjlu ba kong. Ga David  
u shäryë woydë kjwara ber jong Jacob Sbö li kong  
wlo le.

47 Miga u li shäryaga beno ba wa Salomöndë.

48 »Eni ëmdë ga miydëy pjlu ga Sbö Tjwlö  
Kësbangyo, e opyë sök u shäryak norë roshko llëm,  
lara Sbö tjlökwö laga tek dënashko so Isaíasdë sorë  
li eni. Tjlëno beno eni:

49 »“Sbö tjlë ga ‘Kjok dogo, e bor pjlu sökkïo wleni,  
ga kjok ëre kjing, e bor kjupkwo shtoyo wleni.  
¿Tja kong u shäryëmi llërba bor kong ga kjwördo?  
¿Bor woshtozlong shtoyo ber jong kjone?

50 ¿Llëbo tjeng kës kjok ëre kjing go kjwe,  
e shäryaga tjarë bor orkwo om go go llëmdo?  
le Sbörë.”‡

51 »Pjäy, llëye kumi woydë llëm, Sbö tjlökwö  
kolëmi woydë llëm bakoe. Pjäy löng Sbö Sëya wloyo

† 7:43 Amós 5.25-27. ‡ 7:50 Isaías 66.1-2.



ĩyado. Pjãý wotjłık lōng bomi tjłapgaga tek dēnashko so ĩ dik.

<sup>52</sup> Sbō tjłōkwo łagaga ichak ba kong kēs li irpjana lok, shdūya wlo. Ęye tjłē shāng no pjlo bek tjwe li kjĩshko ga zrōra loke. Eni ga no pjlo bek li shronoshko ga pjãý opyono beno lōng ba wloyo, tworomi nopga owa kong, ga zrōrabae.

<sup>53</sup> Pjãý kong kjok łlgwekklo tara Moisésdē li, e łaga Sbō parkaga kjok dogo sorē Moisés kong, le bomi kong wlo. Eni gueniyo ga e kolēmi llēme» le.

### *Esteban lōraba, zrōraba ak go*

<sup>54</sup> Kuya lok ga iirkono ara, kowo uē shmēt iirdē Esteban kong.

<sup>55</sup> Gueniyo ga Esteban go Sbō Sēya jlōkoyo. Eni kuzong ga ĩya ga kjok dogo ga Sbō sōk kãłã łletlet, ga Jesús shāng ba zlong bāng, orkwo kēłēkong.

<sup>56</sup> ĩya eni ga tjłē ga «jłĩã! ĩn ga kjok dogo roshwino, ga no to ter kjok dogo dwayo li shāng Sbō zlong bāng orkwo kēłēkong» le.

<sup>57</sup> Gueniyo ga epga kwomgwo bāngzargō jong tuktēng, öö le lok dbo go, ga jek rish ba kjing go tjē jłkong.

<sup>58</sup> Eni ga shira lok kjok eshko dwayo, ga lōra lok ak go, zrōya lok wlo. Eshko ga dwlas shāng kjłara ko Saulo. Esteban rotagaga shwong ter lēkong li skwara lokshko ga e beno shāng shwong li dē.

<sup>59</sup> Lōya lōng ak go wopro ga Esteban syōshtono Jesús kong, tjłē ga «Tjłapga Jesús, bor sēya ěre wlokjrozong» le.

<sup>60</sup> Eni ga kjök torgö sök, ga tjlë dbo go ga «Tjlapga, llëbo owa shärye löng ëre wëyë, kjwepga shdum e kjishko llëme» le. Lara eni pjir ga wolonoe.

## 8

<sup>1-2</sup> Saulo omwoydono eni, Esteban, e zrökko le eni. Jesús tjlökwo kjragaga kjong kjong, shinmo doyo iara to sakshko, ga slatong lok ara ba kjishko.

### *Jesús tjlökwo kjragaga irpjana Saulorë*

Eshko dbaryo jek lëkong ga Jesús tjlökwo kjragaga löng Jerusalén kjokyo li irpjanaba, shdunaba arae. E kjishko ga töktong to lok Judea kjokyo oblë oblë, Samaria kjokyo oblë oblë bakoe. Sbö tjlökwo roy lagaga Jesús äska lira töktong llëme. Epga beno löng Jerusalén kjokyo.

<sup>3</sup> Eshkoshko ga Saulo shäng Jesús tjlökwo kjragaga li irpjang. Opzrëk jek u kjwara kjwara roshko, ga nopga dopshiya domer, walë, iche dbo go jongya no shdüzlong uyo roshko.

### *Jesús roy pjlu li öötong Samaria kjokyo*

<sup>4</sup> Gueniyo ga ëye töktong jek Jerusalén kjokyo dwayo ga beno löng Jesús roy pjlu le kjone pogo, jëk löng kjone ga eshko.

<sup>5</sup> Kjlara jüni ko Felipe. E to jek Samaria kjokyo kësbang nopga arashko ga Cristo ichara Sbörë li roy lara nopga kong,

<sup>6</sup> llëbo ñydëba llëm wleniyo shäryara ba kong bakoe. E kjishko ga nopga tön jong träk llëm, ga llëye le li kuya lok yötsoe.

<sup>7</sup> Eshko ga nopga goshko Ä sëyaga li poptara ara. Sëyaga li opkjë jek ba goshko dwayoshko ga sglük le

erä. Nopga dre kuga llëm wleniyo, nopga jëk llëm wleniyo, e poptara bakoe.

<sup>8</sup> E kjïshko ga kjok eshko ga nopga beno löng wopjlu anmoyõ.

<sup>9</sup> Gueniyo domer shäng kjlara eshko ko Simón. Dënashko ga e oppino shäng ybi, llëbo Ä sëyaga li go ara. Eni ga Samaria sopga jyãpgwara ara, opyono shäng tjwlõ kësbange le eni.

<sup>10</sup> Kuya lok yõtso tjë jïkong, kës-kës chirawa bakoe. Tjlë lok ga «Domer ëre dbo kësbang, Sbõ dik» le lok eni.

<sup>11</sup> Ga epga jyãpgwara lu pjloglo ara ba Ä sëyaga li go kuzong ga ba tjlõkwo kjrara lok.

<sup>12</sup> Gueniyo ga Sbõ ber no pjluoy sorë li roy pjlu, Jesucristo roy pjlu, e lara Feliperë nopga li kongshko ga e kjrara lok, ga wara jer di roshko, domer, walë.

<sup>13</sup> Simón omtjlõkwo kjrono, ga wara bakoe. Eni ga to opyono shäng Felipe yorkë iyado, wojeno to shäng llëbo iydëba llëm wleniyo shärye shäng kësbang oblë oblë li ik.

<sup>14</sup> Ga Samaria sopga beno löng Jesús tjlõkwo kjr-gaga lëba li roy kuya Sbõ tjlõkwo roy lagaga Jesús äska löng Jerusalén kjokyo lirë ga Pedro, Juan, e ichara lok jek eshko.

<sup>15</sup> Öötong löng eshko ga syõshtono Sbõ kong, ba Sëya iche ba tjlõkwo kjr-gaga Samaria so li kong wlo le.

<sup>16</sup> Jesús tjlõkwo kjr-gaga li waraba Tjlapga Jesús ko go tjän, gueniyo go Sbõ Sëya tjwayde ba kong llëm obi.

17 Eni ga Pedro, Juan, e orkwo iono nopga li dlu kjing go, ga ba go Sbö Sëya shrono beno kësbang ba tjok eni.

18-19 Ìya Simóndë ga tjlë Pedro, Juan kong ga «Bomi dbo kësbang kjwe twozĩ ber bor kong, kjwe go ga tja orkwo ië è pogo dlu kjing go, ba go Sbö Sëya tjwe ber ba tjok wlo. Pjãy kong dbur twër kjwe äska» le.

20 Kuya Pedrorë ga tjlë ba kong ga «Llëye tjwlëp woydë li, e twaga Sbörë eröe. E kjĩshko ga bop dbur, e pjir bop tjok.

21 Ìya Sbörë ga pja wotjlk bëy llëme. E kjĩshko ga pja iara beno shäng parkë ba kong borwa tjok llëme.

22-23 Ìn ga pja ymo ara, pja shäng bop wotjlk owa li dbo dorko obi. E kjĩshko ga llëbo owa shäryëp shäng ère, e owa jlöe los, ga rayos, ga pja syöshos Sbö kong. Eni ga owa pjang bop go li löya kjwe» le.

24 Kuya ga tjlë ga «Pjãy syöshos Sbö kong bor kjĩshko, llëbo owa lëmi li tjwe bor kong llëm wlo» le.

25 Eni ga Sbö tjlökwo roy lara lok ara kjok eshko sopga kong. E irgo ga to tek löng iröng, Jesús tjlökwo roy pjlu lara ara kjok shto oblë oblë Samaria kjokyoshko obi, ga shrono tek löng Jerusalén kjokyo iröng obi.

### *Etiopía so wara Feliperë kjlara*

26 E irgo ga Sbö parkaga kjok dogo so tjlë Felipe kong ga «Pja poshäryos, pja jongya irbo jek jong Jerusalén kjokyo äär Gaza kjokyo li go» le. Irbo le li jek jong kjok dogro no llëmshko.

27 Eni ga poshäryono, ga toe. Jek shäng irbo ga domer wlëna jek sök kjlara Etiopía so, e tjlapga tjwlō kësbang, parkë sök dbur tōngga kägäyo, ba pjlu walë Candace kong. Domer, e tek sök Jerusalén kjokyo dwayo, brik shäng Sbö poshrök.

28 Bojono tek sök iröng ba jëkklo go, to ba kjokshko wlo le, ga jek sök kjibokwo tara Sbö tjlökwo laga tek dënashko so Isaíasdë li lë.

29 Eshko ga Sbö Sëya tjlē Felipe kong ga «Pja jëkzong. Pja nom jek jëkklo kjwe zlong bäng» le.

30 Eni ga Felipe jek zron jong öötong ba zlong bäng. Kuya ga sök kjibokwo tara Sbö tjlökwo laga tek dënashko so Isaíasdë li lë ga tjlē ba kong ga «¿Lëp sök kjwe llë loklo miydëpde?»

31 «¿Pjlollgwegä erë bor kong llëm ga miydër sorë?» le ba kong. Eni ga Felipe rokara jem sirkek sök ba tjok ba jëkklo roshko, ga jem öötong sök ba tjok.

32 Tjlökwo le sök li eni:

«E beno shäng kjing erä,

öng wlëp ushko so sökoba, zrökoba wlo wleni.

Kjamo roshwino llëm,

öng wlëp ushko so llgwoklë wleniyo shtëba

lōngshko wleni.

33 Lāywaraba owa, ga llgweraba bek llëme.

¿Shira kjok ëre kjing go dwayo kjishko ga

ba tjëyo tek ber ba irgo li roy laga ber ërë?»\*

34 Eshko ga tjlapga Etiopía so tjlē Felipe kong ga «¿Los bor kong sira ga e ë layde Sbö tjlökwo laga tek dënashko so lirë, oplokdo om gore, de no oblë layde?» le.

---

\* 8:33 Isaías 53.7-8.

35 Eni ga domer li pina Feliperë sök, tak pjang kjibokwo le li dwayo öötong Jesús roy pjlú li go.

36-37 Eni ga jek löng irbo wenzong ga äär di bäng buk kjrina eshko ga domer li tjlë ba kong ga «Jüşko di tjok, ĩzong. ¿Tja wëp kjweshko ga buere?» le.†

38 Eni ga ba jëkklo söga ichara ba jëkklo slong. E irgo ga oplono lok pjöyĩkong dishko, ga domer li wara Feliperë jer di roshko.

39 Opshino tēm di roshko dwayoshko ga Felipe söra Sbö Sëyarë to, ga ĩna domer lirë ame, gueniyo to jek sök wopjlú ba irbo bäng go.

40 Felipera weno shäng Azoto kjokyo, eshko ga jek shäng kjok kjrinishko kjrinishko Jesús tjlökwo roy pjlú lë oba kong äär jong Cesarea kjokyo.

## 9

### *Saulo kjlopswara Jesúsde beno ba tjlökwo kjraga*

1 E wopro ga Saulo shäng Jesús tjlökwo kjrägaga kroyoywë ara, zröya wlo le. E kjishko ga öör shäng syöshtaga kësbangyo ĩk.

2 Ga tjlë ba kong ga «Tja jek woydë Damasco kjokyo. Eshko ga nopga jëk löng Irbo Tjaglën go li wlënor domer, walë kjlobi li shar, ga tek sör jüşko Jerusalén kjokyo, shdüy wlo. E kjishko ga woydër ga tja kong kjibokwo twëp kjwöbö, twër judíoga syö uyo jong kjok eshko li kägäyoga kong, tja kjimte lok

† **8:36-37** Tek dënashko ga kjibokwo ère jyä shiraba oblë oblë ara. Ga kjone kjone tjlë ga «... le. Kuya Feliperë ga tjlë ba kong ga “Pja mär Jesucristo go jlökoyo ga pja wër ga pjlúe” le. Kuya ga tjlë ba kong ga “Woyotjlín ga Jesucristo, e Sbö Wa” le.»

wlo» le. Eni ga kijbokwo twara ba kong, ga jek Damasco kjokyo.

<sup>3</sup> Eni ga jek shäng ääto Damasco kjokyo ga ñya ga iök shjiy ter tjwe kjok dogo dwayo, jek lletllet, ga kopjrina iök shjiy lirë beno pjang pjribrie.

<sup>4</sup> Jekdo eshko ga dgono jer rish buk töshko, ga kuya ga ëbo tjlë ga «Saulo, Saulo, ¿tja irpjam ega?»

<sup>5</sup> «Tjlapga, ¿pja ë?»

«Tja Jesús. Irpjam to shäng wle, e tja.\*

<sup>6</sup> Pja kojös, pja jongya opzrëk jek Damasco kjokyo. Llëye shäryëp wlo li, e lëba bop kong eshko» le ba kong.

<sup>7</sup> Nopga jek löng Saulo tjok li, ëbo tjlëno li kura lok, gueniyo ëye ña lok llëme. E kjishko ga beno löng sëya llëme.

<sup>8</sup> E irgo ga Saulo kojono töshko li dwayo. Bokkwo roshwing ga kjok ñgö llëme. E kjishko ga shara lok ba orkwo go, ga söra to jek Damasco kjokyo.

<sup>9</sup> Beno sök eshko dbargwo mya kjok ñgö llëm, ië llëm, llëye ie llëm bakoe.

<sup>10</sup> Domer sök kjlara Damasco kjokyo ko Ananías. E Jesús tjlokwo kjraga. Eshko ga Tjlapga Jesús weno shäng ba kong yoshko wleni, ga tjlë ba kong ga «Ananías.»

«¿Llë?, Tjlapga» le ba kong.

---

\* **9:5** Tek dënashko ga kijbokwo ëre jyä shiraba oblë oblë ara. Ga kjone kjone tjlë ga «“Tja Jesús. Irpjam to shäng wle, e tja. Llëbo shäryëp shäng kjwe kjang bop kong, tja kolëp llëm ga pja opsrek shäng om goshko” le. Ga bangkjrara Saulorë ara ga tjlë ba kong ga “¿Llëye woydëp ga shäryër?” le. Kuya ga tjlë ba kong ga...»

11 Tjlë ga «Pja nom Judas ushko, e jong irbo kowëba Irbo Pjlo Bek li zlong. Domer sök eshko kjlara ko Saulo, e Tarso so. E sök syöshtë bor kong.

12 Yoïno ga domer shrono shäng kjlara ba shwoy ko Ananías, orkwo ië ba dlu kjing go wlo, kjok ïgö obi wlo» le.

13 Kuya ga tjlë ba kong ga «Tjlapga, nopga ara tjlëno bor kong domer lëp shäng li kjishko. Llëbo owa shäryara ara nopga kjrorop tjeng dboy bop kong löng Jerusalén kjokyo li kong.

14 Ga shrono shäng jüshko, ichaga syöshtaga kägäyogarë tek bop tjlokwo kjragaga söya, shdüya wlo le eni» le ba kong.

15 Gueniyo ga Tjlapga Jesús tjlë ba kong ga «Pja nomo. Domer li, e kjroror, bor roylë oba kong wlo. E ichër jek nopga kjok shto oblë oblë so kong, ba pjlyoga kong, Israel tjëyoga kong bakoe.

16 To shäng song bor kjishko sorë li pin ba kong om go» le.

17 Kuya ga jek öötong shäng Saulo sök lishko, ga opzrëno jek kjër roshko. Öötong shäng ba shwoy ga orkwo iono ba dlu kjing go, ga tjlë ba kong ga «Saulo, pja bor kjlara, Tjlapga Jesús, e weno shäng bop kong irbo, pja tek shäng lishko. Ga tja ichara bop shwoy, pja bokkwo poptër wlo, bop go Sbö Sëya tjwe ber kësbang bop tjok wlo bakoe» le.

18 Jekdo eshko ga Saulo bokkwo kjing go, llëbo löno jer so mã zrërkwa kjoyo, ga bokkwo poptono beno pjlu iröng obi. E irgo ga kojono, ga wara Ananíasdë jer di roshko.

19 Eni ga iono pjir ga dbokjrono obi.

*Saulo Jesús roy lono Damasco kjokyo*



E irgo ga beno sök eshko dbar kjwöböso, Jesús tjlökwo kfragaga löng eshko li tjok.

<sup>20</sup> Eshko ga öötong shäng judíoga syō uyo oblē oblē roshko, ga tjlē oba kong ga «Jesús, e Sbō Wa jlōe» le to shäng enido.

<sup>21</sup> Nopga löng ba kuk kēs li beno löng yēy le erä, tjlē lok èng kong ga «Domer kjwe sök Jerusalén kjokyosho ga to shäng Jesús tjlökwo kfragaga irp-jang. Ga shrono tek shäng èreshko epga shak, söya jongya twe syōshtaga kägäyoga kong wlo. ¿Kjwe e llēmdo?» le lok èng kong eni.

<sup>22</sup> Gueniyo Saulo tjlē shäng oba kongshko ga tjlē dbo ara jek kègong kègong anmoyō. Pīya oba kong wēlē ga bi pjluyo iche le Sbörē li, e Jesús jlōe. Kuya judíoga kjok eshko so lirē ga beno löng kjing erä, dborye lok sorē miyde löng llēme.

<sup>23</sup> Dbar kop ara ga judíoga tōno löng, ga beno wotjlik kjrinaso, Saulo zrōya wlo le eni.

<sup>24</sup> Ga Damasco kjokyo kjeryo shäryak ak go pjribri kjókshko ga u bäng bäng tjeng pjök mya, nopga opshik kjok eshko dwayo wlo. Eshko ga u bäng dagaga iara lok beno löng eshko shkē dba, Saulo opshik leshko ga shaya, zrōya wlo le eni. Gueniyo ga miydara Saulorē pjire.

<sup>25</sup> E kjīshko ga kjok shkē ga lona ba oppinggagarē jer kjēr li poglo go pjlör kalèkong, shing kèsbang roshko. Eni ga dōktong toe.

### *Saulo shrono shäng iröng obi Jerusalén kjokyo*

<sup>26</sup> E irgo ga Saulo shrono tek shäng iröng Jerusalén kjokyo ga tön Jesús tjlökwo kfragaga tjeng eshko li tjok lara, gueniyo bangkjrara lok

ara, wotjlik lok ga «E kjlopswono beno shäng Jesús tjlökwö kjraga llême» le.

<sup>27</sup> Gueniyo shäng eshko kjlara ko Bernabé. Ga Saulo söra jek Sbö tjlökwö roy lagaga Jesús äska löng li shwoy. Ga Saulo, e Jesús ñno irbo jek shängshko soré li, e läywara ba kong, Jesús tjläno ba kong li kura le eni, ga shäng Damasco kjokyo lishko ga tjläno Jesús kjishko ara, lléye bangkjrara llême le Bernabéré ba kong lok eni bakoe.

<sup>28</sup> Eni ga Saulo beno sök ba tjok Jerusalén kjokyo, ga jek shäng ba tjok, tjläno Jesús kjishko ara kjone pogo, lléye bangkjrara llême.

<sup>29</sup> Tjlé ara, tjlökwö kjlopswé kar kar judíoga tjlä Grecia sopga tjlökwö wleniyo löng li tjok. Gueniyo zröya wlo le lok eni.

<sup>30</sup> Kuya Jesús tjlökwö kjragagaré ga söra jek Cesearea kjokyo, e irgo ga ichara lok jek Tarso kjokyo.

<sup>31</sup> Eshko ga Jesús tjlökwö kjragaga löng Judea kjokyo, Galilea kjokyo, Samaria kjokyo, e beno löng wopjlú, barwëba ara llême. Ga tön jek kégong kégong, opping lok jek kégong kégong bakoe. Sbö bangkjre lok ara, ga epga kjimte Sbö Sëyaré ara bakoe.

### *Eneas poptara Pedroré*

<sup>32</sup> Pjlara ga Pedro to shäng kjok shto oblé oblëshko ga jek Sbö nopga löng Lida kjokyo li ik.

<sup>33</sup> Eshko ga domer wlëna buk kjlara ko Eneas, öötong lu pjloglo kjwong (8) ga dre kuga llëm, buk töshko ba bukklo kjing go erä.

<sup>34</sup> İya Pedroré ga tjlä ba kong ga «Eneas, pja popte Jesucristoré. Pja kojös, bop bukklo kjwe tözong» le. Jekdo eshko ga kojongö shäng erä.

<sup>35</sup> Īya Lida sopga, Sarón sopgarë ga kjłopswono beno Tjlapga Jesús tjłkwo kjraga.

*Dorcas woshara Pedrorë iröng obi*

<sup>36-38</sup> Kjøk buk kjrina Lida kjokyo soshko ko Jope. Eshko ga Jesús tjłkwo kjraga sök kjlara walë ko Tabita, lëy Grecia so tjłkwo go ga Dorcas. Walë li jëk to shäng llëbo shäryë oba kong pjłú ĩyado, oba song wleniyo kjimte ara bakoe. Pedro sök Lida kjokyoshko ga Dorcas shara swlorë, ga wolonoe. Ga shinmo doyo waraba pjir ga iaraba buk kjomo, kjër jong kjwara roshko. Kuya Jesús tjłkwo kjragagarë ga Pedro shäng soshko Lida kjokyo lëba ga domerga ichara lok do pjök ba rokë. Öötong löng ba shwoy ga tjłë ba kong ga «Pja jek borwa tjok malinge» le.

<sup>39</sup> Kuya ga to jek ba tjok. Öötong shäng eshko ga söra lok jem shinmo doyo buk lishko. Eshko ga syäpga kës li töno löng slar ëë, ga tek shrono löng Pedro zlong bäng. Dorcas sök së obishko ga shwong sera, twara ba kong lok li pina Pedro kong, ĩya wlo.

<sup>40</sup> Eshko ga löng eshko li ichara Pedrorë uunkong jek kjoko. E irgo ga kjök torgö sök, ga syöshtono Sbö kong. E irgo ga bojongö sök shinmo shwo lëkong, ga ĩya ga tjłë ga «Tabita, pja kojözong» le ba kong, ga buk li bokkwo roshwinoe. Pedro ĩya ga kojongö sök.

<sup>41</sup> Eshko ga sök li orkwo shakza pjä, ga kojonga shäng. E irgo ga Jesús tjłkwo kjragaga, syäpga li rokara, ga opzrëno jek löng kjër roy. Eshko ga Pedro tjłë ba kong ga «Tabita shäng së obi. Īzĩa» le.

42 Shinmo woshrara Pedrorë iröng obi roy shdöktong Jope kjokyo kjok kjwang jikong, ga nopga ara mär beno löng Tjlapga Jesús go.

43 Domer sök kjok eshko kjlara ko Simón, e llëbo shäryaga öng kwota go. Eshko ga Pedro beno sök Jope kjokyo dbar kop ara Simón ushko.

## 10

### *Pedro, Cornelio*

1 Cesarea kjokyoshko ga domer sök kjlara ko Cornelio, e ëngkjwaga kägäyo. Tjwe Italia kjokyo dwayo, parkë sök Cesarea kjokyo, ga ba ëngkjwagaga kowëba Italia sopga.

2 Domer, e Sbö poshrëk shäng enido wleniyo, ba pjeyoga löng ba ushko li eni bakoe. Ga dbur twe ara judíoga song, llëye llëm wleniyo kong ba kjimtoklo, ga syöshtë Sbö kong ÿyado.

3 Dbar kjwara dlo töy wleni ga ëbo ñna wëllë gueniyo shji yoïno wleni. Eshko ga Sbö parkaga kjok dogo so weno shäng ba kong kjlara, ga tjlä ba kong ga «Cornelio» le.

4 ÿya ga beno shäng sëya llëm, ÿya beno shäng drëng erä. Eshko ga tjlä ba kong ga «¿Llë?, Tjlapga.»

«Bop syökwo li kura Sbörë, ga bop dbur tworop oba song wleniyo kjimtoklo li ñna. E kjishko ga Sbö beno wopjlú bop tjok. Llëye shäryorop uunkong li, e beno ba kong ba sëngglo wleni.

5-6 No ichos kjlara jek Jope kjokyo. Domer sök kjlara eshko ko Simón, kowëba Pedro bakoe. E sök Simón oblë, llëbo shäryaga öng kwota go wleniyo, e ushko. U li jong dlung kjako. Simón Pedro li rokos tek jüshko bop shwoy» le ba kong,

<sup>7</sup> ga to jek ey dwayo.

E irgo ga ba parkagaga rokara Corneliorë tek do pjök, ba ëngkjwaga kjlara tjok. Ba ëngkjwaga li Sbö bangkjre ara, ga parkë shäng Cornelio tjok ïyado.

<sup>8</sup> Llëye shäryono ba tjok kës'li'lara ba kong pjir, ga ichara to jek Jope kjokyo.

<sup>9</sup> Wëshko dlo dluw dik ga epga jek'löng irbo bäng ääto Jope kjokyoshko ga Pedro jem sök ba u dbo kjing sdok'li kjing go, syöshtë wlo'le.

<sup>10</sup> Eshko ga pjli ara, ië woydë, ga kong dli shäryëba u roshko wopro ga llëbo ïna, gueniyo shji yoïno wleni.

<sup>11</sup> Eshko ga kjok dogo ïya jem drëng ga döktong beno jong ojong, ga llëbo ter tjwe pjang kjok dogo dwayo so kjinyoklo kjoyo, kjarbo kjrochak kjringgwo pkëng (4) beno pjang poglo kjoyo, lono ter pjang töshko.

<sup>12</sup> Roshko tjeng öng, äya kjloshko so, sënwa, llëbo uako wleniyo oblë oblë, llëbo uako llëm wleniyo oblë oblë bakoe.

<sup>13</sup> Eni ga ëbo ybö kura pjlara, tjlä ba kong ga «Pedro, pja kojözong. Kjwe zrös, ga uozong» le.

<sup>14</sup> Kuya ga tjlä ga «Llëme, Tjlapga. Llëbo uako llëm wleniyo, e uotë llëme» le.

<sup>15</sup> Eshko ga ybö'li kura jek pjlara obi, tjlä ba kong ga «Llëye iara Sbörë beno pjlu ba kong wlo'li, e owa lep llëme» le.

<sup>16</sup> Shäryono eni pjloglo mya. E irgo ga kjinyoklo kjoyo'li poyono jem kjok dogo iröng obi.

<sup>17</sup> Eshko ga Pedro beno sök wotjlik ara, woydë buke. Llëye ïna, kura'li llë'loklo woyotjlïya ara.

E wopro ga domerga ichara Corneliorë li öötong löng u'li wlëk, ga kjimtaraba sira, ga wlënae. Öötong löng Simón ushko ga

<sup>18</sup> tjlëno lok dbo go, tjlë ga «Simón, ¿domer kowëba Pedro li sök jūshkore?» le.

<sup>19</sup> Eni ga Pedro shäng wotjlík llëbo ñna, kura li kjïy obishko ga Sbö Sëya tjlë ba kong ga «Simón, tja kuzong. Domerga tjwe löng bop wlëk doglo mya.

<sup>20</sup> Pja kojös, pja oplös jer dew ba ñk. Pja jek ba tjok, ga “Tja jek llëme” lëp llëm, epga ichaga tjarë kjïshko» le.

<sup>21</sup> Kuya ga jer oplono töshko, tjlë domerga shrono löng li kong ga «Wlëmi löng li tja. ¿Pjã to löng llë?»

<sup>22</sup> «Tjawa ichaga ëngkjwaga kägäyo ko Corneliorë. Domer, e pjlo bek, Sbö poshrëk shäng enido wleniyo, roy pjlú judíoga kong, woyde lok pjlú tjë jïkong. Kjupke ga Sbö parkaga kjok dogo so weno shäng ba kong kjlara, ga ichara bop wlëk, pja jek ba shwoy wlo, llëye lëp li kuya wlo» le ba kong.

<sup>23</sup> Kuya ga epga rokara jek kjër roshko, ga e shkëyo ga beno löng ba tjok eshko. Wëshko ga Pedro to jek ba tjok, ga Jesús tjlökwo kragaga löng eshko Jope kjokyo li kjong kjong jek ba tjok bebi.

<sup>24</sup> Kjöshko ga jek öötong löng Cesarea kjokyo, koshe Corneliorë sök lishko. Eshko ga ba pjeyoga tona löng ba tjok, oba oblë ba miydë pjlú wleniyo mana beno löng ba tjok eshko bakoe.

<sup>25</sup> Pedro öötong shäng ba ushkoshko ga Cornelio opshik tek tjwe shäng ba wlojkrë, ga kjök torgö, kjujongö sök ba dre zlong, Pedro poshrëk wlo lara.

<sup>26</sup> Gueniyo Pedro tjlě ba kong ga «¡Pja kojžong! Tja no, so pja kjoyo eröe» le.

<sup>27</sup> Shänglan ba tjok wopro ga opzřeno jek ba tjok u roshko, ga ĩna ga oba tōno tjeng ara eshko.

<sup>28</sup> Eshko ga tjlě ba kong lok ga «Miydēmi pjlú ga tjawa judíoga borwa kjok ĩlgwekklo go ga tjawa tōn nopga judío ĩlēm wleniyo tjok ĩlēm, tjawa äär ba ushko ĩlēm bakoe. Gueniyo ga tja pina Sbörē ga ěye iara beno pjlú ba kong wlo li, e owa lēr ĩlēme.

<sup>29</sup> E kjĩshko ga tja rokoromishko ga tja to tek maling bomi shwoy, ĩlěye loror eshko ĩlēme. Eni ga tja rokoromi ĩlěno miydēr woýdē» le.

<sup>30</sup> Kuya Corneliorē ga tjlě ba kong ga «Eeri ga öötong dbargwo pkēng (4), kjok eni ga tja sök syōshhtë bor ushko,\* shäryēr dlo tōy enido wleni. Eshko ga domer weno shäng kjlara bor bokshto, shwong kǎǎ shjiye.

<sup>31</sup> Ga tjlě bor kong ga “Bop syōkwo li kura Sbörē, ga oba song wleniyo kjimtorop sorē li ĩna.

<sup>32</sup> No ichos kjlara jek Jope kjokyo. Domer sök eshko kjlara ko Simón, kowēba Pedro bakoe. E sök Simón oblē, ĩlěbo shäryaga öng kwota go wleniyo ushko. U li jong dlung kjako. Simón Pedro li rokos tek jũshko bop shwoy” le.

<sup>33</sup> »Eni ga nopga ichoror jekdo bop wlokjrē, ga pja opshäryono pjlú, pja to tek. Eni ga tjawa löng jũshko tjē jĩkong Sbō bokso, ĩlěye lara bop kong li lēp borwa kong, kurwa wlo» le.

---

\* **10:30** Tek dēnashko ga kjibokwo ěre jyā shiraba oblē oblē ara. Ga kjone kjone tjlě ga «Eeri ga öötong dbargwo pkēng (4), kjok eni ga tja sök syōshhtë bor ushko, ga tja iē ĩlēm Sbō kong, shäryēr dlo tōy enido wleni.»

<sup>34</sup> Kuya ga tjlë ba kong lok ga «Era miydër kjwlë ga shji tjëyoga oblë oblë woyde Sbörë uunkong, shji ber tjeng dboy dboy ame.

<sup>35</sup> Eni ga nopga kjok shto oblë oblë so ë pogo ba bangkjirë, llëbo pjlo bek li shäryë wleni ga wlokjre Sbörë uunkong.

<sup>36</sup> Sbö tjlökwo ichono Israel tjëyoga kong, tjlë ga nopga uunkong pjluoy li, e Jesucristo, ga ba kjishko ga shji ber löng wlëp Sbö tjok ga pjluë.

<sup>37</sup> »Llëye shäryono Judea kjokyo kjok kjwang jikong li, e miydëmi pjire. Bäm go ga domer weno shäng kjlara Galilea kjokyo ko Juan, tjlë ga “Woyde Sbörë ga shji wëba jer di roshko” le eni.

<sup>38</sup> E irgo ga Jesús, Nazaret so li weno shäng Galilea kjokyo. Go Sbö Sëya ichara Sbörë shrono beno kësbang ba tjok, ga kong dbo twara kësbange. Sbö shäng ba tjok kjishko ga to jek shäng llëbo pjlu shäryë, ga nopga tjeng Ä wloshko li poptara uunkong.

<sup>39</sup> Llëbo shäryara Jesúsdë ara Judea kjokyo, Jerusalén kjokyo bakoe. Ga tjawa beno löng e ñorwa jlëe laga.

»Llëbo shäryara kës li irgo ga löraba pjang kjlës go, ga zrörabae.

<sup>40</sup> Gueniyo öötong dbargwo mya ga woshrara Sbörë iröng obi, ga pina borwa kong, ñnwa wlo.

<sup>41</sup> Gueniyo ga pina oba uunkong kong llëm, ëye kjrara Sbörë ber e ñorwa jlëe laga li kong eröe. Woshrara Sbörë iröng obi irgo ga tjawa iono ba tjok.

<sup>42</sup> »Tjawa ichara llëye ñorwa li roy lë oba kong, Jesús iara Sbörë beno nopga löng sëre, wolonore,



e ilgwega lë oba kong bakoe.

<sup>43</sup> Tek dënashko ga Sbö tjlökwo lagaga löng kës li tjlëno ba kjishko. Tjlë ga ëye mär ba go ga owa pjang ba go li löya Sbörë ber dret Jesús kjishko» le.

<sup>44</sup> Pedro shäng tjlë obishko ga nopga löng kës tjlökwo kuga li go Sbö Sëya shrono beno kësbang ba tjok.

<sup>45-46</sup> Eni ga tjlë löng kjok shto oblë oblë so tjlökwo, ga Sbö poshrëya lok ara. Kuya Jesús tjlökwo kjrägaga judíoga tek löng Pedro tjok lirë ga beno löng yëy le erä, ba Sëya twara Sbörë nopga judío llëm wleniyo kong bako kjishko.

<sup>47</sup> Eni ga Pedro tjlë judíoga li kong ga «Nopga kjwe go Sbö Sëya shrono ba kong, shrono bi kong dik bakoe. ¿Eni ga wëy ga ä laga ërë?» le.

<sup>48</sup> Eni ga Jesús tjlökwo kjrägaga judío llëm wleniyo li rokara Pedrorë tek ba shwoy, we Jesu-cristo ko goshko wlo. Ga rokara lok Pedro kong ga ber sök ba tjok eshko dbar kjwöböso guing le.

## 11

*Pedro lano Jesús tjlökwo kjrägaga löng Jerusalén kjokyo tjok*

<sup>1</sup> Eshko ga nopga judío llëm wleniyo Sbö tjlökwo kjrono li roy öötong Sbö tjlökwo roy lagaga Jesús äska kong, Jesús tjlökwo kjrägaga obi löng Judea kjokyo uunkong li kong bakoe.

<sup>2</sup> E irgo ga Pedro shrono shäng iröng Jerusalén kjokyoshko ga Jesús tjlökwo kjrägaga judío wleniyo kjong kjong iirkë lok ara ba kong,

<sup>3</sup> ga tjlë ba kong ga «¿Pja öör nopga judío llëm wleniyo shwoy llëno? ¿Pja iono ba tjok ega?» le.

<sup>4</sup> Kuya ga llëye shäryono ba tjok tek dämärshko li lara ba kong pjire. Tjlë ba kong ga

<sup>5</sup> «Tja sök Jope kjokyo obishko ga tja sök syöshhtë wopro ga llëbo ñnor wëlä, gueniyo shji yoïno wleni. Eshko ga kjok dogo ñn ga döktong beno jong oo-jong, ga llëbo ter tjwe pjang kjok dogo dwayo so kjinyoklo kjoyo, kjarbo kjrochak kjringsgwo pkëng (4) beno pjang poglo kjoyo, lono ter pjang töshko, tja sök lishko.

<sup>6</sup> Ga roñnor yötso, ga ñn ga roshko tjeng öng, äya kjloshko so, sënwa, llëbo uako wleniyo oblë oblë, llëbo uako llëm wleniyo oblë oblë bakoe.

<sup>7</sup> Eni ga ëbo ybö kuror pjlara, tjlä bor kong ga “Pedro, pja kojözong. Kjwe zrös, ga uozong” le.

<sup>8</sup> »Kur ga tja tjlä ga “Llëme, Tjlapga. Llëbo uako llëm wleniyo, e uotë llëme” lër.

<sup>9</sup> »Eshko ga ybö li kuror jek pjlara obi, tjlä bor kong ga “Llëye iara Sbörë beno pjlu ba kong wlo li, e owa lep llëme” le.

<sup>10</sup> »Shäryono eni pjloglo mya. E irgo ga kjinyoklo kjoyo li poyono jem kjok dogo iröng obi.

<sup>11</sup> »Jekdo eshko ga domerga shrono löng doglo mya eshko, ichara Cesarea kjokyo dwayo bor wlokjrë.

<sup>12</sup> Eshko ga Sbö Sëya tjlä bor kong ga “Pja jek domerga shrono löng li tjok. Llëye woyotjlip guing llëme” le. Eni ga bi pjeyoga tjeng doglo tjer (6) ëre to jek bor tjok.

»Tjawa öötong löng Cesarea kjokyoshko ga domer wlënorwa sök kjlara ba ushko.

<sup>13</sup> Ga domer li tjlä borwa kong ga “Sbö parkaga kjok dogo so weno shäng kjlara bor kong, ga tjlä

bor kong ga ‘No ichos kjlara Jope kjokyo. Domer sök eshko kjlara ko Simón, kowëba Pedro bakoe. Rokos tek jüşhko bop shwoy.

<sup>14</sup> Eshko ga tjlökwö le bomi kong, pja döya Sbörë e go wlo, bomi pjeyoga löng bomi ushko uunkong li döya wlo bakoe’ le bor kong eni” le.

<sup>15</sup> »Tja shäng lan ba tjok lok kjwlë ga ba go Sbö Sëya shrono beno kësbang ba tjok, shrono bi kong dämärshko dik bakoe.

<sup>16</sup> Eshko ga tjlökwö lara Tjlapga Jesúsdë li woyoshrër kjwlë já. Tjlëno ga “Juan, e no wono di goshko. Gueniyo dbar kjwöbö obi ga pjây go Sbö Sëya iche Sbörë tjwe ber kësbang bomi tjok” lara eni.

<sup>17</sup> Dämärshko ga shji mär Tjlapga Jesucristo go ère kong ba Sëya twara Sbörë. Eshko ga twara nopga e kong eni bakoe. Eni kuzong ga eni llëme lër ga äe» le.

<sup>18</sup> Kuya lok ga llëye lara ame. Ga Sbö poshrëra lok ara, tjlä ga «Nopga judío llëm wleniyo ëmdë ga kjimtara Sbörë. Llëbo owa shärye löng li, e owa jlöe lara, ga rayara, ga epga ber löng së ñyado Sbö tjok» le.

### *Jesús tjlökwö kjpgaga löng Antioquía kjokyo*

<sup>19</sup> Esteban zröraba irgo ga Jesús tjlökwö kjpgaga löng eshko, e irpjanaba bakoe. Ga epga töktong to Fenicia kjokyo, Chipre kjokyo, Antioquía kjokyo bakoe. Kjong kjong öötong löng kjok shto oblë oblëshko ga Jesús roy pjlú lara oba kong, gueniyo judíoga kong eröe.

<sup>20</sup> Gueniyo Jesús tjlökwö kjpgaga Chipre so, Cirene so löng Jerusalén kjokyo kjong kjong lira

töktong to jongya Antioquía kjokyo. Öötong löng eshko ga Tjlapga Jesús roy pjlú lara nopga judío llëm wleniyo kong bakoe.

<sup>21</sup> Eshko ga ba tjlökwo lagaga li kjimtara Tjlapga Sbörë ara. Eni ga kjok eshko sopga ara, ba tjlökwo tek dënashko dwayo kole löng li, e rayara pjir, ga mär beno löng Tjlapga Jesús go shara.

<sup>22</sup> Roy kuya tjlökwo kragaga löng Jerusalén kjokyo lirë ga Bernabé ichara lok to Antioquía kjokyo.

<sup>23</sup> Öötong shäng eshko ga ñya ga epga kjimte Sbörë shäng, ga beno shäng wopjlúe. Eshko ga epga poshduna uunkong, tjlē ga «Pjãy mär ber löng Tjlapga Jesús go eröe» le.

<sup>24</sup> Bernabé, e domer pjlúe. E go Sbö Sëya jlökoyo, ga mär shäng Sbö go eröe. Eni ga nopga ara kjimtara mär Tjlapga Jesús go.

<sup>25</sup> E irgo ga Bernabé to jek shäng Tarso kjokyo, Saulo wlēk.

<sup>26</sup> Wlënashko ga söra to Antioquía kjokyo, ga beno löng eshko lu pjlara. Eshkoshko ga Jesús tjlökwo kragaga pina lok ara. Eshko ga Jesús tjlökwo kragaga kowëba Cristo nopga. Kowaraba eni bäm go eshko Antioquía kjokyo.

<sup>27</sup> Eshko dbaryo ga Sbö tjlökwo lagaga ba pjeyoga kong opshino kjlöbö to Jerusalén kjokyo dwayo jek öötong löng Antioquía kjokyo.

<sup>28-30</sup> Kjlara ko Agabo. Eshko ga e kojono shäng, ga tjlē oba kong ga «Pjli tjwe ara kjok kjwang jikong» le. E miydara Sbö Sëya go.

Eni ga Jesús tjlökwo kragaga löng Antioquía kjokyo li wotjlino lok ba pjeyoga Jesús tjlökwo

kjraga löng Judea kjokyo li kjimtë. Tjlë lok ëng kong ga «Llëye twëy ga bue ga twëy» le. Ga kjimtara lok eni. Dbur töna li twara lok Bernabé, Saulo kong, ga söra lok, twara tjlapgaga Jesús tjlökwo kjraga kägäyo löng Judea kjokyo li kong.

(Claudio sök pjlü kësbangyo dbaryoshko ga pjlilara li shrono ara jlõe.)

## 12

### *Jesús tjlökwo kjragaga shduna Herodesdë*

<sup>1</sup> Eshko dbaryo ga Jerusalén so pjluyo ko Herodes. Eshko ga Jesús tjlökwo kjragaga kjong kjong irpjana, shdüya wlo.

<sup>2</sup> Ga nopga ichara Santiago zrök dröng go, ga zrörae. Santiago, e Juan kjlarayo.

<sup>3</sup> Roy kuya judiógarë ga beno löng wopjlúe. E kjishko ga pjlung shosho suk pjir shäryak ba uukklo tjok llëm dbaryoshko ga nopga ichara Herodesdë Pedro shak bakoe.

<sup>4</sup> Shara lok irgo ga ichara Herodesdë no shdüzlong uyo roshko. Ba dagaga löng eshko kjrिंगwo pkëng (4), kjrina kjrina noyo doglo pkëng (4). Herodes wotjlino ga söya, llgweya oba boksho dbar shrëzlong irgo jä lara.

<sup>5</sup> Eni ga Pedro buk kjërshko dak dak lë yötso, gueniyo ga Jesús tjlökwo kjragaga löng syöshtë dbo ara Sbö kong Pedro kjishko.

### *Pedro shira Sbörë no shdüzlong uyo roshko dwayo*

<sup>6</sup> «Shir bong jä» lara Herodesdë li shkëyoshko ga Pedro buk pë no dagaga tjeng do pjök tjërko, orkwo

kjrochak kar kar dröng sho go, ga no dagaga llamo li löng kégong sit u bäng lishko ba dë.

<sup>7</sup> Eshko ga Tjlapga parkaga kjok dogo so weno shäng kjlara eshko, ga no shdüzlong uyo roshko iök weno pjang kjwara shjiye. Eshko ga Pedro porwara, ga wollena, ga tjlē ba kong ga «Pja kojös malinge» le. Jekdo eshko ga dröng sho ba pjrikklo lok ba orkwo go jek lön kjlulu erä.

<sup>8</sup> Eshko ga tjlē ba kong obi ga «Bop shwong kop lëkong kjwe pjüzong. Bop drepkwota kjwe zrëzong» le, ga shäryara eni. Eshko ga tjlē ba kong jek obi ga «Pja popgos bop shwong ter lëkong kjwe go, ga pja tek bor irgo» le.

<sup>9</sup> Kuya ga opshino jek ba irgo, gueniyo wotjlīk ga «¿Tja yoīkdo?» le.

<sup>10</sup> Gueniyo jek löng äär no dagaga löng bäm lishko ga döktong lok jek, ga jek kjwara obi ga döktong jek eni bakoe. E irgo ga äär jong no shdüzlong uyo u bäng bängzak jong dröng sho go lishko ga u bäng li döktong jek wles om go erä. Eni ga opshino jek lok kjoko. Jëktong lok wop tjokshko ga Pedro rayara Sbö parkaga lirë, ga beno shäng tjoksa.

<sup>11</sup> Eshko ga woshre kjlay, ga tjlē ga «Era miydër jlökoyo ga Tjlapga, ba parkaga kjok dogo so ichara bor kong, tja döya Herodes wloshko dwayo wlo, llëye shärye woydë judiogarë bor tjok li wen bor kong llëm wlo» le.

<sup>12</sup> Miydara pjir eni ga to jek María ushko, María, e Juan mekë, Juan, e kowëba Marcos bakoe. Eshko ga Jesús tjlokwo kjragaga töno löng syöshtë arae.

<sup>13</sup> Öötong shäng eshko ga u bäng bäng yora kjöw kjöw kjoko dwayo.

Kjoglo shäng parkë eshko kjlara ko Rode, e jek ba ïk, e ë ïya wlo'le.

<sup>14</sup> Kura ga Pedro ybö. Zok ga u bäng li döra ba kong, gueniyo woowa llëm kjishko ga jek llet kjër roshko iröng ba rotë nopga tjeng syöshtë li kong. Tjlë ba kong ga «¿Pedro shäng kjoko!» le.

<sup>15</sup> Kuya lok ga tjlä ba kong ga «¿Pja skwëre llëro?» «Llëme. Jlä» le ba kong eni.

Eni ga tjlä lok ba kong ga «E Pedro llëme. E ba daga Sbö parkaga kjok dogo so» le.

<sup>16</sup> E wopro ga Pedro shäng u bäng bäng yok kjöw kjöw kjoko obi. Eni ga u bäng li döra lok, ga ïya ga bë shäng, ga beno löng sëya llëme.

<sup>17</sup> Gueniyo Pedro orkwo poyono, pjäy kjinko-zong loklo wleni, ga shira Sbörë no shdüzlöng uyo roshko dwayo sorë li roy lara ba kong pjire. Pjir ga tjlä ba kong lok ga «Llëye shäryono bor kong li roy lëmi Santiago\* kong, bi pjeyoga Jesús tjläkwo kjruga llamo li kong bakoe» le. E irgo ga opshino to jek kjok shto oblë.

<sup>18</sup> Wëshko kjok shröng ga no dagaga li shdöktong pjang träk llëm no shdüzlöng uyo roshko. Tjlë lok ëng kong ga «¿Pedro li oto, kjwono llong?» le.

<sup>19</sup> E irgo ga llëye weno Pedro kong li kjakrokara Herodesdë ba dagaga li kong. Kjakrokara pjir ga tjlä ba kong ga «Miydaga ber pjäydë» le, ga nopga ichara ba zrök uunkong.

---

\* **12:17 Santiago** le li, e **Jesús lëng**. E parkë sök Jesús tjläkwo kjruga löng Jerusalén kjokyo kägäyo.

E irgo ga Herodes opshino to Judea kjokyo dwayo jek öötong shäng Cesarea kjokyo, ga beno sök eshko dbar kjwöböso.

### *Herodes wolonoe*

<sup>20</sup> Eshko dbaryo ga Tiro sopga, Sidón sopga, e mär löng dli tjwlëk Pjlu Herodes kjokyo li go eröe. Gueniyo Herodes iirkë sök ba kong ara. E kjishko ga epga wotjlino lok kjrinaso ëng tjok jek Herodes ik Cesarea kjokyo.

Domer shäng kjlara ko Blasto. E parkë sök Herodes dboryaga. Tiro sopga, Sidón sopga, e öör jong ba ikshko ga tjlä lok ba kong ga «Woydërwa ga Herodes ber wopjlu borwa tjok. E kjishko ga tjawa lan woydë ba tjok» le.

Kuya ga «jölö» le ba kong,

<sup>21</sup> ga dbar iara beno kjwara, Herodes iya lok wlo.

Dbar li öötongshko ga Herodes doyono sök ba pjlu shwongyo go, pjuna pjang ga sirkeno sök nopga bokshto ba pjlu sökklo kjing go, ga tjläno aräe.

<sup>22</sup> Kuya lok ga öö le lok tjë jikong, tjlä lok ga «i Tjlä sök kjwe, domer li tjläkdo llëme! i Kjwe sbö!» le.

<sup>23</sup> Eshko ga «Sbö poshrëmirë dey» lara ba kong lok llëm kjishko ga jekdo eshko ga Sbö parkaga kjok dogo so, Herodes iara beno sök swlo ara. Eni ga wolono to uaga shjuskrorë, ba shdungglo.

<sup>24</sup> E irgo ga Jesús tjlökwö kjrägaga tön jek këgong këgong, ga Sbö tjlökwö shdär jong llaw pogo.

*Pablo, Bernabé, e kjrara Sbö Sëyarë, ba pak shäryë wlo*

<sup>25</sup> Bernabé, Saulo, ba pak shäryara lok pjir Jerusalén kjokyo shko ga opshino to lok ey dwayo,



öötong löng Antioquía kjokyo iröng obi, ga Juan söra lok jek ba tjok bakoe. Juan, e kowëba Marcos bakoe.

## 13

<sup>1</sup> Antioquía kjokyo ga Jesús tjlökwo kjragaga löng eshko li tjrëko Sbö tjlökwo lagaga wleniyo löng kjlöbö, no pinggaga Sbö tjlökwo go wleniyo löng kjlöbö bakoe. Kjlara ko Bernabé; kjlara ko Simón, e kowëba Kjlo Sî; kjlara ko Lucio, e Cirene so; kjlara ko Manaén, e kuno shäng Galilea so pjluyo Herodes tjok; kjlara obi ko Saulo.

<sup>2</sup> Eni dbar kjwara ga Jesús tjlökwo kjragaga li töno löng Sbö poshrék, ië llëm ba kong bakoe. Eshko ga Sbö Sëya tjlë ba kong ga «Bernabé, Saulo, e rokoror pak shäryë bor kong wlo. Eni ga kjozi ber tjeng dboy bor kong, pak li shärye lok wlo» le.

<sup>3</sup> Kuya lok ga shäryara eni. Jek löng syöshtë obi, ga ië llëm bakoe. E irgo ga orkwo iono lok domerga do pjök li dlu kjing go, ber löng parkë Sbö kong li loklo, ga ichara lok to parkë Sbö kong.

### *Saulo, Bernabé, e löng dlung tjrëko ko Chipre*

<sup>4</sup> Eshko ga Saulo, Bernabé, e ichara Sbö Sëyarë jek äär jong Seleucia kjokyo, dlung kjako. Eshko ga opyono jek lok kjoyong kësbang roy, jek öötong pjono löng dlung tjrëko ko Chipre.

<sup>5</sup> Eshko ga kjoyong tjyozlong kjokyo buk kjrina ko Salamina. Eshko ga opshino kjoyong roy dwayo, ga jek öötong löng judíoga syõ uyo lok eshko oblë oblë li roshko. Eshko ga Sbö tjlökwo lara lok oba kong. Juan jek shäng ba tjok bebi, ba kjimtaga wleni.

<sup>6-8</sup> Eni ga jëktong löng eshko, öötong löng dlung tjrëko li worbo kalëkong ko Pafos. Kjek eshko ga

judío wlēna sök kjlara ko Barjesús, lēy Grecia so tjlōkwo go ga Elimas. Domer, e ybi. Tjlē ga «Tja Sbō tjlōkwo laga» le, gueniyo ichaga Sbörē llēme. E sök enido kjok eshko sopga ichaga ko Sergio Paulo li shwoy. Tjlapga no ichaga li, e kjok miydē ara. Eni ga Bernabé, Saulo, e rokara ba ushko, woyde ga Sbō tjlōkwo le ba kong kuya wlo le. Eni ga epga öötong löng ba shwoy Sbō tjlōkwo lē, gueniyo ybi li omwoyde llēme. «Llēye le löng li kup llēm dey» le tjlapga no ichaga kong ara, mär ber shäng Jesús go llēm wlo.

<sup>9</sup> Eshko ga Saulo, e kowēba Pablo bako, e go Sbō Sēya jlōkoyo. Eni ga ybi li ĩya beno shäng drēng ga

<sup>10</sup> tjlē ba kong ga «Pja owa, pja jyō ara, pja so Ä kjoyo, pja llēbo pjlo bek li wloyo. ¿Sbō tjlōkwo pjlu li kjlopswēp bop jyō go äär jong llonoro?»

<sup>11</sup> E kjishko ga eeri ga pja shdūya Sbörē. Pja ber kjok ĩgö ame, dlo kälā shjiy li ĩp llēm äär jong llono jā» le ba kong.

Jekdo eshko ga Elimas beno kjok ĩgö llēme. E kjishko ga beno shäng no wlēk, wlosöya wlo le.

<sup>12</sup> ĩya kjok eshko so ichaga lirē ga Sbō tjlōkwo kjrara. Ga beno shäng yēy le erä, Sbō tjlōkwo kura li kjishko.

*Sbō tjlōkwo lara Pblorē oba kong Antioquía kjokyo buk Pisidia kjokyo worbo go lishko*

<sup>13</sup> E irgo ga Pablo, ba yorkagaga jek löng ba tjok li, e opshino Pafos kjokyo dwayo, ga jek kjong go äär pjē pjang Perge kjokyo, e Panfilia kjokyo obi. Gueniyo Juanda sano to jek iröng Jerusalén kjokyo.

<sup>14</sup> E irgo ga epga opshino to Perge kjokyo dwayo, jek öötong löng Antioquía kjokyo. (Antioquía

kjokyo, e ber buk Pisidia kjokyo worbo go.) Eshko ga öötong woshtozlong dbaryo ga opzrëno jek lok judíoga syõ uyo jong eshko li roshko, ga sirkeno lok.

<sup>15</sup> Eshko ga kjok ilgwekklo tara Moisésdë li, e laraba, kjibokwo tara Sbõ tjlõkwo lagaga tek dënashko sorë li, e laraba bakoe. E irgo ga tjlapgaga löng judíoga syõ uyo li no ichono tjlë ba kong ga «Pjäy tjlõkwo lë woydë borwa kjimtoklo wleni ga lëmi ga pjlúe» le Pablo kong, ba yorkagaga löng li kong bakoe.

<sup>16</sup> Eni ga Pablo kojono, orkwo poyono, pjây kjinkozong loklo wleni, ga tjlë ga «Pjeyoga, lër bomi kong ga kuzĩa. Israel tjëyoga, tja kuzĩa. Judíoga llëm gueniyo Sbõ bangkjre wleniyo, tja kuzi bakoe.

<sup>17</sup> Dënashko ga bi tjlapgaga kjrara Israel tjëyo Sbõ lirë, ber tjeng baiya wlo. Öötong löng Egipto kjokyoshko ga kjimtara, iara beno tjëyo kësbange. E irgo ga shira tek kjok eshko dwayo, ba dbo kësbang go.

<sup>18</sup> Löng kjok dogro no llëmshko lu pjloglo sak pkëng (40) wopro ga kjimtara ara.

<sup>19</sup> E irgo ga öötong löng Canaán kjokyoshko ga kjimtara tjëyoga tjeng eshko kjringswo kjäk (7) li pjik, kjok li twe ber ba kong wlo.

<sup>20</sup> Llëye lër shäng ëre luyo öötong sak dbäw pjloglo pkëng kjingsho sak shkëng (450).

»E irgo ga kong nopga iara beno löng ba ichaga wleniyo äär jong Sbõ tjlõkwo laga Samuel dbaryoshko.

<sup>21</sup> Gueniyo ga pjlu rokara lok kjlara Samuel kong, ba ilgwek wlo. Eni ga kong pjlu twara Sbörë

beno kɟlara ko Saúl, e Cis wa, Benjamín tjëyo. Iara beno sök parkë lu pɟloglo sak pkëng (40).

<sup>22</sup> E irgo ga Saúl kɟara Sbörë, ga David iara beno sök ba shtoshko. E woydara Sbörë ara, tɟlë ga “David, Isaí wa li ïn ga domer pɟlú bor kong, llëye woydër ga shärye bor kong eni” le.

<sup>23</sup> »Lu kop ara irgo ga David tjëyo weno shäng kɟlara ko Jesús. E ichara Sbörë, Israel tjëyoga dök, lara ɟlökoyo dënashko sorë li eni.

<sup>24</sup> Jesús wentë shäng oba bokshto llëm obishko ga Juan to shäng Sbö tɟlökwo roy lë Israel tjëyoga uunkong kong. Tɟlë ba kong ga “Llëbo owa shäryëmi löng li, e owa ɟlõe lozï, ga rayozï, ga pɟäy wër jer di roshko” le.

<sup>25</sup> Ga Juan shinmotkë dbaryo döröshko ga tɟlë ga “¿Pɟäy wotɟlïk ga domer koshëmi löng ber bomi pɟluyo wlo li tja lëmire? Tja llëme. Gueniyo ga no tjwe bor irgo kɟlara. Era tɟwlö ara bor kɟinmo anmoyö. Bek wlo ga tja ba drepkwota dök wlo llëm, e tɟwlö ara bor kɟinmo anmoyö kɟïshko”\* le.

<sup>26</sup> »Pjeyoga, pɟäy Abraham tjëyoga, pɟäy judío llëm gueniyo Sbö bangkjrë löng enido wleniyo, tɟlökwo ère, e ber shji uunkong kong, shji döya Sbörë sorë, e miydëy wlo.

<sup>27</sup> Jerusalén soppa, Jesús, e ë miydara lok llëme. Ba kägäyoga ëmdë ga ommiydono lok llëm bakoe. Woshtozlong dbaryo kɟwobi go ga kɟibokwo tara Sbö tɟlökwo lagaga tek dënashko sorë li le lok, gueniyo llë loklo miyde lok llëme. Eni ga eppa om go Jesús ichono shdungobashko ga llëye jyã tak dënashko li, e shäryono eni.

---

\* **13:25 Drepkwota dö**ga lanyo, e tak pɟjang Mateo 3.11 go.

28 Eshko ga llëbo wlëya lok Jesús rotë wlo, ber zrökko wlo lara, gueniyo llëye to wlëna llëme. Zok ga kjwe rayara to, gueniyo ga twara Pilato kong, iche zrökoba wlo.

29 Eni ga llëye jyã tak pjang Sbö kjibokwo go ba kjishko li, e shäryara lok pjire. Ga wolono pjang kjlös go irgo ga doyo lona ba tjlökwö kjragnarë ter töshko, ga iara lok beno buk sakshko.

30 Gueniyo woshrra Sbörë iröng obi.

31 Zröydëba llëm obishko ga jek shäng Galilea kjokyo äär jong Jerusalén kjokyoshko ga ba tjlökwö kjragara kjong kjong jek löng ba tjok. Ga woshrra iröng obi irgo ga dbar kop ara ga Jesús weno shäng epga kong kop arae. Epga eerishko ga beno löng e ina lok jlöe laga.

32-33 »Llëbo roy pjlu lërwa bomi kong. Llëye lara Sbörë jlökoyo bi tjlapgaga tek dëdashko so kong li, e shäryara pjir tjän. Jesús woshrra iröng obi, tak pjang Salmo pjök li go sorë li eni. Tjlëno beno eni: »«Pja bor wa.

Eeri ga ikoba wëë ga  
tja bop data jlökoyo.”†

34 »Woshrra Sbörë iröng obi, doyo an llëm wlo, ber wolon ame wlo, lara Sbörë dëdashko sorë li eni. Tjlëno beno eni:

»«Llëye loror David kong jlökoyo li,  
e lër bop kong jlökoyo bakoe.”‡

35 »Sbö tjlökwö tjlëno e kjishko obi. Tjlëno beno eni:

»«Bop Wa iak beno shäng dboy bop kong li doyo iëp  
an ber buk eshko llëme.”§

† 13:32-33 Salmo 2.7. ‡ 13:34 Isaías 55.3. § 13:35 Salmo 16.10.

36 »Jlōkoyo ga David sök sē obishko ga parkono ara ba pjeyoga kjīshko, woydara Sbörē sore'li eni. E irgo ga wolono, ga doyo iaraba beno buk sakshko, ba kjokēga zlong bāng, ga ano pjire.

37 Gueniyo ga Jesús woshrara Sbörē irōng obi lira doyo ano llēme.

38 »Pjeyoga, tjlōkwo lērwa bomi kong li ēre: Owa pjang bi go li lōya Sbörē ga pjlu, llēye shāryara Jesúsdē li kjīshko.

39 Eye mār Jesús go ga ie Sbörē ber shāng pjlo bek ba bokso. Shji ie kjok llgwekklo tara Moisésdē lirē ber pjlo bek Sbō bokso ga äe.

40 Pjāy sjēk, llēye lara Sbō tjlōkwo lagaga tek dēnashko sorē li wen bomi kong llēm wlo. Tjlēno beno eni:

41 »«Pjāy Sbō tjlōkwo joywē ä,  
llēbo shāryēr ga izi yōtsoe.

jPjāy sēya llēm,  
pjāy wolon!

Pjāy löng sē obishko ga  
llēbo shāryēr kēsbange.

Lēba eni bomi kong wēlē ēmdē ga  
pjāy wotjlīk ga  
'E shāryaga Sbörē' lēmi llēme' »\* 1e.

42 E irgo ga Pablo, Bernabé, e opshino jek judioga syō uyo li roy dwayoshko ga nopga löng li tjlē ba kong ga «Woydērwa ga woshtozlong dbaryo tek kēm kjwara go ga llēye loromi li lēmi borwa kong jek obi» le.

---

\* 13:41 Habacuc 1.5.

<sup>43</sup> Nopga löng eshko li kjone kjone judío, llamo li wenoshko judío llëm wleniyo gueniyo kworkwono beno Sbö tjlökwo kjruga judíoga ï dik. Ga opshino eshko dwayo pjirshko ga nopga to jeklöng Pablo, Bernabé tjok ara.

Eni ga Pablo, Bernabé, e tjlë ba kong ga «Pjây mär ber löng Sbö go, pjây kjimtara ara kjïshko» le.

<sup>44</sup> Öötong woshtozlong dbaryo kjwara obishko ga kjok eshko sopga shrono löng pjir sek, Tjlapga Jesús tjlökwo le li kuk.

<sup>45</sup> Gueniyo ga ïya judíoga löng lirë ga oba shrono ara ga ymorkono lok ara, ga Pablo läywe lok owa, tjlë oba kong ga «Llëye le shäng li, e eni llëme» le.

<sup>46</sup> Gueniyo ga Pablo, Bernabé, llëye bangkjre lok llëm, ga tjlë ba kong ga «Tjawa iak löng Sbö tjlökwo ëre roy lë bomi kong bäm go, pjây judíoga kong. Gueniyo pjây omkuk woydë sira llëm, pjây om go li opyë ber löng së ïyado Sbö tjok woydë llëm bakoe. Eni kuzong ga tjawa to jongya ba lë nopga judío llëm wleniyo kong shara.

<sup>47</sup> Tjawa ichara Tjlapgarë ba tjlökwo tak pjang li go eni. Tjlëno beno eni:

»«Pjây ioror beno iök shjiy wleni,  
nopga judío llëm wleniyo kong.

Nopga dâr sorë li tjlökwoyo lëmi ba kong  
äär jong kjok kjwang jïkong wlo»† le.

<sup>48</sup> Kuya nopga judío llëm wleniyo löng lirë ga beno löng wopjlúe. Tjlë lok ga «Sbö tjlökwo ëre, e owa llëme» le. Eni ga ëye kjrara Sbörë ber löng së ïyado ba tjok wlo ga tjlökwo li kjrara.

---

† 13:47 Isaiás 49.6.

49 Eni ga Sbö tjlökwo shdöktong kjok eshko kjwang jïkong.

50 Gueniyo ga judíoga löng eshko li opyono beno löng Pablo, Bernabé, e wloyo, ga lanyotkara lok owa walëga tjwlö ara, judío llëm gueniyo Sbö bangkjrë löng enido wleniyo kong, domerga tjwlö ara kjok eshko li kong bakoe. E kjïshko ga nopga tjwlö ara li iirkono ara, ga Pablo, Bernabé, e kroyoywara ara, ichara to kjok eshko dwayo.

51 Eni ga Pablo, Bernabé, e opshino kjok eshko dwayoshko ga ba dre pjlungyo löna lok beno tjeng eshko, e ba wloyoga ber löng shdungko loklo. E irgo ga to jek öötong löng Iconio kjokyo shara.

52 Gueniyo ga Jesús tjlökwo kfragaga beno löng Antioquía kjokyo li, e beno löng wopjlú, go Sbö Sëya jlökoyo bakoe.

## 14

### *Sbö tjlökwo lara Pablorë Iconio kjokyo*

<sup>1</sup> Iconio kjokyo ga Pablo, Bernabé, e öötong löng judíoga syö uyo jong li roshko ga Sbö tjlökwo lara lok wolëso nopga löng eshko li kong. E kjïshko ga judíoga, nopga judío llëm wleniyo, e omtjlökwo kjrono ara.

<sup>2</sup> Gueniyo ga judíoga kjong kjong omtjlökwo kjrë woydë llëm, ga Pablo, Bernabé, e lanyotkara lok owa nopga judío llëm wleniyo kong. Kuya lok ga iirkono ara.

<sup>3</sup> Eni ga Pablo, Bernabé, e beno löng eshko dbar kop ara, ga Tjlapga Jesús tjlökwo roy lara ara. Llëye bangkjrara lok llëm, kjimte Tjlapgarë le kjïshko. Ga kong dbo twara kësbang, llëbo ÿydëba llëm wleniyo



shärye wlo. E go ga ïkoba wëlle ga domerga li ichaga Tjlapgarë jlökoyo.

<sup>4</sup> Gueniyo kjok eshko sopga ëng shdöno tjeng kjrìng pjök, kjrìna löng judíoga tjok, kjrìna obi löng Sbö tjlökwo roy lagaga Jesús äska tjok.

<sup>5</sup> Eni ga nopga ara, judíoga, nopga judío llëm wleniyo, e wotjlino jong kjrinaso ba kägäyoga tjok. Tjlë lok ëng kong ga «Kjwepga kjwe shay, shpoy, löy ak go, zröy wlo» le lok eni.

<sup>6-7</sup> Gueniyo ga miydara Pablo, Bernabéré, ga töktong jek öötong löng Licaonia kjokyo. Kjok eshko ga jek löng Sbö tjlökwo roy pjlú le oba kong Listra kjokyo, Derbe kjokyo, kjok shto oblë oblë löng eshko bakoe.

### *Pablo löra ba Listra kjokyo ak go*

<sup>8</sup> Listra kjokyo ga domer sök kjlara jëk llëm wleniyo, weno buk eni.

<sup>9</sup> Ga Pablo tjwe shäng eshkoshko ga llëye le li kuya sök. Ga ïya Pablörë drëng ga miyde shäng ga domer li mär Jesús go, poptë ga pjlú wlo.

<sup>10</sup> Eni ga tjlë sök li kong dbo go ga «¡Pja kojös ber shäng bop dre go beke!» le ba kong. Kuya domer lirë ga kojono maling, ga jëktong.

<sup>11</sup> ïya nopga löng eshko lirë ga öö le, ga tjlë lok Licaonia so tjlökwo go ga «Domerga kjwe, e sböpga kjlopswono beno no töshko so dik, ter beno töshko bi shwoy» le.

<sup>12</sup> Eni ga Bernabé, e kowara lok beno Zeus, ba sbö kësbangyo li e. Ga Pablo tjlëno ba kong ara kjishko ga e kowara lok beno Hermes, e ba sbö Zeus tjlökwo laga kjishko.

13 Eshko ga Zeus syõ uyo jong kjok eshko li boksho ga no shäng kjlara syõshtaga Zeus kong. Ga sögla wlänggla söra pjök mya, nana söra ara bakoe. Syõshtaga li, nopga löng kës li, e wotjlino ga öng li zröya, sho suya, pjë dret, Pablo, Bernabé, e poshrëkklo lara.

14 Miydara Sbö tjlokwo roy lagaga Jesús äska lirëshko ga ba shwong dwlëkza lok aas, nopga li slan wlo. Eni ga opzreno jek zron jong nopga löng kës li tjreko, ga tjleno lok dbo go. Tjlë ga

15 «¿Kjwe llë shäryomirë kjweniro? Tjawa no, so pjäy kjoyo eröe. Tjawa shrono löng Sbö tjlokwo roy pjlu laga bomi kong. Lërwa bomi kong ga bomi sböpga kjwe tjwlö llëme. Wëyë, pjäy kjlopswos ber Sbö Sök İyado li tjok. E kjopkwo shäryaga, kjok uunkong shäryaga, llëbo tjeng kës li shäryaga bakoe.

16 Tek dënashko ga oba kjok shto oblë oblë so judío llëm wleniyo, e iara Sbörë beno löng jek irbo woyde kjone pogo li go.

17 Gueniyo ga llëbo pjlu shärye jong bomi kong İyado. Shunyo ichaga bomi kong li e. Bomi dwla wen pjlu laga li e. Pjäy dli ara, twe bomi kong kjishko. Pjäy löng wopjlu laga li e bakoe. Shärye jong eni, e Sbö jlökoyo miydëmi wlo» le.

18 Ga lara eni ëmdë ga nopga löng li, ba öng, e zröya woydë Pablo, Bernabé poshrëkklo jek obi, gueniyo shäryara lok llëme.

19 Eshko ga judíoga Antioquia so, Iconio so, e shrono löng eshko kjlobö ga lano nopga li kong ara, ga iara beno löng wotjlik oblë. E kjishko ga Pablo löra lok ak go, zröya wlo. Wotjlino ga Pablo

wolonoe lara lok, ga dopshira lok jek kjok eshko dwayo, iara lok beno buk kjoko shwo lëkong.

<sup>20</sup> Gueniyo ga Jesús tjlökwo kjrägaga löng li töno eshko, ga Pablo kopjrina pjribrie. Ga buk li kojono, ga opzrëno jek kjok li roshko iröng obi.

*Pablo, Bernabé, e jek löng Jesús tjlökwo kjrägaga ïk obi*

Wëshko ga opshino kjok eshko dwayo Bernabé tjok, ga to jek Derbe kjokyo.

<sup>21</sup> Öötong löng eshko ga Sbö tjlökwo roy pjlú lara lok eshko. Ga tjlökwo li kjrara nopga löng eshko lirë ara, beno löng Jesús tjlökwo kjrägaga.

E irgo ga Sbö tjlökwo roy lagaga Jesús äska li jek sano iröng Listra kjokyo, irgo ga Iconio kjokyo, irgo ga Antioquía kjokyo.

<sup>22</sup> Kjok kjrënggwo mya lishko ga Jesús tjlökwo kjrägaga löng li kjimtara lok, dbo iara jek këgong. Tjlë lok ba kong ga «Pjây mär ber löng Sbö go eröe. Shji äär ber löng Sbö sök no pjluyo iyado lishko wlo ga llëbo owa wen ara bi kong, e kuroy däw guing» le.

<sup>23</sup> Ga kjok kjrina kjrina ga nopga kjrara löng kjong kjong, ber Jesús tjlökwo kjrägaga löng eshko li kägäyoga wlo. Ga syöshono, iono llëm Sbö kong pjir ga rokara lok Tjlapga Jesucristo kong, tjlë ga «Nopga ëre mär bop go eröe. Iërwa ber tjeng bop wloshko, dëp wlo» le.

<sup>24</sup> E irgo ga jek Pisidia kjokyo go, ga öötong löng Panfilia kjokyo iröng obi.

<sup>25</sup> Eshko Perge kjokyo ga Sbö tjlökwo roy lara oba kong pjir ga jer öötong löng Atalía kjokyo.

<sup>26</sup> Eshko ga opyono kjong roy to jek Antioquía kjokyo buk Siria kjokyo obi lishko. Dämär ga epga ichara Jesús tjlökwo kragaga eshko so lirë to parkë Sbö kong kjok shto oblë oblë, ga syöyoshtara lok, tjlëno ga «Sbö, Pablo, Bernabé, e iërwa ber tjeng bop wloshko, dëp wlo» lara lok ga toe. Eni ga ba pak li shäryara pjirshko ga to jek iröng Antioquía kjokyo.

<sup>27</sup> Ga öötong löng eshko iröng obishko ga Jesús tjlökwo kragaga löng eshko li tona löng ba tjok. Ga llëye shäryara Sbörë ba tjok li roy lara lok ba kong pjire. Sbö tjlökwo lara nopga judío llëm wleniyo kong, ga kjrara lok sorë li roy lara ba kong pjir bakoe.

<sup>28</sup> Eni ga Pablo, Bernabé, e beno löng dbar kop ara eshko Jesús tjlökwo kragaga li tjok.

## 15

### *Jesús tjlökwo kraga kägäyoga lano ëng tjok Jerusalén kjokyo*

<sup>1</sup> Eshkoshko ga Jesús tjlökwo kragaga kjong kjong tjwe Judea kjokyo dwayo, öötong löng eshko Antioquía kjokyo ga ba pjeyoga Jesús tjlökwo kraga li pïya öötong löng, tjlë ba kong ga «Bek wlo ga pjäy Jesús tjlökwo kragaga doyo jyä të pjir, lara Moisésdë tek dënashko sorë li eni. Llëm ga pjäy döya Sbörë llëme» le löng eni.

<sup>2</sup> Kuya Pablo, Bernabérë ga beno owa ba kong, ga ëng dboryono ara kar kar Judea sopga li tjok. E kjïshko ga Pablo, Bernabé, Jesús tjlökwo kragaga kjong kjong, e kjrara Jesús tjlökwo kragaga llamo lirë iche jongya Jerusalén kjokyo, Sbö tjlökwo roy lagaga Jesús äska shwoy, tjlapgaga Jesús tjlökwo

kjraga kägäyoga löng eshko li shwoy bako, llëbo li llgweya lok wlo.

<sup>3</sup> Eni ga ichara Jesús tjlökwo kjragaga löng Antioquia kjokyo lirë to jongya Jerusalén kjokyo. Ga jek löng Fenicia kjokyo go, Samaria kjokyo go bakoe. Eshko ga nopga judío llëm wleniyo öötong beno löng Jesús tjlökwo kjraga li roy lara lok ba pjeyoga Jesús tjlökwo kjraga eshko so kong, ga beno löng wopjlúe.

<sup>4</sup> E irgo ga jek öötong löng Jerusalén kjokyo ga wlokrara Jesús tjlökwo kjragaga eshko so, ba kägäyoga, Sbö tjlökwo roy lagaga Jesús äska lirë. Eni ga llëye shäryara Sbörë ba tjok li roy lara lok ba kong lok pjire.

<sup>5</sup> Gueniyo ga Jesús tjlökwo kjragaga li tjrëko ga fariseoga löng kjlëbö. Epga kjong kjong kojono löng, ga tjle ga «Bek wlo ga nopga judío llëm wleniyo Jesús tjlökwo kjrë woydeshko ga doyo jyä tÿey dey, ga ichÿey kjok llgwekklo tara Moisésdë li sök» le.

<sup>6</sup> Eni ga Sbö tjlökwo roy lagaga Jesús äska tönö tjlapgaga Jesús tjlökwo kjraga kägäyoga tjok, llëbo le löng li llgweya lok wlo.

<sup>7</sup> Eni ga lano ëng tjok ara kar kar. E irgo ga Pedro kojono shäng, ga tjle ga «Pjeyoga, miydëmi pjlu ga tja kjrara Sbörë tek dënashko bomi tjrëko, ba tjlökwo roy pjlu le nopga judío llëm wleniyo kong, epga ëmdë ga omkuk ga tjlökwo kjre wlo.

<sup>8</sup> Ga shji wotjlik bi pjlushko sorë li miyde Sbörë pjire. E kjishko ga nopga judío llëm wleniyo omtjlokwo kjronoshko ga Sbö Sëya twara ba kong, twara bi kong sorë ga eni, miydëy shji judiogarë e go wlo ga shäryaga Sbörë.

<sup>9</sup> Nopga judío llëm wleniyo wotjlino ga mär Sbö go erö ga owa pjang ba go li löna Sbörë beno dret, shäryara bi kong sorë ga eni. Eni ga epga iara beno tjwlö bishīya dik bakoe.

<sup>10</sup> ¿Eni ga llëye woydëmi ga shärye Sbörë obi, tjlkwo ëre kjrëmi wloro? Nopga judío llëm wleniyo iëmi kjok llgwekklo tara Moisésdë li sök lëmi woydë, gueniyo shji ëmdë ga omsöno ma, bi tjlapgaga tek dënashko so omsöno ma bakoe. ¿Eni ga epga omsök sorëro?

<sup>11</sup> Eni llëme. Miydëy ga shji döya Tjlapga Jesúsde, shji kjimte woydë kjishko eröe lëy, ga epga eni bakoe» le.

<sup>12</sup> E irgo ga Pablo, Bernabé, e tjläno nopga löng li kong. Dbo twara Sbörë ba kong llëbo İydëba llëm wleniyo shärye lok nopga judío llëm wleniyo kong li roy lara lok ba kong pjire. E wopro ga kuya nopga lirë löng kjing erä.

<sup>13</sup> Ga tjläno lok pjirshko ga Santiago tjlä ga «Pjeyoga, tja kuzīa.

<sup>14</sup> Simón\* tjläno bi kong ga nopga judío llëm wleniyo kjimtara Sbörë ara, ga epga tjrëko ga no kjone kjone kjrara beno ba nopga baīya. Shäryara bäm goshko sorë li roy lara Simöndë bi kong pjire.

<sup>15</sup> Dënashko ga Sbö tjlkwo lagaga omłono eni. Tjläno beno eni:

<sup>16</sup> »“E irgo ga tja tjwe iröng obi, ga David tjëyo beno löng tjwlö llëm li, e iër ber löng ba shtoshko iröng obi, so u toktong beno buk töy kojöy jem, poshäryëy ber jong pjlú obi wleni.

---

\* **15:14 Simón**, e kowëba **Pedro** bakoe.

17 Eni ga tja wlēya nopga judío llēm wleniyorë.  
 Nopga kjrörör tjeng kjok kjwang jikong li,  
 tja wlēya, ga ber löng botoya bakoe.  
 Tja Tjlapga Sbö. Tja omlë eni.

18 Loror beno eni tek dēnashko.”†

19 »Eni ga bor kong ga nopga judío llēm wleniyo  
 optwono Sbö kong li barwëy ame.

20 Epga kong kjibokwo tēy kjwara dey. E go ga  
 lēy ba kong ga dli llë twak sböpga jyāglō kong li uëy  
 ame, öng zrök kjoyotso skuya i li sho uëy ame, srëng  
 llë uëy ame, ga shji orkwosmono ë tjok llēm ga shji  
 pë ba tjok ame.

21 Tek dēnashko ga kjok llgwëkklo tara Moisésdë  
 li, e lëba löng kjok shto oblë oblëshko enido. Ga  
 woshtozlong dbaryo kjwobi go ga lëba löng judioga  
 syö uyo oblë oblë li roy» le.

*Kjibokwo ichak nopga judío llēm wleniyo kong*

22 Eni ga töno löng lan li, nopga kjrara do pjök,  
 iche lok jek Antioquía kjokyo Pablo, Bernabé tjok.  
 Kjrara lok li beno Judas, Silas. (Judas, e kowëba  
 Barsabás bakoe.) Domerga do pjök li tjlapgaga  
 Jesús tjlökwö kjruga kägäyo wleniyo.

23 Ga kjibokwo tara lok kjwara, ga twara ba  
 kong, söya jek ba tjok wlo. Kjibokwo li tjlä eni:

«Miga pjeyoga. Nopga judío llēm wleniyo löng  
 Antioquía kjokyo, Siria kjokyo, Cilicia kjokyo,  
 “¿Pjāy yonde?” lërwa bomi kong. Kjibokwo ëre  
 ichërwa jek bomi kong. Tjawa Sbö tjlökwö roy  
 lagaga Jesús äska, lanma tjlapgaga Jesús tjlökwö  
 kjruga kägäyoga.

---

† 15:18 Amós 9.11-12.

24 »Roy kurorwa ga no kjong kjong jũshko so löng borwa tjrëko li öör löng bomi shwoy ga pjây barwara ara, ba tjlökwo lara li go, ga pjây beno löng woydë ara. Gueniyo epga ichaga tjawarë llëme.

25-26 E kjĩshko ga domerga kjrörorwa kjlöbö, ga ichororwa jek bomi ik. Bernabé, Pablo, e bi pjeyoga woydërwa ara wleniyo. Epga optwono beno löng parkë Tjlapga Jesucristo kjĩshko, ga zrökobare, de zrökoba llëm, e miyde löng llëme. Epga ichororwa jek bomi ik.

27 Ga Judas, Silas, e ichororwa jek ba tjok, llëye tak pjang kjibokwo ëre goshko li lanyotke lok om go bomi kong wlo.

28 »Eni ga beno pjlu Sbö Sëya kong, borwa kong ga pjây ichërwa kjok llgwekklo tara Moisésdë li shäryë uunkong llëme. Llëye shäryëmi wlo li ëre döe:

29 Dli llë twak sböpga jyäglo kong li uëy llëm; öng zrök kjoytso skuya i li sho uëy llëm; srëng llë uëy llëm; shji orkwosmono ë tjok llëm ga shji pë ba tjok llëm bakoe. Shäryëmi uunkong eni ga pjây jëk löng pjlo beke.

»Ber eni.»

30 Eni ga domerga kjrara li toe. Öötong löng Antioquia kjokyo ga ba pjeyoga Jesús tjlökwo kjruga li tona lok eshko, ga kjibokwo söra lok jek li twara ba kong.

31 Eshko ga kjibokwo li lara lok ëng kong, ga beno löng wopjlu, ga dbokjrono jek obi e go.

32 Judas, Silas, e Sbö tjlökwo lagaga. Eshko ga tjläno nopga löng li kong ara, dbo iara lok ara bakoe.



33-34 Ga beno löng dbar kop ara eshko. E irgo ga opshino to jek ba ichagaga shwoy iröng obi. Brikshko ga «Jölä» lara ba pjeyoga lirë ba kong. «Pjäy nom iröng wopjlúe» lara lok ba kong bakoe.‡

35 Gueniyo ga Pablo, Bernabé, e beno löng eshko Antioquía kjokyo. Tjlapga Jesús tjlökwö le löng oba kong, ga oba pïya löng ara. Jesús tjlökwö kragaga eshko so omshäryono kjlöbö eni bakoe.

### *Pablo, Bernabé, e opkiono dboy dboy*

36 Öötong dbar kop ara ga Pablo tjlä Bernabé kong ga «Shji to bi pjeyoga löng kjok shto oblë oblë ik iröng obi, shji öör Tjlapga Jesús tjlökwö le kjone dö ga eshko, löng sorë ÿy wlo» le.

37 Kuya ga tjlä ba kong ga «jölä. Gueniyo Juan söy bi tjok bebi» le. (Juan, e kowëba Marcos bakoe.)

38 Gueniyo ga Pablo kong ga pjlu anmoyö llëme. Epga löng Panfilia kjokyoshko ga rayara Marcosdë beno löng tjoksa, jëktong ba tjok ba pak shäryë ame.

39 Eni ga ëng dboryono lok kar kar, ga beno löng wopjlú ëng tjok ame. E kjishko ga opkiono beno löng dboy dboye. Eshko ga Marcos söra Bernabéré jek ba tjok, jer dlung kjako, opyono kyyong kësbang roy, ga jongya jong Chipre kjokyo.

40 Pablo lira, Silas söra jek ba tjok. Brik lokshko ga Jesús tjlökwö kragaga löng li syöshono Sbö kong, tjlä ga «Sbö, Pablo, Silas, e iërwa ber tjeng bop wloshko, dëp wlo» le. E irgo ga opshino toe.

---

‡ 15:33-34 Tek dënahshko ga kjibokwo ëre jyä shiraba oblë oblë ara. Ga kjone kjone tjlä ga «“Pjäy nom iröng wopjlúe” lara lok ba kong bakoe. Gueniyo ga Silas wotjlik ber sök eshko le, ga benoe.»

41 Jek öötong löng kjok shto oblë oblë Siria kjokyo, Cilicia kjokyo. Eshko ga ba pjeyoga Jesús tjlökwo kjraga löng li dbo iara lok Sbö tjlökwo go arae.

## 16

### *Timoteo jek shäng parkë Pablo, Silas tjok*

<sup>1</sup> Eshko ga Pablo wlo öötong löng Derbe kjokyo, e irgo ga Listra kjokyo. Eshko ga Jesús tjlökwo kjraga wlëna shäng kjlara ko Timoteo, e mekë judío, Jesús tjlökwo kjraga bako, gueniyo data judío llëm wleniyo, e Grecia so.

<sup>2</sup> Timoteo, e pjlúe le Jesús tjlökwo kjrágaga löng Listra kjokyo, Iconio kjokyo lirë.

<sup>3</sup> Eni ga woyde Pablorë ga Timoteo jek shäng parkë ba tjok. Gueniyo ga miyde judióga eshko so uunkong lirë ga Timoteo doyo jyã tak llëm, data Grecia so kjïshko. E kjïshko ga barwe judiógarë llëm wlo ga Timoteo doyo jyã tara Pablorë pjire.

<sup>4</sup> E irgo ga jek löng kjok shto oblë oblëshko ga llëye lara Sbö tjlökwo roy lagaga Jesús äska, tjlapgaga Jesús tjlökwo kjraga kägäyoga löng Jerusalén kjokyorë li, e lara lok Jesús tjlökwo kjrágaga kong pjire. Ga tjlä lok ba kong ga «Tjlökwo lara lok li shäryëy eni» le.

<sup>5</sup> Eni ga Jesús tjlökwo kjrágaga mär beno löng Sbö go jek këgong, ga dbar kjwobi go ga tön jek këgong këgong.

### *Pablo domer Macedonia so ñno kjlara, shji yoñno wleni*

<sup>6</sup> Eshko ga Pablo wlo wotjlïno lok to Asia kjokyo, Sbö tjlökwo roy lë eshko wlo lara. Gueniyo ichara

Sbö Sëyarë jek eshko llëme. E kjïshko ga jek Frigia kjokyo go, Galacia kjokyo go,

<sup>7</sup> öötong löng Misia kjokyo gomyo. Eshko ga wotjlino lok to Bitinia kjokyo lara, gueniyo ichara Jesús Sëyarë jek eshko llëme.

<sup>8</sup> E kjïshko ga jekdo bek, slano Misia kjokyo llëm, jer öötong löng Troas kjokyo.

<sup>9</sup> E shkëyo ga Pablo domer Macedonia so ñno shäng kjlara, shji yoïno wleni. Ga domer li tjlä ba kong ga «Rokër bop kong sira ga pja tek Macedonia kjokyo, tjawa kjimtëp wlo» le.

<sup>10</sup> Ga ñna Pablorë eni irgo ga tjawa\* tjlä ëng kong ga «Shji roke Sböre shäng eshko, ba tjläkwo roy pjlu löy kjok eshko sopga kong» lërwa. E kjïshko ga tjawa posharyono löng jek bek Macedonia kjokyo wlo lërwa.

### *Lidia Jesús tjläkwo kjrono*

<sup>11</sup> Eni ga tjawa opyono kyyong kësbang roy, ga tjawa opshino Troas kjokyo dwayo, jek bek äär jong dlung tjrëko ko Samotracia. Wëshko ga tjawa jek äär löng Neápolis kjokyo.

<sup>12</sup> E irgo ga tjawa jem Filipos kjokyo, e Macedonia kjokyo obi. Kjek eshko li ichaga Roma sopgarë, gueniyo Macedonia sopga kong ga kjok e tjwlo ara. Ga tjawa beno löng eshko dbar kjwöbösoe.

<sup>13</sup> Öötong woshtozlong dbaryo ga tjawa opshino jek kjok eshko dwayo, tjawa äär löng di kjako, kjoko shwo lëkong. Eshko ga judioga syöshtozlong shtoyo tjok kjwe lërwa, ga eni jlöe. Tjawa öötong löng eshkoshko ga wlënorwa ga walëga ëng töno

---

\* **16:10** Kjibokwo ëre taga Lucasdë. Eshko jek lëkong ga Lucas jëk to shäng Pablo tjok. «Tjawa» le e kjïshko.

lōng kjlōbö eshko. Eni ga tjawa sirkeno lano lōng ba tjok.

<sup>14</sup> Eshko ga walë sök kjlara ko Lidia, e Tiatira so, shwong ko dingding shwëshwë tjwlō ara wleniyo soynega. E judío llëm wleniyo, gueniyo Sbō poshrëya enido. Sök borwa kuk eshkoshko ga pjlu iara Sbörë pjang ba tjlōkwo roy le Pablorë sök li kjre wlo.

<sup>15</sup> E irgo ga wara jer di pjang eshko li roshko, ba pjeyoga lōng ba ushko li tjok. E irgo ga tjlä borwa kong ga «Tja ïmi ga Tjlapga Jesús tjlōkwo kjraga jlōkoyo ga rokër bomi kong sira ga pjây jek bor tjok, pjây ber lōng bor ushko wlo» le.

Tjawa rokara jlōkoyo, ga jlō lororwa ba kong, ga tjawa beno lōng ba ushko.

*Pablo, Silas, e bängzaraba no shdüzlong uyo*

<sup>16</sup> Dbar kjwara ga tjawa jek lōng syōshtozlong shtoyo wloshko ga kjoglo weno shäng kjlara, park-aga tjwlëk shäng pjir wleniyo. Kjoglo li goshko Ä sëya kjlara. Sëya li dbo go ga llëbo wen llono li le oba kong enido, ga potjwlëkoba ba sogoga kong arae.

<sup>17</sup> Kjoglo li jek shäng borwa irgo, ga öö le, tjlä ë pogo kong ga «Domerga kjwe, e Sbō Tjwlō Kësbangyo parkaga. Kjwepga jek lōng pjây döya Sbörë sorë laga» le.

<sup>18</sup> Dbar kop ara ga shärye shäng eni. Eni ga dbar kjwara ga Pablo iirkono ba kong, ga bojono irōng, tjlä sëya pjang ba go li kong ga «Lër bop kong Jesucristo ko goshko ga pja opkjos kjoglo kjwe goshko dwayo» le.

Jekdo eshko ga kjoglo li rayara sëya lirë ga toe.

19 Gueniyo ga ñya kjoglo sogoga lirë ga beno dbur shak ba kjĩshko ame ga Pablo, Silas, e shara lok, söra jek dbo go öötong löng llëbo soynezhlong, tjlapgaga kjok llgwega wleniyo li boksho.

20 Eshko ga tjlä lok tjlapgaga li kong ga «Domerga ëre judíoga. Kjok ëreshko ga oba shdüya löng ara.

21 Shji pñya löng ba sdëkwo bañya go. Shji Roma soga kong ga tjlokwo le löng bi kong li, e kolako llëm, e shäryako llëm bakoe» le.

22 Eni ga nopga löng eshko ara li jek uunkong ba wloyo, ga tjlapgaga li nopga ichono ba shwong skwë, shpoya lok kjor no shpokklo go.

23 Eni ga shpora lok irgo ga söra lok, iara beno löng no shdüzhlong uyo roshko. Eshko ga tjlapgaga li tjlä lok no daga shäng li kong ga «Bängzas, ga dos yötsoe» le.

24 Kuya ga Pablo, Silas, e söra jek, zrëra öötong tjeng këgong rong anmoyõ kjër äär pjirshko. Eshko ga kjordo zak jek lok këgong këgong ba dre bapkwö, ga ba dre li zrëra ber lok eshko, opshik llëm wlo.

25 E shkëyo ga Pablo, Silas, e löng syöshtë, të Sbö kong, ga kuya nopga shdung tjeng ba tjok eshko lirë löng. Öötong kjok rong dik ga

26 yo iano kësbang eshko. Eni ga u li sokö iona beno tre tre erä. Jekdo eshko ga u bäng llë döktong, roshwino drete. Ga dröng sho no pjrikklo li döktong pjir bakoe.

27 Eshko ga no daga li buk pë, ga wolleno buke. Ñya ga u li u bäng bäng döktong beno lok ojong ga wotjlino ga nopga bängzak tjeng li töktong pjire ñara. E kjĩshko ga ba dröng söya pjang ba kwota roy li shira, opzrök wlo ñara.

28 Gueniyo ga ñya Pablorë sök ga öö le ba kong, tjlë ga «¡Pja opzrök llëme!<sup>†</sup> ¡Tjawa löng uunkong jüşko!» le ba kong dbo go.

29 Kuya no daga lirë ga tjlë ga «Iök shjiy tek sözong» le ba kjimtaga shäng li kong, ga kjrarae. Eshko ga opzreno jek maling zron jong äär jong Pablo, Silas shwoy, ga kjök torgö sök ba dre zlong, der arae.

30 E irgo ga kojono, ga Pablo, Silas, e shira tjeng lishko dwayo. Eni ga tjlë ba kong ga «Tjlapgaga, ¿tja orwë llong? ¿Tja där wlo ga llëye shäryër?»

31 «Pja mär Tjlapga Jesucristo go ga pja döya Sbörë, bop pjeyoga löng bop ushko uunkong li döya eni bakoe» le ba kong.

32 Eni ga Tjlapga Jesús tjlökwo lara lok ba kong, ba pjeyoga löng ba ushko uunkong li kong bakoe.

33 Jekdo eshko ga söra no daga lirë jek di bäng buk eshko lishko, ga shpora lok bäng li, e kwoshk-wara, kröna ba kong. E irgo ga no daga li wara jer di bäng buk li roshko, ba pjeyoga löng ba ushko li tjok bakoe.

34 Eni ga Pablo, Silas, e söra jek ba ushko, ga sënae. Eshko ga no daga li beno sök woowa llëm, ba pjeyoga löng ba ushko uunkong tjok, beno löng mär Sbö go kjışko.

35 Wëshko kjok shröng ga tjlapgaga kjok llgwegga wleniyo li no dagaga ichono kjlöbö äär löng no daga sök no shdüzlong uyo li ñk, Pablo, Silas, e döya wlo.

---

<sup>†</sup> **16:28** Eshko dbaryo ga nopga löng kjërshko, e töktong ey dwayoshko ga ba dagaga zrökoba. «¡Pja opzrök llëme!» lara Pablorë ba daga kong e kjışko.

<sup>36</sup> Eni ga no daga li tjlě Pablo kong ga «Tjlapgaga kjok lġwega wleniyo li tjlōkwo ichono bor kong, pjāy dōr wlo le. Eni ga pjāy to ga bue. Pjāy nom wopjlu» le.

<sup>37</sup> Gueniyo ga Pablo tjlě no dagaga shrono tjeng li kong ga «Tjawa Roma so kjibokwo tjok. Woydara ga tjawa lġwera kjwe kjok lġwekklo Roma so ĩ go. Gueniyo tjawa lġwera lok llēm ěmdē ga tjawa shpora lok ara nopga uunkong bokshto, ga tjawa bāngzara lok no shdūzlong uyo roshko. ¿Eni ga tjawa shiya woydē lūtshko ega? ¡Eni llēme! Tjawa shiya lok wlo, woyde ga tek shiga epgarē om go dey. Lēmi ba kong eni» le.

<sup>38</sup> Eni ga no dagaga li to öötong löng tjlapgaga li shwoy ga roy lara ba kong pjire. Kuya lok ga beno löng sēya llēm, Pablo, Silas, e kjibokwo tjok kjīshko.

<sup>39</sup> Ga tjlapgaga li jek öötong löng Pablo, Silas shwoy ga tjlě ba kong ga «Tjawa jnemi kēsbange» le. Eni ga dōrae. Eshko ga tjlě ba kong obi ga «Rokērwa bomi kong sira ga pjāy opshik borwa kjok ěreshko dwayo» le.

<sup>40</sup> Eni ga opshino lok no shdūzlong uyo roshko dwayo, ga jek öötong löng Lidia ushko. Eshko ga ba pjeyoga Jesús tjlōkwo kjraga li pjlorā uunkong, ga dōo iara bakoe. E irgo ga opshino to ey dwayo.

## 17

### *Tesalónica soga woksera löng ara*

<sup>1</sup> Ga Pablo, Silas, e jek äär löng Anfīpolis kjokyo, e irgo ga Apolonia kjokyo. E irgo ga öötong löng Tesalónica kjokyo. Eshko ga judioga syō uyo jong kjwara.

<sup>2</sup> Ga Pablo sgara shäng woshtozlong dbaryo kj-wobi go ga opzrëk jek judíoga syõ uyo roshko. Eni ga öör shäng eshko woshtozlong dbaryo li pjloglo mya, ga lano ara nopga löng li tjok. Sbõ tjlökwõ tak pjang li

<sup>3</sup> pjllölgweya ba kong. Tjlë ba kong ga «Miydëy Sbõ tjlökwõ ëre go ga no pjluvo iche lara Sbörë li shronoshko ga woyde ga shdungoba, wolon, ga woshre Sbörë iröng obi. Jesús roy loror bomi kong, ga shäryono ba kong eni. No pjluvo lër shäng li e» le.

<sup>4</sup> Eni ga judíoga kjong kjong omtjlökwõ kjrono. Grecia sopga ara Sbõ poshrëk löng enido wleniyo, walëga tjwölõ ara wleniyo ara, e omshäryono eni bakoe. Ga tjlökwõ kjragaga uunkong li beno löng Pablo, Silas tjok.

<sup>5</sup> Gueniyo ga ñya judíoga omtjlökwõ kjrono llëm wleniyo lirë ga ymorkono ara. Eni ga to löng irbo bäng go ga nopga owa oba barwë ä wleniyo, e tona kjlöböso, kjok eshko sopga shdöya wlo, ie ber löng wlëp llëm wlo. Ga wotjlïno ga Pablo, Silas, e löng no sök kjlara ko Jasón li ushko lara. E kjïshko ga öötong löng ba shwoy ga opzrëno jek dbo go ba u roshko, Pablo, Silas, e shaya, söya, twe nopga löng li kong wlo, shdüya wlo lara,

<sup>6</sup> miga wlëna llëme. Eni kuzong ga Jasón shara lok shara, ba pjeyoga Jesús tjlökwõ kjraga kjlöbö li tjok. Ga söra lok dbo go, dopshiya lok i, öötong löng tjlapgaga kjok llgwegaga wleniyo li shwoy. Eshko ga öö le lok ara, tjlä ga «Domerga to löng kjok shto oblë oblë, nopga shdöya ber löng wlëp llëm wlo li, e shrono löng bi shwoy ëre bi barwaga.



<sup>7</sup> Shronoshko ga wlokrara Jasón jürë öötonglöng ba ushko. Kjuk llgwekklo tara pju kësbangyo sök Roma kjokyorë li, e bangkjre lok llëm, ie ber tjwlö llëm bakoe. To löng tjle ga pju oblë tjok le. E kowe lok Jesús» le.

<sup>8</sup> Eshko ga llëye lara lok li kjishko ga tjlapgaga, nopga löng eshko li, e woksera tjë jikong.

<sup>9</sup> E kjishko ga Jasón, ba pjeyoga Jesús tjlokwo kjruga, e ichara lok oppotjwlëk, e irgo ga rayara toe.

*Berea sogga Jesucristo tjlokwo kjrono ara*

<sup>10</sup> E shkëyo ga Pablo, Silas, e ichara Jesús tjlokwo kjruga eshko so lirë opshik jek Berea kjokyo. Öötong löng eshko ga opzrëno jek judioga syö uyo jong eshko li roshko.

<sup>11</sup> Judioga löng Berea kjokyo li wotjlik owa judioga löng Tesalónica kjokyo li i dik llëme. Ga Jesús tjlokwo lara lok ba kong li kuya ga beno löng wopjlu, ga küywa lok obi. Eni ga dbar kjwobi go ga tjlokwo kura lok li ina lok Sbö tjlokwo kjibokwoyo go ara, llëye lara Pablo, Silasdë li, e jlöre iya lok wlo.

<sup>12</sup> Eshko ga judioga omtjlokwo kjrono ara. Grecia sogga omtjlokwo kjrono kjlaraso llëm bako, walëga tjwlö ara wleniyo, domerga bakoe.

<sup>13</sup> Gueniyo ga Sbö tjlokwo roy le Pablörë shäng Berea kjokyo li roy kura judioga löng Tesalónica kjokyo lirë, ga jek öötong löng eshko ga nopga löng eshko li shdora lok ara, beno löng wlëp ame.

<sup>14</sup> Jekdo eshko ga Pablo ichara ba pjeyoga Jesús tjlokwo kjruga lirë opshik maling, jongya dlung sor go, brik to kjok eshko dwayo wlo. Gueniyo Silas, Timoteo, e beno löng Berea kjokyo obi.

15 Eshko ga Pablo yorkagaga öör löng ba tjok Atenas kjokyo. Ga Pablo beno sök eshko. Eni ga ba yorkagaga li sano jem iröng Berea kjokyo. Brik lokshko ga Pablo tjlä ba kong ga «Pjäy tjlä Silas, Timoteo kong ga woydër ga tek tön bor tjok maling Atenas kjokyo jüshko lämi ba kong» le.

*Pablo Sbö tjläkwo lono shäng Atenas kjokyo, tjlapgaga kësks ko Areópago kong*

16 Ga Pablo beno sök eshko Silas, Timoteo, e koshë. E wopro ga İya to shäng ga Atenas soppa sböpga jyäglö shäryono träk llëm, ga wokserga shäng erä.

17 E kjışhko ga öötong shäng judiöga syö uyo jong eshko li roshkoshko ga tjläkwo kjlopswë ara nopga löng eshko li tjok, judiöga, nopga judiö llëm wleniyo, gueniyo Sbö poshrök löng enido wleniyo tjok. Ga dbar kjwobi go ga öötong shäng llëbo soynezlöng shtoyo ga tjläkwo kjlopswë ëbo tjwe ba shwoy li tjok.

18 Eshko ga nopga tjeng kjring pjök ko epicúreo, estoico. Epga tjläkwo kjlopswë kar kar ëng tjok ara, ba wotjlik om go li go. Ga Pablo tjlä li kuyashko ga tjlä lok kar kar ba tjok. Ga kjong kjong tjlä ëng kong ga «¿Domer tjlägwang kjok miydë llëm kjwe llë layde shäng?» le.

Eshko ga Pablo shäng Jesús roy pjlü lä ba kong, Jesús, e wolono, ga woshrara Sbörë iröng obi le. E kjışhko ga kjong kjong tjlä ga «Domer kjwe İn ga to shäng sböpga shto oblë so roy shdök» le lok eni.

19 Eni ga söra lok öötong shäng tjlapgaga kësks ko Areópago li shwoy. Eshko ga tjlä lok ba kong ga

«Tjļōkwo lēp shāng borwa kong tjaglēn li, e pīs yōtso borwa kong sira, miydērwa wlo.

<sup>20</sup> Kurwa ga tjawa kong tjļōkwo lēp llēbo oblē dō, ga llē loklo miydērwa woydē» le.

<sup>21</sup> Eshko ga Atenas sopga, nopga shto oblē so lōng eshko li, e sgara lōng llēye lēba tjwe tjaglēn li kuya wlo, lanyotke wlo erōe. Llēye oblē shārye lok llēme.

<sup>22</sup> Eni ga Pablo kojono shāng eshko ba bokshto, ga tjlē ba kong ga «Tjļapgaga Atenas so, ĩn jlōkoyo ga bomi sbōpga, e bangkjrēmi äe.

<sup>23</sup> Tja jēktong bomi kjok jūshko ga bomi sbōpga poshrēzlong shtoyo lok li ĩnor pjire. Kjrina jūni ga sbō poshrēkkļo jong kjwara eshko, tak pjang ba poglo go tjlē ga “Sbō miydēy llēm obi li, e poshrēkkļo.” Eni ga Sbō miydēmi lōng llēm li, e poshrēmi lōng tjān, e ě miydēmi lōng llēm gueniyo. E kjīshko ga tja shrono shāng ba roy laga bomi kong.

<sup>24</sup> E kjok ěre uunkong shāryaga, llēbo tjeng kēs li shāryaga bakoe. E kjok dogo so, kjok ěre so, e Tjļapga. E sōk u shāryak norē li roshko llēme.

<sup>25</sup> Shji lōng sē laga erē, shji tjwlō shrē laga erē, shji llēbo tjok kēs li twaga erē bakoe. Eni ga e opkjimtoklo woydē llēme.

<sup>26</sup> »Dāmārshko ga domer shāryara kjļaraso dōe. Gueniyo ba tjēyo tek ber ba irgo li wena trāk llēm, shdōktong to kjok shto oblē oblē uunkong kjok kjwang jīkong. Tek dēnashko ga tjēyoga oblē oblē ber lōng dbar kjwobi, ber tjeng kjone, e lara pjir tjān.

27 Shäryara eni, ber löng ba wlëk wlo. To jëk löng kuya ï wleni ga wlëya kjwe, shäng bi soshko ëmdë.

28 Ga shji mär löng ba go, shji jëk laga erë bakoe. Ga pjäy tjrëko tjlökwö wolëso tagaga tjeng kjlöbö. Epga omfono eni bakoe. Tjlëno ga “Shji uunkong Sbö wapga”lara lok eni.

29 »Shji Sbö wapga kuzong ga Sbö, e so sböpga jyäglö shäryak dbur sho shöylör go, dbur sho pjublún go, llëm ga ak sho go kjoyo, e lëy eni llëme. E so llëbo shäryak norë ba wotjlik li go kjoyo llëm bakoe.

30-31 »Dënashko ga nopga llëbo shäryono bëy llëmshko ga shdüya Sbörë llëm, llëye miyde lok llëm kjishko. Gueniyo dbar iara Sbörë beno kwara, ber nopga löng kjok ëre kjing go kës li llgwezlong dbaryo wlo. Ga domer kjrara beno shäng kjlara, nopga llgweya bek wlo. E ë miydëy wlo ga e wolono, ga woshwara Sbörë iröng obi. E kjishko ga eerishko ga nopga löng kjone pogo, e woyde ga llëbo owa shärye löng li, e owa jlöe le, ga raye» le.

32 Ga domer wolono kjlara ga woshwono iröng obi le eni li kuya lok ga kjong kjong Pablo läywë owa, joywe jong erä. Gueniyo kjong kjong tjle ba kong ga «Pja woydërwa ga llëye lep shäng li dbar oblëshko ga lep borwa kong jek pjlara obi» le.

33 Eni ga Pablo opshino eshko dwayo.

34 Eshko ga kjong kjong jek Pablo tjok, ga beno löng Jesús tjlökwö kjrägaga. Kjlara jüni ko Dionisio. Domer, e tjlapgaga kës kës ko Areópago li kjlarayo. Jesús tjlökwö kjräga kjlara obi, e walë shäng kjlara ko Dámaris.

# 18

## *Pablo Sbö tjlökwo lono shäng Corinto kjokyo*

<sup>1</sup> E irgo ga Pablo opshino to Atenas kjokyo dwayo, jek öötong shäng Corinto kjokyo.

<sup>2</sup> Eshko ga judío wlëna shäng kjlara ko Aquila, e Ponto so. Dënashko ga öötong sök Roma kjokyo, e Italia kjokyo obi. Eshko dbaryo ga pjlu kësbangyo ko Claudio li tjlökwo ichono, tjlä ga «Judíoga löng jüşhko Roma kjokyo kjlobi li opshik drete» le. E kjishko ga eeri ga öötong dbar kjwöbö ga Aquila opshino jek Roma kjokyo dwayo, öötong sök Corinto kjokyo ba boy Priscila tjok.

<sup>3</sup> Ba pak baíya lok, e u shäryaga öng kwota go, Pablo í dik. E kjishko ga miydara Pablörë ga jek öötong shäng ba shwoy ga beno shäng ba ushko, ga parkë ba tjok bakoe.

<sup>4</sup> Eni ga äär woshtozlong dbaryo kjwobi go ga Pablo opzrëk jek judíoga syö uyo jong eshko li roshko. Ga lan judíoga löng li tjok, nopga judío llëm wleniyo löng li tjok bako, tjlökwo le shäng li, e jlöe le lok wlo.

<sup>5</sup> Ga Silas, Timoteo, e tjwe Macedonia kjokyo dwayo öötong löng ba shwoy. Eshko jek lëkong ga Pablo opyono Jesús tjlökwo roy lë dbar kjwobi go, opyono shäng e shäryë wlo eröe. Tjlë judíoga kong ga «Bi pjluyo iche le Sbörë li, e Jesús» le ba kong iyado.

<sup>6</sup> Kuya judíogarë ga opyono beno löng ba wloyo, ga läywe lok owa arae. E kjishko ga Pablo ba shwong pjloyono, pjloyo lon ber tjeng eshko wlo, e ba wloyoga ber löng shdungko wlo loklo. Ga tjlä ba kong ga «Pjäy shdüya Sbörë laga ber pjäydë om

go. Miydaga ber tjarë ame. Tja Sbö tjlökwo roy lë pjây judíoga kong ame. Tjlökwo li lër nopga judío llëm wleniyo kong shara» le.

<sup>7</sup> Eni ga Pablo opshino judíoga syō uyo li roshko dwayo. Eshko ga domer sök kjlara ko Ticio Justo, e judío llëm wleniyo, gueniyo Sbö poshrëya enido. Ba u jong judíoga syō uyo li zlong bäng. Eni ga Pablo beno sök ba tjok eshko.

<sup>8</sup> Kjuk eshko ga domer sök kjlara obi ko Crispo. Domer, e judíoga syō uyo jong eshko li kägäyo. Ga Tjlapga Jesús tjlökwo kjrara, ba pjeyoga löng ba ushko uunkong li tjok. Corinto sopga omtjlökwo kjrono ara bako, ga waraba jer di roshko uunkong.

<sup>9-10</sup> Shkër kjwara ga Tjlapga Jesús tjlëno Pablo kong shji yoïno wleni, tjlë ga «Llëye bangkjrëp llëme. Tja shäng bop tjok iyado. E kjïshko ga bor tjlökwo roy lëp iyado, pja kjinkë llëme. Ga nopga kjok ëreshko botoya ara. E kjïshko ga pja barwaga ërë llëm, pja kong llëbo owa shärye ërë llëm bakoe» le.

<sup>11</sup> Eni ga Pablo beno shäng Corinto kjokyo Sbö tjlökwo lë nopga li kong lu pjlara kjingsho bëy.

<sup>12</sup> Corinto kjokyo, e Acaya kjokyo obi. Dbar eshko ga Galiön, e parkë sök Acaya so ichaga. Eshkoshko ga öötong shäng Corinto kjokyoshko ga judíoga ëng töno, ga Pablo shara lok, söra jek öötong löng no llgwezlong uyo.

<sup>13</sup> Eshko ga tjlë lok tjlapga li kong ga «Domer ëre to shäng nopga ië Sbö poshrëk, ba wotjlïk baïya li go. Gueniyo kuy ga le shäng li, e kjok llgwekklo tara Moisésdë li wloyo» le.

<sup>14</sup> Eni ga dborye Pablorë'lara, gueniyo Galión tjlë judíoga li kong ga «Judíoga, tja barwëmi llëme. Eye rotoromi llëye shäryara owa anmoyö kjishko kjwe ga llgwer bomi kong kjluwe.

<sup>15</sup> Gueniyo sömi tjwe shäng li tjlökwo le shäng li kjishko. Pjäy lan tjlökwo llë kjishko, ko llë kjishko, bomi kjok llgwekklo li kjishko bakoe. Eni kuzong ga llgwezī pjäydë om go. Tja opyë woydë ber llëbo e llgwega bomi kong llëme» le.

<sup>16</sup> E irgo ga ichara ba llgwezlóng uyo roshko dwayo.

<sup>17</sup> Eshko ga judíoga syö uyo jong li kägäyo shäng kjlara ko Sóstenes. E shara nopga judío llëm wleniyo löng lirë, ga shpora lok ara Galión bok-shto. Ga ñya sök wlëp erä, e ba kong ga llëye llëme le.

*Pablo jëk shäng kjok shto oblë oblë*

<sup>18</sup> Eshko ga Pablo beno sök Corinto kjokyo dbar kop ara obi. E irgo ga «Tja toe» lara Jesús tjlökwo kfragaga löng eshko li kong, ga jer öötong shäng Cencrea kjokyo, Priscila, Aquila tjok. Eshko ga Pablo kä shtono beno pjret. Dämär ga käkzong shtë llëm dbar kjwöbö lara Sbö kong tjän, ga dbaryo li pjitonge. E irgo ga opyono lok kyyong kësbang roy, jongya Siria kjokyo wlo le.

<sup>19</sup> Ga öötong löng Éfeso kjokyoshko ga Priscila, Aquila, e rayara Pablorë beno eshko, ga toe. E irgo ga jek öötong shäng judíoga syö uyo roshko ga lano judíoga löng eshko li tjok.

<sup>20</sup> Eni ga tjlë lok ba kong ga «Woydërwa ga pja ber sök borwa tjok dbar kjwöböso guing» le, gueniyo woydara llëme.

21 Ga «Tja toe.\* Gueniyo ga woyde Sbörë ga tja tjwe iröng bomi ïk obi» le. E irgo ga opyono sök kjang kësbang roy, ga toe.

22 Jek öötong shäng Cesarea kjokyo ga jem Jerusalén kjokyo, Jesús tjlökwo kragaga löng eshko li pjlok. E irgo ga opshino jer öötong shäng Antioquia kjokyo buk Siria kjokyo obi lishko ga

23 beno sök eshko dbar kjwöböso. E irgo ga opshino jek obi, ga to shäng kjok kjinashko kjrinashko Galacia kjokyo, Frigia kjokyo bakoe. Jesús tjlökwo kragaga kjimtara mär Sbö go jek kégong eni.

### *Apolos Sbö tjlökwo lono Éfeso kjokyo*

24 Eshkoshko ga domer öötong shäng kjlara Éfeso kjokyo ko Apolos. E judío, Alejandría so. Sbö tjlökwo tak pjang li miyde shäng arae. Ga domer li tjlë ga kuywoye.

25 Ga oppino ara tjän, Tjlapga Jesús irbo li kjishko, ga tjlë shäng ga laywae. Oba piya shängshko ga Jesús roy le ba kong yötsoe. Gueniyo miyde wlo li obie. Juan no wono di go sorë miydayde döe.

26 Eni ga opzrëno jek judioga syö uyo jong eshko li roshko, ga tjlëno oba kong, llëye bangkjrara llëme. Gueniyo kura Priscila, Aquilarë, ga mana lok ba ushko, lan ba tjok wlo, Sbö irbo li miyde pjlu anmoyö wlo.

27-28 E irgo ga Apolos to jek shäng Acaya kjokyo le, ga kura ba pjeyoga Jesús tjlökwo kragaga löng lirë. Eni ga kong kjibokwo tara lok kwara, söya twe

---

\* **18:21** Tek dëdashko ga kjibokwo ëre jyā shiraba oblë oblë ara. Ga kjone kjone tjlë ga «Tja toe. Woyde ga tja jek äär Jerusalén kjokyo dbar shrëkkio dbaryo tjwe lishko.»



Jesús tjlōkwo kragaga löng Acaya kjokyo li kong wlo, äär eshko ga wlokjre lok pjlú wlo le.

Jek öötong Acaya kjokyo ga tjlēno judíoga löng eshko Tjlapga Jesús tjlōkwo woydē llēm wleniyo kong jlōkoyo. Sbō tjlōkwo tak pjang li go ga pina ba kong ga no pjluyo iche lara Sbörē li, e Jesús. Ga tjlōkwo kjlopswē lok kar kar eng tjokshko ga judíoga li zāya enidoe. Ga Sbō wopjlú li kjīshko ga ba tjlōkwo kragaga löng eshko li, e kjimtara tek dāmār ba tjlōkwo kjrē. Eshko ga epga kjimtara Apolodē ara bakoe.

## 19

### *Pablo tjlōkwo lono Éfeso kjokyo*

<sup>1</sup> Apolos sök Corinto kjokyo wopro ga Pablo jek shäng Galacia kjokyo, Frigia kjokyo bakoe. Eni ga öötong shäng Éfeso kjokyo. Eshko ga Jesús tjlōkwo kragaga wlēna tjeng kjlōbö,

<sup>2</sup> ga tjlē ba kong ga «¿Sbō tjlōkwo kjrromishko ga pjāy go Sbō Sēya, e shronore?»

«Ílēme. Sbō Sēya, e ē laydēba borwa kong llēm obi» le lok ba kong.

<sup>3</sup> Kuya ga tjlē ba kong ga «¿Eni ga pjāy warabashko ga e llē loklo?»

«E Juan tjlōkwo kjrromorwa li loklo» le lok ba kong.

<sup>4</sup> Kuya ga tjlē ba kong ga «Juan no wono jlōe. Ęye, llēbo owa shārye löng li, e owa jlōe lara, ga rayara ga wara jer di roshko. Gueniyo ga no tjwe ba irgo li lanyotkara Juandē oba kong, ga woyde ga shji mār ba go dey. Tjlēno shäng li, e Jesús layde» le.

<sup>5</sup> Kuya lok ga epga wara jer di roshko Tjlapga Jesús ko go.

6-7 Domerga wara li doglo sak kjwara kjingsho pjök (12). E irgo ga orkwo iono ba dlu kjing go, ga epga go Sbö Sëya shrono beno kësbang ba tjök. Eni ga beno löng tjlä kjök shto oblë oblë so tjlökwö, ga Sbö tjlökwö roy lara lok oba kong.

8 Ga moglo mya ga Pablo jek iyado judíoga syö uyo jong eshko li roshko. Eshko ga Sbö ber no pjluvo sorë li roy le shäng ara, tjlökwö le shäng li, e jlöe lëba wlo. Tjlëshko ga llëye bangkjre llëme.

9 Gueniyo ga kjong kjong omtjölkwö kjrono llëm, llëye kuya lok woydë llëm kjishko. Ga Irbo Tjaglën li läywe lok owa oba boksho. Eni ga Pablo opkjono jek ey dwayo, ga Jesús tjlökwö kjragaga li söra jek oppizlong uyo jong kjwara roshko, u li sogo ko Tirano. Eshko dbar kjwobi go ga Sbö tjlökwö lanyotkara ba tjök ara.

10 Ga shäryara eni öötong lu pjloglo pjök. Eni ga Tjlapga Jesús tjlökwö shdöktong nopga löng Asia kjokyo uunkong kong, judíoga kong, nopga judío llëm wleniyo kong bakoe.

11 Eshkoshko ga Pablo kong dbo twara Sbörë kësbang, llëbo iydëba llëm wleniyo shärye kësbang wlo.

12 Eni ga jangsher, shwong llë, e pjono ba go dö ëmdë ga sökoba, twëba swlopga kong ga poptë, twëba nopga goshko Ä sëyaga li kong ga sëya li to ba go dwayo bakoe.

13 Judíoga kjong kjong to löng kjök kjrinasshko kjrinasshko Ä sëyaga tjeng oba goshko li ichë ä wleniyo. Eshko ga Tjlapga Jesús koiarga lok pjang sëya li iche wlo bakoe lara. Ga tjlä ga «Pablo to shäng Jesús roy lë, ga lër bop kong Jesús ko goshko

ga Ä säya, pja opkjös no kjwe goshko dwayo» le jong eni.

<sup>14</sup> Eshko ga domerga löng doglo kjäk (7), Esceva wapga. Esceva, e judío, syöshtaga kägäyo bakoe. Ba wapga doglo kjäk (7) li to löng Ä säyaga ichë Jesús ko goshko bakoe.

<sup>15</sup> Pjlara ga shäryara lok enishko ga Ä säya li tjlä ba kong lok ga «Tja Jesús miydë, Pablo miydër bakoe. ¿Gueniyo ga pjäy ëro?» le.

<sup>16</sup> Jekdo eshko ga domer goshko Ä säya pjang li jek zrow pjä ba goshko lok erä. Ba dbo ara go ga tjeng doglo kjäk (7) li shpora ara, shwong llë dwlëra dret, sho llë dwlëra srëng ara, ga zana tjë jïkong. Eni ga to töktong lok u li roshko dwayo, kjlop dret, ba llëmdoe.

<sup>17</sup> Kuya Éfeso sopga uunkong, judíoga, nopga judío llëm wleniyo lirë ga beno löng säya llëm, bangkjre arae. Eni ga Tjlapga Jesús ko li iara lok tjwlö ara.

<sup>18</sup> Eshko ga Jesús tjlökwö kjrägaga ara tjwe löng llëbo owa shäryara lok tek dënashko li lë oba uunkong bokshto.

<sup>19</sup> Ga epga ara parkono löng ybipga wleniyo li, ba oppingglo kjibokwo shoyo söya tjwe löng, ga sura iökshko dret oba bokshto. Ga ba kjibokwo sura lok kës li tjwlö iak dbur sho pjublún kjwo sak dbäw dbäw pjloglo sak shkëng (50,000).

<sup>20</sup> Eni ga Tjlapga Jesús tjlökwö shdöktong llaw pogo, ga tjlökwö kjrëba jek këgong këgong.

<sup>21</sup> E irgo ga llëbo shäryono kës li irgo ga Pablo wotjlik jek Macedonia kjokyo, Acaya kjokyo go jongya Jerusalén kjokyo wlo le. Ga wotjlik kjrina

obi ga «Löng Jerusalén kjokyo li pjlroror pjir ga tja jongya Roma kjokyo bakoe» le.

<sup>22</sup> Eni ga ba kjimtagaga ichara do pjök jongya Macedonia kjokyo ba bäm go, epga Timoteo, Erasto. E wopro ga e beno sök eshko Asia kjokyo dbar kjwöböso obi.

### *Éfeso sopga woksera löng ara*

<sup>23-29</sup> Éfeso so sböpga kjlara ko Artemisa, ba syö uyo jong eshko. Eshko ga domer sök kjlara ko Demetrio, ba pak baïya, e llëbo jyäglo shäryaga dbur sho pjlublün go. Domer, e Artemisa syö uyo li jyäglo shäryaga. E go ga dbur shak ara, ba parkagaga parkë löng ba tjok li tjok. Eshko dbaryo ga llëbo jyäglo shäryagaga uunkong li töna, ga tjlä ba kong ga «Pjeyoga, miydëmi pjlu ga shji mär bi pak ëre go. Eerishko ga Asia kjokyo kjok kjwang jikong ga bi sbö kësband Artemisa li poshrëy löng iyado. Gueniyo ïmi löng, kumi löng ga Pablo to shäng tjlä oba kong ga sböpga jyäglo shäryaga norë li, e llëno llëme le. Eni ga nopga kjlopswë ara ba shwo lëkong, ga shärye eni li jüshko dö llëm, Asia kjokyo uunkong seke. Llëbo ëre owa bi kong, bi pak ëre iëba ber tjwlö llëm ga jer bi shjiryo. Erö llëme. Eshko ga Artemisa syö uyo jong jüshko li, e ber tjwlö llëm bakoe. Eni ga bi sbö om go li woydëba ame, ba tjwlö kësband li iëba ber llëno ame» le.

Kuya lok ga iirkono ara, öö le lok arae. Tjlä lok dbo go ga «¡Éfeso so sbö Artemisa li, e tjwlö kësband!» le. Eni ga Éfeso sopga woksera löng tjë jikong. Eshko ga Pablo yorkagaga wlëna löng do

pjök ko Gayo, Aristarco, epga Macedonia so. Ga shara lok, dopshira, söra öötong löng no tönzlong uyo jong eshko lishko.

<sup>30</sup> Eni ga roy kuya Pablorë ga jek opzrëk woydë eshko, lan nopga löng li tjok wlo lara, gueniyo ichara Jesús tjlökwo kfragagarë llëme.

<sup>31</sup> Eshko ga tjlapgaga tjlwlo kësks Asia sopga kong wleniyo löng eshko kjlobö, epga Pablo pjeyoga wleni, ga tjlökwo ichara ba kong, to jek opzrëk eshko llëm wlo.

<sup>32</sup> E wopro ga nopga öötong löng no tönzlong uyo li, e woksera löng träk llëme. Löng eshko ara tönö löng llë kjy miyde löng llëme. Ga öö le lok ara, kjlara tjlë oblë, kjlara tjlë oblë bakoe.

<sup>33</sup> Ga judío shäng kjlara eshko ko Alejandro. Domer, e ichara judíoga löng lirë nopga löng kës li bokshto, ga llëye le wlo li lara lok ba kong. Eni ga Alejandro orkwo poyono, pjây kjinkozong loklo wleni.

<sup>34</sup> Gueniyo ga miydara lok ga e judío ga kuya woydë llëme. Ga öö le lok tjë jikong, tjlë ga «¡Éfeso so sbö Artemisa li, e tjlwlo kësbangel!» le jong eni wop ara, ga Alejandro to tjlëno nopga li kong llëme.

<sup>35</sup> E irgo ga nopga löng kës li kjinkara no shäng kjlara tjlapgaga kësks dboryaga wleniyorë, ga tjlë ba kong ga «Pjeyoga Éfeso so. Shji iak beno löng bi sbö kësbang Artemisa li syö uyo daga, shji beno löng ba jyäglo ter lono kjok dogo dwayo li daga bakoe. Nopga kjok kjwang jikong so ommydë pjlu ga eni.

<sup>36</sup> E jyõ laga ërë llëme. Eni ga pjäy löng tjëkso guing. Llëbo shäryëmi ga woyotjłimi llëm guing llëme.

<sup>37</sup> Ga domerga söromi kjwe llëye owa shäryara syõ uyo kjıy llëm, llëye lara bi sbö kjışhko llëm bakoe. ¿Eni ga tek söromi jüşhko ega?

<sup>38</sup> »Eni ga Demetrio, ba parkagaga, ëye rote woydë wleni ga tjlapgaga no llgwega löng kjweshko, ĩzĩa. Woyde ga ba llgwewzlong dbaryo ga koshe löng llgweya wlo. Eshko ga shji ëng rotë ga pjlúe.

<sup>39</sup> Ga pjäy llëbo rokë woydë obi ga lëmi shji tönö löng uunkong dbaryo bek lishko ga llgwey bomi kong eshko jä.

<sup>40</sup> Llëbo shäryono jüşhko li, e tjwe bi kong owa kjwe. Shji oba iono ëngkjwë ara le bi ichagagarë kjwe. ¿“¿Oba shdöktong löng kjweni ega?” lara lok bi kong ga llë loydë ba kong eshko?» le.

<sup>41</sup> Lara eni pjir ga nopga li ichara to pjire.

## 20

### *Pablo to shäng Macedonia kjokyo, Grecia kjokyo*

<sup>1</sup> Nopga shdöktong kës li slano pjir ga Jesús tjłökwö kragaga rokara Pablörë, poshdüya wlo. Poshduna pjir ga «Tja toe» le, ga to jek Macedonia kjokyo.

<sup>2</sup> Öötong shäng eshko ga jek shäng Jesús tjłökwö kragaga löng li dbo ië kjok kjrınashko kjrınashko. E irgo ga to jek öötong shäng Grecia kjokyo,

<sup>3</sup> ga beno sök eshko moglo mya.

E irgo ga opshik to jongya Siria kjokyo le. Brikdo, opyë kjyong kësbang roy larashko ga roy

kuya ga judíoga wotjlik ba zrök le lëba. E kjishko ga wotjlik to iröng pjö lëkong Macedonia kjokyo go shara le.

<sup>4</sup> Ba yorkagaga jek löng ba tjok li ëre: Sópater, e Pirro wa, Pirro, e Berea so; Aristarco, Segundo, epga Tesalónica so; Gayo, e Derbe so; Tíquico, Trófimo, epga Asia so; Timoteo bakoe.

<sup>5</sup> Epga uunkong jek löng borwa bäm go, ga tjawa koshe öötong löng Troas kjokyo. Gueniyo tjawa beno löng Pablo tjok.

<sup>6</sup> Tjawa beno löng Filipos kjokyo äär jong pjlung shosho suk pjir shäryak ba uukklo tjok llëm dbaryo li pjitong guing. E irgo ga tjawa opshino jek Filipos kjokyo dwayo äär jong dlung kjako, ga tjawa opyono kyyong kësbang roy, ga tjawa jeke. Öötong dbargwo shkëng (5) ga epga dosharorwa öötong löng Troas kjokyo. Ga tjawa beno löng eshko dbargwo kjäk (7).

### *Dwlas wolono kjlara, ga woshrra Pablorë iröng obi*

<sup>7</sup> Öötong dbar sondëshko ga tjawa töno Jesús tjlokwo kragaga tjok, ië wlo. Ga Pablo tjläno nopga löng li kong. Ga opshik eshko dwayo wëshko le kjishko ga beno shäng tjlä wop ara äär jong kjok ronge.

<sup>8-9</sup> Ga tjawa töno löng lishko ga yongyo shäryak jem jong ëng kopshko llögong llögong äär jong kjringswo myashko, tjawa löng li ey. Eshko ga iök borkek lok shjiy arae. Ga dwlas shäng kjlara eshko ko Eutico, ga sirkeno sök u bäng bäng go. Eshko ga Pablo tjlä shäng kjër wopro ga Eutico sök ga poywõ

ara. Wop ara ga pono, ga lono jer jong kjokshko dwayo äär jong töshko, ga wolonoe.

<sup>10</sup> Eni ga Pablo oplono jer ba ïk, ga opburgö dwlas li kjing go, ga popjlura. Eshko ga tjlä nopga löng li kong ga «Pjãy woydë llëme. ¡Buk së!» le.

<sup>11</sup> E irgo ga Pablo jem kjomo iröng obi, ga pjlung shosho suk pjir shdöra, ga uara tjlökwö kragaga löng li tjok, ga beno shäng tjlökwö le ba kong obi äär jong kjok shränto. E irgo ga toe.

<sup>12</sup> E irgo ga dwlas lira söra lok jek ba ushko së. E kjïshko ga ba pjeyoga beno löng wopjlú anmoyö.

*Pablo tjlökwö lono tjlapgaga Jesús tjlökwö kragaga kägäyo löng Éfeso kjokyo li kong*

<sup>13</sup> E irgo ga Pablo beno shäng Troas kjokyo obi, ga tjawara opshino jek ba bäm go, tjwe jong Asón kjokyo kyyong kësbang go. Woyde Pablorë ga jek pjö lëkong, ga koshërwa löng eshko.

<sup>14</sup> Eni ga Pablo tjwe shäng eshko, ga töno borwa tjok, ga opyono jek shäng kyyong kësbang roy borwa tjok. Eni ga tjawa jek äär löng Mitilene kjokyo.

<sup>15-16</sup> Wëshko ga tjawa opshino eshko dwayo, ga tjawa jek löng Quío kjokyo, e bokshto. Wëshko ga tjawa jek äär löng Samos kjokyo. Woyde Pablorë ga tjawa slan ber löng Éfeso kjokyo llëme le, äär Jerusalén kjokyo judío dbar shrëzlong dbaryo kowe lok Pentecostés li bäm go wlo. E kjïshko ga wëshko ga tjawa öötong löng Mileto kjokyo.

<sup>17</sup> Eshko ga no ichara Pablorë tjlapgaga Jesús tjlökwö kragaga kägäyo löng Éfeso kjokyo li rokë.



18 Eni ga öötong löngshko ga Pablo tjlë ba kong ga «Dënashko ga tja tek shrono shäng Asia kjokyo ëreshko ga tja beno shäng bomi tjok dbar kop ara. Llëye shäryoror eshko li miydëmi pjir tjan.

19 Eshkoshko ga judíoga kjong kjong opyono beno löng bor wloyo. E kjïshko ga llëbo weno bor kong owa ara, ga tja beno shäng woydë ara bakoe. Gueniyo tja beno shäng parkë Tjlapga Jesús kong wotöy İyadoe.

20 Tja Sbö tjlökwo lono oba uunkong bokshto, ga pjäy pinor öör bomi ushko bakoe. Eshko ga tjlökwo llë ber pjlu bomi kong wlo li, e loror bomi kong pjir, llëye bangkjrër llëm wleni.

21 Eshko ga tja tjlëno shäng tjlökwo kjwaraso judíoga kong, nopga judío llëm wleniyo kong bakoe. Tja tjlë ga “Llëbo owa shäryëmi löng li, e owa jlöe lozï, ga rayozï, ga pjäy optwos Sbö kong dey, ga pjäy mär ber löng bi Tjlapga Jesús go” lër shäng eni İyado.

22 »Ga eerishko ga tja jongya Jerusalén kjokyo, tja iche Sbö Sëyarë jek eshko kjïshko. Gueniyo llëye wen bor kong eshko li miydër shäng llëme.

23 Miydër shäng li, e kjrinaso. Tja to shäng kjok shto oblë oblë lishko ga Sbö Sëya tjlë bor kong ga “Llono ga pja iëba ber shäng no shdüzlöng uyo roshko, ga llëbo wen oblë oblë bop kong bakoe” le bor kong eni.

24 Gueniyo bor kong ga tja wolonde, de llëm, e llëye llëme. Woydër li, e kjrinaso. Pak twara Tjlapga Jesúsde bor kong shäryër wlo le li, tja wolonoshko ga e shäryoror pjire. Ga pak li, e shji kjimte woydë Sbörë sorë li roy pjlu shdör oba

kong.

<sup>25</sup> »Ga pjây kong Sbö ber no pjluyo sorë li roy loror bomi kong ara. Gueniyo lër bomi kong ga tja ïmi ame.

<sup>26-27</sup> Llëye woyde Sbörëli, e loror bomi kong dret, llëye bangkjrër llëm wleni. E kjïshko ga lër bomi kong ga pjây miydaga ber tjarë ame.

<sup>28</sup> Sbö tjlökwo kragaga tjwlëna ba Wa srëng li go pjir, ga pjây iara ba Sëyarë beno löng ba dë. E kjïshko ga pjây wlëp llëme. Pjây opdos yõtso. Jesús tjlökwo kragaga dëmi, öng wlëp ushko so de ba dagarë wleni.

<sup>29</sup> »Miydër pjlú ga tja opshino kjok jüshko dwayoshko ga domerga owa tjwe opzrëk bomi tjrëko ara, ga Jesús tjlökwo kragaga löng li barwe ara, shjiti kjloy so iir ä wleniyo tjwe öng llë uë wleni.

<sup>30</sup> Ga kjone kjone löng bomi tjrëko ëmdë ga opyë löng jyörkë, ga Sbö tjlökwo le lok bomi kong bëy llëm, Jesús tjlökwo kragaga jyâpgwe jek ba shwo lëkong wlo le.

<sup>31</sup> E kjïshko ga pjây sjëke. Woyoshrozï ga lu pjloglo mya ga pjây poshdunor boryo go shkë dba, pjây kjlarashko kjlarashko.

<sup>32</sup> »Era eni, pjeyoga, eerishko ga pjây iër ber tjeng Sbö wloshko, pjây de wlo, ga shji kjimte Sbörë sorë tjlökwoyo li, e ber pjang bomi daga bakoe. Pjây jëk tjlökwo li go ga pjây opping ba miydë pjlú jek këgong këgong. Eni ga llëbo pjlú twe ba nopga baïya kong wlo li, e twe bomi kong bakoe.

<sup>33</sup> »Ga llëye oma ï, e koïnor llëm, dbur llëm, shwong llëm bakoe.

<sup>34</sup> Eni llëme. Miydëmi pjłú ga tja parkono bor orkwo om go goshko, llëbo woydër bor kong, bor yorkagaga kong li tjwlën wlo.

<sup>35</sup> Ga pjây pinor eni, woyde ga shji parkë eni, oblë lōng llëbo woydë li kjimtëy ga pjłú wlo. Tjłkwo lara Tjlapga Jesúsde li, e woyoshrozĩa. Tjłëno ga “Llëbo kjroroy ga shji wopjłúe. Gueniyo ga llëbo tworoy oblë kong ga shji wopjłú e kjinmo” lara eni» le.

<sup>36</sup> Lara eni pjir ga kjök torgö sök Jesús tjłkwo kjraga kägâyoga lōng li tjok, ga syöshtono Sbö kong.

<sup>37</sup> Eni ga epga slatong lok uunkong, ga Pablo popjłura uunkong lirë, ga lõ shira lok bakoe.\*

<sup>38</sup> Eshko ga Pablo tjłëno ba kong ga «Tja toe. Tja ïmi ame» lara ba kong kjışko ga epga woydono lok arae. E irgo ga tyara lok öör jek lōng kyyong kësband buk lishko, to wlo.

## 21

### *Pablo to jek Jerusalén kjokyo*

<sup>1</sup> «Tjawa toe» lororwa borwa pjeyoga kong pjir ga tjawa opyono kyyong kësband roy jek bek jongya Cos kjokyo. Wëshko ga tjawa opshino eshko dwayo, ga tjawa jek lōng Rodas kjokyo, e irgo ga tjawa jek öötong lōng Pátara kjokyo.

<sup>2</sup> Eshko ga kyyong kësband wlënorwa pjang kjlara brik pjang kjwlë to jongya Fenicia kjokyo wlo le, ga tjawa opyono ba roshko, ga tjawa jeke.

<sup>3</sup> Tjawa jek lōng eni ga tjawa kjër pjola ga dlung tjreko ko Chipre li ïnorwa, e ber buk orkwo milëkong. Ga tjawa jek lōng Siria kjokyo, öötong

---

\* **20:37 Lõ shik** lanyo, e tak pjang Génesis 27.26 go.

tjyono löng Tiro kjokyo, llëbo söya kjoyong sogorë li shiya lok ber eshko wlo.

<sup>4</sup> Eshko ga Jesús tjlökwo kragaga wlënorwa löng kjlöbö, ga tjawa beno löng ba tjok eshko dbargwo kjäk (7). Eshko ga Sbö Sëya tjlë tjlökwo kragaga li kong ga «Llëbo wen Pablo kong owa Jerusalén kjokyo» le. E irgo ga lano lok Pablo tjok, jem Jerusalén kjokyo llëm wlo.

<sup>5</sup> Gueniyo ga jlö lara llëme. Öötong dbargwo kjäk (7) ga tjawa opshino to ey dwayo. Eshko ga epga, tjawa yorkara jer löng dlung kjako, ba boyga, ba wapga tjok. Eshko ga tjawa kjök tonö tjë jikong, ga tjawa syöshtono Sbö kong.

<sup>6</sup> «Tjawa toe» lororwa ëng kong pjir ga tjawa opyono kjoyong roy, ga epga sano jek ba ushko iröng obi.

<sup>7</sup> E irgo ga tjawa jek dlung kjing go Tiro kjokyo dwayo öötong löng Tolemaida kjokyo. Eshko ga Jesús tjlökwo kragaga löng kjlöbö, ga «¿Pjây yonde?» lërwa ba kong. Eshko ga tjawa beno löng ba tjok.

<sup>8</sup> Wëshko ga tjawa opshino eshko dwayo, ga tjawa jek öötong löng Cesarea kjokyo. Domer shäng kjlara eshko ko Felipe, e kowëba Jesús tjlökwo roy pjlu' laga lëba. Dli pjlorgaga kprak doglo kjäk (7) dënashko li, kjlara li e. Ga tjawa beno löng ba tjok ba ushko.

<sup>9</sup> Felipe wapga tjeng doglo pkëng (4), kjogloga. Olö ga tjlökwo le Sbörë ba kong, ga le lok oblë kong eni.

<sup>10</sup> Tjawa löng eshko dbar kjwöbö tjänshko ga domer tjwe shäng kjlara Judea kjokyo dwayo ko Agabo. E Sbö tjlökwo laga.

11 Öötong shäng borwa shwoy ga Pablo dop pjrikklo li kjrara, ga oppjrino e go, ba orkwo go, ba dre go bakoe. Eshko ga tjlẽ ga «Sbö Sëya tjlẽ ga “Dop pjrikklo ëre sogo, e äär shäng Jerusalén kjokyo, ga pjriya judíoga löng eshko lirë jûni bakoe. Ga twe lok tjlapgaga nopga judío llëm wleniyo kong, llgweya wlo” le eni» le.

12 Kurwa ga tjawa tjlẽ Pablo kong ga «Pja jem Jerusalén kjokyo llëm dey» lërwa eni pjlaraso llëme. Cesarea sopga omfono ba kong eni bakoe.

13 Gueniyo ga tjawa dboryara Pablorë. Tjlẽ ga «¿Pjây slar ega? ¿Tja iëmi woydëshko eni ega? Tjlapga Jesús kjïshko ga tja shäng pjrikoba kjok orë koshë. Gueniyo erö llëme. Tja shäng zrökoba Jerusalén kjokyo wlo bakoe» le.

14 Tjawa kole woydë llëm kuzong ga tjawa tjlẽ ba kong ga «Ílëye woyde Tjlapgarë li, e ber eni» lërwa.

15 E irgo ga tjawa poshãryono uunkong, ga tjawa opshino to jem Jerusalén kjokyo.

16-17 Eshko ga tjawa yorkaga Jesús tjlökwo kjragaga kjong kjong Cesarea so lirë. Ga tjawa öötong löng Jerusalén kjokyo shko ga tjawa söra lok domer shäng kjlara eshko ko Nasón li shwoy. Domer, e Chipre so, gueniyo sök Jerusalén kjokyo. Jesús tjlökwo kjragaga tek dãmãrshko li, kjlara li e. Ga tjawa beno löng ba ushko.

### *Pablo shäng Jerusalén kjokyo*

Jerusalén kjokyo ga tjawa wlokjara borwa pjeyoga Jesús tjlökwo kjraga löng lirë woowa llëme.

18 Wëshko ga Pablo jek Santiago ïk, ga tjawa jek ba tjok bebi. Tjawa öötong löng eshko ga tjlapgaga

Jesús tjlökwo kjraga kägäyo töno löng uunkong eshko,

<sup>19</sup> ga «Miga» lara Pablorë ba kong. E irgo ga llëye shäryara Sbörë nopga judío llëm wleniyo kong ba kjishko li, e lara ba kong pjire. Larashko ga llëbo shäryono chirawayo ëmdë li, e lara pjir bakoe.

<sup>20</sup> Kuya lok ga Sbö poshrëra lok ara. E irgo ga tjlë lok ba kong ga «Pablo, pja borwa kjlara. Tjlökwo lërwa woydë bop kong kjrina. Miydëp pjlu ga judioga Jesús tjlökwo kjrägaga löng träk llëm, shtëy ga äär llëme. Ga epga uunkong tjlë ga “Kjok llgwekklo tara Moisésdë li, e tjwlö ara. E rayako llëme” le lok eni.

<sup>21</sup> Ga roy kura lok ga pja to shäng omlë oblë. Judioga löng nopga judío llëm wleniyo tjreko li pim shäng “Llëye tara Moisésdë li, e rayëy ga pjluë” lëp to shäng eni ba kong. Ga pja tjlë ga “Bi wapga, e doyo jyã tëy llëm ga pjluë. Bi sdëkwo tek dënashko dwayo li, e shäryëy ame bakoe” lëp shäng eni.

<sup>22</sup> »Eni ga pja shrono shäng jüshko, e roy kuya lok kjluwe. ¿Eni ga llëye shäryëy?

<sup>23</sup> Pjlu wlo ga llëye lërwa bop kong li shäryos dey. Shji löng jüshko ëre tjreko domerga tjeng doglo pkëng (4), dämär ga käkzong shtë llëm dbar kjwöbö lara lok Sbö kong, ga e dbaryo li pjir döröe. Shärye löng, tara Moisésdë sorë li eni.

<sup>24</sup> Woydërwa ga epga sös jek bop tjok. Ga pja opyë ba tjok, llëye shäryëy lara Moisésdë, shji äär Sbö poshrëk ba ushko ga pjlu wlo li, e shäryëp ba tjok eni eshko. Ga kä shtaga potjwlëga ber pjarë, pjäy uunkong kong. Eni ga pja iya nopga uunkongdë, ga miyde lok e go ga tjlökwo laraba kës bop kjishko li, e jyö eröe. Pja ëmdë ga kjok

llgwekklo tara Moisésdë li kolëp shäng bebi, miyde lok e go ga wëïëe.

<sup>25</sup> »Nopga judío llëm wleniyo Jesús tjlökwo kjruga lira, llëye shärye lok wlo li, e tororwa beno ba kong pjir tjän. Tjawa tjlëno ba kong ga “Dli llë twak sböpga jyäglo kong li sho uëy llëm, öng zrök kjoyotso skuya i li sho uëy llëm, srëng llë uëy llëm, ga shji orkwosmono ë tjok llëm ga shji pë ba tjok llëm bakoe” lororwa ba kong eni» le.

*Pablo sharaba Sbö u zlong bäng*

<sup>26</sup> Eni ga domerga doglo pkëng (4) lara li söra Pablorë jek ba tjok. Wëshko ga opyono shäng ba tjok, ga llëye shäryëy lara Moisésdë, shji äär Sbö poshrëk ba ushko ga pjlu wlo li, e shäryara ba tjok pjire. E irgo ga jek öötong shäng Sbö u zlong bäng, ga ba dbaryo pjir llono, Sbö sëngglo söya eshko wlo li söya llono, e lara tjlapgaga löng eshko li kong pjire.

<sup>27</sup> Eni ga dbargwo kjäk (7) koshe löng li pjitoe. Eshko ga Pablo öötong shäng Sbö u zlong bäng. Eshko ga judióga löng kjlöbö Asia so. Pablo ïya lok ga öö le lok ara, ga nopga löng eshko li shdöra lok jong träk llëm, ga jek rish Pablo kjing go.

<sup>28</sup> Eshko ga tjlë lok nopga li kong dbo go ga «¡Israel tjëyoga, tjawa kjimtozïa! Domer to shäng oba ping owa kjok shto oblë oblë li ëre. Llëye le to shäng li, e shji Israel tjëyoga ëre wloyo, kjok llgwekklo tara Moisésdë li wloyo, Sbö u ëre wloyo bakoe. ¡Erö llëme! Nopga söra tek shrono kjlöbö jüshko judío llëm wleniyo. ¡E go ga shto iak beno buk dboy Sbö kong ëre, e iara beno buk eni ame!» le.

<sup>29</sup> Lunashko ga Pablo ña lok shäng kjok shto oblë Trófimo tjok, e Éfeso so, e judío llëm wleniyo. Ga epga wotjlino lok ga söra Pablorë öötong löng Sbö u zlong bängdo lara. «Sbö u iara beno jong dboy ba kong ame» lara lok e kjishko, miga eni llëme.

<sup>30</sup> Eni ga nopga shdöktong llaw pogo kjok eshko kjwang jikong, ga tjwe zron jong Sbö u zlong bäng. Ga Pablo shara lok, dopshira Sbö u jong lishko dwayo jek kjoko, ga Sbö u kjeryo bäng bängzara jek kjlöw erä.

<sup>31</sup> Eshko ga Pablo zröyde lok. Eni ga roy sökoba jem äär ëngkjwaga Roma so kägäyo kësbangyo li shwoy, tjlä ba kong ga «Pja wlëp llëme. Jerusalén soppa dew töshko shdöktong jong träk llëme» lëba eni.

<sup>32</sup> Kuya ga ba ëngkjwagaga töna ba kägäyoga tjok, ga jer lok zron jong nopga tjeng kës lishko. Ñya nopga lirë ga Pablo shpora ame.

<sup>33</sup> Eshko ga tjlapga li jek öötong shäng Pablo shwoy ga shara. Eshko ga ba ëngkjwagaga ichara ba pjrik, ba pjrikklo shäryak dröng sho go pjloglo pjök go, ga tjlä nopga tjengli kong ga «¿No kjwe ëro? ¿Llëye shäryara?» le.

<sup>34</sup> Gueniyo ga öö le lok ara, kjlara tjlä oblë, kjlara tjlä oblë bakoe. Eni ga nopga shdöktong löng kës li kuzong ga llëbo bëy li kjone dey miyde tjlapga lirë shäng llëme. E kjishko ga tjlä ba ëngkjwagaga kong ga «Domer kjwe sözi jem kjomo, bi ëngkjwaga shtoyo buk lishko» le.

<sup>35-36</sup> Eni ga söra lok jek äär shäng tyozlong jem kjomo wlo lishko. Eshko ga nopga tjeng kës li iirkë ara anmoyö, jek löng ba irgo, öö le lok träk llëme. Tjlë ga «¿Zrözi!» le jong eni. E kjishko ga Pablo jek



om go ame, shakza ëngkjwagaga kjlëbö lirë pjä, ga söra lok jem pjang kjomo.

*Pablo tjlëno nopga tjeng ara li kong*

<sup>37</sup> Eni ga Pablo zrëya lok jek löng lishko leshko ga Pablo tjlë ëngkjwaga kägäyo kësbangyo li kong ga «¿Tja tjlë bop kong sira ga buere?» le ba kong, gueniyo lara tjlapga li tjlökwo go.

Kuya ga tjlë ga «¿Pja tjlë Grecia so tjlökwo pjlúro?

<sup>38</sup> Kjupäbäshko ga Egipto so shrono shäng kjlara jüshko, ga nopga owa no zrök ä wleniyo, e tona doglo sak dbäw dbäw pjloglo pkëng (4,000). Ga epga söra jek kjok dogro no llëmshko, ëngkjwë tjawa Roma so tjok wlo lara. E pjaro loror» le.

<sup>39</sup> Kuya ga «Llëme. Tja judío, tja Tarso so, kjok li tjwlö ara wleniyo, e Cilicia kjokyo obi. Rokër bop kong sira ga tja ichëp tjlë nopga tjeng ëre kong» le.

<sup>40</sup> Kuya ga jlö lara.

Eni ga Pablo kojono shäng tyoklo jem li worbo pjirshko, ga orkwo poyono, pjäy kjinkozong loklo wleni. Kjinkono löng ga tjlëno ba kong lok arameo tjlökwo go. Tjlë ga

## 22

<sup>1</sup> «Pjeyoga, tjlapgaga, rokër bomi kong ga tja kuzia, tja opwlikë wlo» le.

<sup>2</sup> Kuya lok ga Pablo tjlë shäng arameo tjlökwo go kuzong ga beno löng kjing erä. Eshko ga Pablo tjlë ga

<sup>3</sup> «Tja ëre judío. Tja weno buk Tarso kjokyo, e Cilicia kjokyo obi, gueniyo ga tja kuno shäng ëreshko Jerusalén kjokyo. Ga tja oppino shäng Tjlapga Gamaliel tjok, tja pina bi kjok llgwekklo tak pjang

dēnashko li go, llēye kjak llēm, sök beke. Enido ga tja jək shäng Sbō tjok jlōkoyo, pjāy omshäryē löng eerishko sorē ga tja omshäryē shäng eshko eni bakoe.

<sup>4</sup> »Dēnashko ga nopga jək löng Irbo Tjaglën go li, e irpjanor, zrör wlo, ga sharor, ichoror jek no shdūzlöng uyo roshko, shdungoba wlo, domerga, walēga bakoe.

<sup>5</sup> Syōshtaga kēsbangyo, bi tjlapgaga kjok llgwegga wleniyo kēsks, e omīno. E jyō lēmi wleni ga kjakrokozī ba kong. Tja kong kjibokwo twara lok, sör bi pjeyoga löng Damasco kjokyo li kong, nopga Irbo Tjaglën li söga wlēnor li shar ga pjlú wlo, tek sör ēreshko Jerusalén kjokyo, shdungoba wlo.

<sup>6</sup> »Gueniyo ga tja öötong jek shäng ääto Damasco kjokyo lishko dlo dluw dik ga ĩn ga iök shjiy ter tjwe kjok dogo dwayo, jek lletlet, ga tja kopjrina iök shjiy lirē beno pjang pjribrie.

<sup>7</sup> Jekdo eshko ga tja dgono jer töshko, ga kur ga ēbo tjlē ga “Saulo, Saulo, ¿tja irpjam ega?” le.

<sup>8</sup> »Kur ga tja tjlē ga “Tjlapga, ¿pja ë?”

»“Tja Jesús, Nazaret so. Irpjam to shäng wle, e tja” le bor kong.

<sup>9</sup> Bor yorkagaga jek löng bor tjok iök shjiy li ĩna lok, gueniyo ēye tjlēno bor kong ga kura lok llēme.

<sup>10</sup> »Eshko ga tja tjlē ga “Tjlapga, ¿llēye shäryēr ga pjlú?”

»“Pja kojōzong. Pja jongya opzrək jek Damasco kjokyo. Llēye shäryēp wlo li, e lēba bop kong eshko” le.

<sup>11</sup> Ga tja iara iök shjiy lirē beno kjok ĩgō llēm kjīshko ga tja shara bor yorkagagarē bor orkwo go, ga tja söra to öötong shäng Damasco kjokyo.

12 »Domer sök kjlara eshko ko Ananías. Kjuk llgwekklo tara Moisésdë li söya shäng pjlo bek iyado. Roy pjlu judioga löng eshko uunkong'li kong. Ga tjawa öötong löng kjok eshko ga domer li tek shäng bor ik.

13 Eni ga shrono shäng bor zlong bäng ga tjle bor kong ga “Saulo, pja bor kjlara, pja bokkwo poptos iröng obi, pja kjok igö pjlu wlo” le. Jekdo eshko ga tja bokkwo poptono, ga domer li in ga bë shäng wëlle.

14 Eshko ga tjle bor kong ga “Bi tjlapgaga tek dënashko so Sbö, pja kjrara, lleye woyde li miydöp wlo, No Pjlo Bek li ip wlo, lleye le om go li kup wlo bakoe.

15 Ga lleye inop, kurop li, pja ber ba laga oba uunkong kong.

16 Era eni ga lleye koshöp ame. Pja kojözong. Pja nom, pja wëba jer di roshko wlo, ga pja syöshtos Tjlapga kong, owa pjang bop go li löya ber dret wlo” le.

17 »E irgo ga tja tek shrono shäng ëreshko Jerusalén kjokyo iröng obishko ga tja jek öör shäng Sbö u zlong bäng, syöshtë wlo. Eshko ga llebo inor shji yoïno wleni.

18 Tjlapga Jesús inor ga tjle bor kong ga “Pja opshis maling jushko Jerusalén kjokyo dwayo. Pja tjle bor kjishko kjok ëreshko ga tjlokwo kjrëba lleme” le.

19-20 »Kur ga tja tjle ba kong ga “Tjlapga, dënashko ga tja to shäng judioga syö uyo kjwarashko kjwarashko, ga nopga mär löng bop go li, e sharor, söror, ioror beno tjeng no shdüzlong uyo roshko, ga shpoga tjarë om go bakoe. Ga bop roy laga

Esteban lira zrökobashko ga tja shäng eshko. Īn shäng ga 'Zrözĩa' lër shäng eni, ga ba zrögaga li, ba shwong ter lëkong li skwarashko ga tja beno shäng shwong li daga. Llëye shäryoror uunkong ëre, e miydëba löng pjire" lër.

<sup>21</sup> »Gueniyo kuya ga tjlë bor kong ga "Pja nomo. Pja ichër to kjok pjola bor roy lë nopga judío llëm wleniyo kong" le bor kong» le.

<sup>22</sup> Llëye le shäng li kura lok öötong eshko döe. Eshko ga öö le lok tjë jïkong, tjlë ga «¡Domer kjwe zrözĩa! ¡Shäng kjok ëre kjing go ame dey!» le lok eni.

<sup>23</sup> Ga öö le lok jek këgong tjë jïkong, ga ba shwong kop lëkong li skwara lok, ga dbuya llaw pogo, ga klung sho pjlungyo kjre, ga dbuya lok jem jong kjomo ëng kopshko.

### *Pablo shpoya no dagagarë lara, ga opwlikono*

<sup>24</sup> Eshko ga ëngkjwagaga li ichara ba kägäyo kësbangyo lirë Pablo sök ëngkjwaga shtoyo li roshko, shpoya lok no shpokklo go wlo, nopga shdöktong llë kjïshko le ba kong wlo.

<sup>25</sup> Eshko ga Pablo pjriya löng kjwlëshko ga tjlë ba kong lok ga «¿No Roma so kjibokwo tjok li, e llgwemirë llëm obishko ga shpomi ga pjlüre?» le.

<sup>26</sup> Kuya ba kägäyo lirë ga jek jong ba kägäyo kësbangyo li shwoy, ga tjlë ba kong ga «Domer kjwe Roma so kjibokwo tjok. ¿Eni ga kjwëp llong?» le.

<sup>27</sup> Kuya ga jek öötong shäng Pablo shwoy ga tjlë ba kong ga «¿Jlökoyo ga pja Roma so kjibokwo tjokde?»

«Ëng» le ba kong.

<sup>28</sup> Kuya ga tjlē ba kong ga «Tja Roma so kjibokwo shik wlo ga tja dbur zano ara» le ba kong.

Kuya ga tjlē ba kong ga «Tja data Roma so kjibokwo tjok. E kjīshko ga tja eni tek buk chirawa obishko dwayo» le.

<sup>29</sup> Jekdo eshko ga epga löng ba shpok wlo lara li, e opkwono eshko dwayo. Ga miydara tjlappa lirēshko ga bangkjrara ara bako, Pablo kjrochara, shpoya wlo lara kjīshko.

### *Pablo söraba tjlappaga bokshto*

<sup>30</sup> Wēshko ga engkjawaga kägäyo kēsbangyo li wotjlīk shäng ga «¿Pablo kjwe shdungko le judiógarē, gueniyo llē kjīshko? Miydēr woydē yōtsoe» le. E kjīshko ga ba dröng sho ba pjrikklo li döra, ga judióga syōshtaga kägäyoga, Judío Kjuk Llgwegaga Kēskesyo, e rokara tön eng tjok wlo. Töno lok ga Pablo shira, iara shäng ba bokshto.

## 23

<sup>1</sup> Eshko ga Judío Kjuk Llgwegaga Kēskesyo li ŷya Pablorē dräng, ga tjlē ba kong ga «Pjeyoga, tja parkono Sbö kong pjlú, ga tja opshäryē shäng pjlo bek Sbö bokso lēr eni bor pjlúshko» le.

<sup>2</sup> Kuya syōshtaga kēsbangyo ko Ananías lirē ga tjlē ga «Pablo kjwe shpozī ba kjakshko» le oba löng ba soshko li kong.

<sup>3</sup> Kuya Pablorē ga tjlē ba kong ga «¡Pja shpoya Sbörē! Pja so llēbo poglo poshtik pjlublún, owa llēm, gueniyo roshko ong kjoyoe. “Tja domer pjlúe” lēp shäng, gueniyo pja eni llēme. Pja sök kjweshko, tja llgwegap kjok llgwekklo tara Moisésdē li go wlo lēp, gueniyo kjok llgwekklo li söp sök pjlo

bek llëme. Söp kjwe pjlo bek ga pja no ichë bor kjak shpok llëme» le.

<sup>4</sup> Kuya nopga tjeng Pablo zlong bäng lirë ga tjlë lok ba kong ga «¿Syöshtaga Sbö kong kësbangyo kjwe äyoshtëp kjweni ega?»

<sup>5</sup> «Pjeyoga, kjwe syöshtaga Sbö kong kësbangyo, e miydoror llëme. Miydoror kjwe ga loror eni llëme. Sbö tjlökwo tak pjang eni: “Bi pjluvo, bi llgwega, e läywëy owa wlo llëme”»\* le.

<sup>6-8</sup> Eshko ga miyde Pablorë ga kjok llgwegaga löng li, kjong kjong saduceoga, kjong kjong fariseoga. Saduceoga wotjlík ga shji wolono ga shji woshre ame le, Sbö parkaga kjok dogo so, e drete le, sëya llë drete le bakoe. Gueniyo fariseogara wotjlík oblë. Shji wolono ga dbar tjwe ga shji woshre Sbörë iröng obi le, Sbö parkaga kjok dogo so tjok le, sëya tjok le bakoe. E kjishko ga Pablo tjlë ba kong dbo go ga «Pjeyoga, tja fariseo, tja data fariseo bakoe. Tja wotjlík ga shji wolono ga dbar tjwe ga shji woshre Sbörë iröng obi lër. Ga tja ioromi shäng bomi boksho llgwemi wlo, tja wotjlík eni kjishko» le.

Lara eni pjir ga fariseoga, saduceoga löng eshko li, e tjlë lok ëng tjok kar kar träk llëm, ga tjlapgaga li ëng shdöno beno löng kjring pjök.

<sup>9</sup> Ga nopga tjeng eshko li ëng shdöno beno tjeng kjring pjök, ga öö le lok träk llëm bakoe. Fariseoga löng eshko li kjong kjong no pingga kjok llgwekklo tara Moisésdë li go. Epga kojono lok ga tjlë ga «Borwa kong ga domer kjwe llëbo owa shäryono

---

\* 23:5 Éxodo 22.28.

llëme. Sëya llë, e tjlëno ba kong kjwe, llëm ga Sbö parkaga kjok dogo so li tjlëkdo ba kong kjwe» le.

<sup>10</sup> Eshko ga nopga li shdöktong këgong anmoyö. E kjïshko ga ëngkjwaga kägäyo kësbangyo li ombangkjrongo, wotjlïk ga Pablo sho dwlëkoba sira sira kjwe le. Eni ga ba ëngkjwagaga ichara tjë kara Pablo shik eshko dwayo, söya äär ber sök ëngkjwaga shtoyo lishko wlo.

<sup>11</sup> E shkëyo ga Tjlapga Jesús weno shäng Pablo kong, ga tjlë ba kong ga «Pablo, pja wokjang, llëye bangkjrep llëm shara. Tja roy läyworop oba kong jüshko Jerusalén kjokyo sorë ga roy lëp oba kong Roma kjokyo eni bakoe» le.

### *Judíoga wotjlïno lok Pablo zrök*

<sup>12</sup> Wëshko kjok shröngto ga judíoga kjong kjong ëng töno wotjlïk kjrinaso, Pablo zrök wlo. Ga tjlë lok ëng kong jlökoyo ga «Shji ië llëm, llëye iëy llëm, Pablo zröroy pjir guing. Llëm ga woydëy ga shji shdüya Sbörë» le lok eni.

<sup>13</sup> Ba lagaga eni li, e doglo sak pkëng (40) kjingsho tjok.

<sup>14</sup> Eni ga epga jek syöshtaga kägäyoga, judío tjlapgaga kjok llgwega wleniyo ik. Öötong löng ba shwoy ga tjlë lok ba kong ga «Tjawa tjlëno ëng kong jlökoyo ga “Shji ië llëm, llëye iëy llëm, Pablo zröroy pjir guing. Llëm ga woydëy ga shji shdüya Sbörë” lororwa eni.

<sup>15</sup> E kjïshko ga pjäy, Judío Kajok Llgwegaga Këskësyo llamo li, rokozi ëngkjwaga kägäyo kësbangyo li kong ga Pablo söya tjwe shäng, ga ie bomi bokshto, llëbo shäryara li kjakrokëmi ba kong yötso wlo. Eni ga ter söyde, tjwayde na llëm

obishko ga tjawa ber löng irbo ba koshë, zrörwa wlo» le.

<sup>16</sup> Gueniyo ga Pablo dor, wa shäng kjlara, ga tjlökwö le löng li roy kura. E irgo ga jem opzrëno ëngkjwaga shtoyo lishko, ga jek öötong shäng Pablo iak shäng lishko, roy le ba kong wlo.

<sup>17</sup> Kuya ga ëngkjwaga kägäyo rokara kjlara, ga tjlä ba kong ga «Dwlas ëre sös bor kong sira, bop kägäyo kësbangyo li shwoy. Tjlökwö le woynë ba kong» le.

<sup>18</sup> Kuya ga söra jek ba kägäyo kësbangyo li shwoy, ga tjlä ba kong ga «Domer shdung shäng kjlara ko Pablo, rokara bor kong ga dwlas ëre sör bop boksho, llëbo roy le bop kong wlo» le ëngkjwaga kägäyo lirë ba kong.

<sup>19</sup> Kuya ga dwlas li shara ba orkwö go, ga söra jek tjoksa, ga tjlä ba kong ga «¿Lläye lëp woynë bor kong?»

<sup>20</sup> «Judíoga kjong kjong lano lok ëng tjok, ga wotjlino lok kjrinaso. Bong ga Pablo roke lok bop kong ga söp ba kong jongya ba llgwezlong töno löng lishko, kong llëbo kjakroke lok yötso anmoyö wlo le eni.

<sup>21</sup> Gueniyo ga jlöe lëp llëme. Domerga töno tjeng doglo sak pkëng (40) kjingsho tjok, ga opjneno löng ba koshë irbo le. Tjlëno ëng kong jlökoyo ga “Shji ië llëm, lläye iëy llëm, Pablo zröroy pjir guing. Llëm ga woynë ga shji shdüya Sbörë” lara lok eni. Eni tjok ga posharyono löng pjir tjän, löng bop koshë dboryëp sorë koshayde eröe» le ba kong.

<sup>22</sup> Kuya ga tjlä ba kong ga «Lläye lorop bor kong li lëp ë kong llëme» le, ga ichara toe.

*Pablo icharaba Cesarea kjokyo*



<sup>23</sup> Eshko ga ëngkjwaga kägäyoga rokara do pjök, ga tjlë ba kong ga «Pjäy poshäryozong. Pjesit shkëyo ga pjäy to jongya Pablo sök Cesarea kjokyo. Ëngkjwagaga jëk lok dre go wleniyo sömi jer bomi tjok doglo sak dbäw pjloglo pjök (200), ëngkjwagaga jëk löng kwomgla go wleniyo sömi doglo sak kjäk (70), ga ëngkjwagaga ëngkjwë könkowo go wleniyo sömi doglo sak dbäw pjloglo pjök (200) bakoe.

<sup>24</sup> Ga kwomgla wlëmi pjök mya, Pablo sök wlo. Ga sömi bor kong yötso, äär shäng Cesarea kjokyo pjlú, së obi, kjok eshko so ichaga Félix li shwoy wlo» le.

<sup>25</sup> Ga kjibokwo tara ba kong kjwara, söya, twe Félix kong wlo. Kjibokwo li tjlë ga

<sup>26</sup> «Tjlapga no ichaga tjwlö ara wleniyo Félix:  
»Miga, lër bop kong. Kjibokwo ëre taga tja Claudio Lisiasdë bop kong. ¿Pja yonde?

<sup>27</sup> »Domer jek shäng ëre shara judíogarë, zröya wlo lara. Gueniyo kuror ga e Roma so kjibokwo tjok. E kjishko ga tja öör jong bor ëngkjwagaga tjok, ga wlikoror, döror ba shjiryo.

<sup>28</sup> Eni ga rote lok llë kjïy miydër woydë kjishko ga söror jek ba Kjuk Llgwegaga Këskësyo tönö löng li shwoy, ga ioror shäng eshko ba boksho.

<sup>29</sup> Miga rotara lok llëbo owa shäryara ba kjok llgwekklo baïya kong kjishko döe. Gueniyo bi kong ga kur ga shdüy llë kjïy llëm, zrökko llëm, iako no shdüzlong uyo roshko llëm bakoe.

<sup>30</sup> Gueniyo ga judíoga kjlöbö wotjlik löng ba zrök le li roy söra ba bor kong. E kjishko ga ichër jek bop shwoy, llgwep wlo. Ga loror ba rotagaga li kong ga jek jongya bop shwoy bako, llëye lako ba

kjĩshko li le lok bop kong wlo. Shji ber eni.»

<sup>31</sup> Eni ga ɛngkjwagaga li kong llɛye shɔrye wlo li lara ba kɔgɔyore lok pjir ga toe. Pablo sora lok to jer shkeshko ɔar jong Antipatris kjokyo.

<sup>32</sup> Weshko ga ɛngkjwagaga jek long dre go li sano tjwe long ba ɛngkjwaga shtoyo irong obi, ga jek long kwomgla go li to jek Pablo tjok.

<sup>33</sup> Ootong long Cesarea kjokyo ga kjibokwo soya tjeng li twara lok kjok eshko so ichaga li kong, ga Pablo twara beno ba kong bakoe.

<sup>34</sup> Eshko ga kjibokwo li ina pjir ga tjle Pablo kong ga «¿Pja kjone so?»

«Tja Cilicia so» le ba kong.

<sup>35</sup> Eni ga tjlapga li tjle ba kong ga «Pja llgwer ga pjlu, gueniyo bop rotagaga li shrono guing» le. Eni ga iara beno shang dak dak le, pjlu uyo sharyara pjlu Herodesde denashko li roshko.

## 24

### *Pablo opwlikono Félix boksho*

<sup>1</sup> Ootong dbargwo shkeng (5) ga syoshtaga kesbangyo ko Ananias li ootong shang kjok eshko, judio tjlapgaga kjok llgwega wleniyo kjong kjong tjok. Ga domer jek sora lok shang kjlara obi ba tjok ko Tertulo. E Pablo rotaga, ba llamo long li kjishko wlo le. Eni ga epga jek ootong long no ichaga li shwoy, Pablo rote wlo.

<sup>2</sup> Ga Pablo rokara tjlapga lire, ga soya lok tjwe shang ba boksho. Eshko ga Tertulo omrote, tjle Felix kong ga «Tjlapga no ichaga, pja tjwlo kesbange. Eeri ga ootong lu pjloglo ara tjan ga tjawa long wlep, wopjlu bop kjishko, ga bop kjok miyde

li kjĩshko ga llẽbo shãryorop ara kjok ëreshko beno pjlú, owa llẽme.

<sup>3</sup> E kjĩshko ga tjawa lõng wopjlú bop tjok. Enido kjone pogo ga pja roy lãywe borwa pjeyogarë pjlúe.

<sup>4</sup> Gueniyo pja dbar jerwa ara llẽm wlo ga rokërwa bop kong ga tjawa tjlẽ li kus sira.

<sup>5</sup> »Domer kjwe miydororwa ga kjwe owa. To shãng kjok kjwang jĩkong judiõga barwë ara, shdõya wlo le. Nopga lõng kjok ëreshko kowëba nazarenoga, domer kjwe ba kãgãyo.

<sup>6-8</sup> Borwa Sbõ u li ëmdë ga ie ber jong dboy Sbõ kong ame wlo lara, ga sharorwa eshko e kjĩshko.\* Eni ga jakrokos pjarë om go ba kong. Miydëp e go ga tjlõkwo lërwa lõng ba kjĩshko kës li, e jlõe» le.

<sup>9</sup> Eshko ga judiõga lõng li tjlẽ ga «Eni jlõe» le lok eni.

<sup>10</sup> Eni ga tjlapga li orkwo pingõ Pablo bët, pja tjlëzong loklo wleni, ga Pablo tjlẽ ga «Miydër pjlú ga pja parkë sök jũshko no llgwega lu pjloglo ara tjãn. E kjĩshko ga tja opwlikë bop bokshto wlẽpe.

<sup>11</sup> Eni ga tja tjlẽ li jlõre miydëp woýdë ga jakrokëp ë pogo kong om go ga pjlúe. Eeri ga õõtong dbargwo sak kjwara kjingsho pjök (12) ga tja õõtong shãng Jerusalén kjokyo, Sbõ poshrëk wlo.

<sup>12</sup> Eshko ga tja wlẽna lok shãng tjlõkwo kjlopswë kar kar ëbo tjok llẽme. Ëye shdõror llaw pogo llẽme.

---

\* **24:6-8** Tek dënashko ga kjibokwo ëre jyã shiraba oblë oblë ara. Ga kjone kjone tjlẽ ga «... ga sharorwa eshko e kjĩshko. Llgwerwa borwa kjok llgwekklo go lororwa, gueniyo ga ëngkwaga kãgãyo kësbangyo ko Lisias opzrëno jek eshko ga dõra borwa shjiryõ dbo go. Ga tjawa ichara tek bop shwoy ba rotë.»

Sbö u zlong bäng ga llëye shäryoror llëm, judíoga syõ uyo roshko llëm, shto oblë llëm bakoe.

<sup>13</sup> Tja rote lok li llëbo wlëna jlökoyo bor shdungko wlo drete.

<sup>14</sup> »Gueniyo lër jlökoyo ga nopga jëk löng Irbo Tjaglën li go sorë ga tja omshäryë shäng eni. E kjïshko ga bor rotagaga löng kjwe tjlë ga tja jëk shäng Sbö tjok bëy llëme le, gueniyo borwa tjlapgaga tek dénashko so Sbö li, e poshrër, kjok llgwekklo tara Moisésdë li, e jlõe lër uunkong baïya dik, ga kjibokwo tara Sbö tjlökwo lagagarë li, e jlõe lër bakoe.

<sup>15</sup> Ga tja sök Sbö koshë ga shinmoga, e woshre iröng obi uunkong, pjlo bekde, de pjlo bek llëmde, gueniyo woshre iröng obi. Kjwepga kjwe löng omkoshë sorë ga tja omkoshë shäng eni bakoe.

<sup>16</sup> E kjïshko ga tja drön ara, tja ber pjlo bek Sbö bokso wlo, tja ber pjlo bek nopga bokso wlo bakoe.

<sup>17</sup> »Lu to jek pjloböso ga tja öör jëktong shäng kjok shto oblë oblë ga tja jek öötong shäng iröng obi bor kjokshko, dbur twër oba song wleniyo kong wlo, Sbö sëngglo sör, twër ba kong ba ushko wlo bakoe loror.

<sup>18</sup> Ga tja wlëna kjwepgarë eshkoshko ga llëye shäryërwa lara Moisésdë, tjawa äär Sbö poshrëk ba ushko ga pjlu wlo li, e shäryër pjir shäng kjwlëe. Eshko ga nopga jëk löng bor tjok ara llëm, ga ëye ëng shdök löng llëm bakoe.

<sup>19</sup> Eshko ga judíoga Asia so löng kjlobö, ga llëye lër bop kong li, e ñna lok pjire. Zok ga epga tjwayde löng jïshko om go, opping na bop bokshto, tja rote wlo. Kuya ga llëbo shäryoror sit jlökoyo, tja rote wlo wleni ga le lok om go ga pjluë.

<sup>20</sup> Eni llëm ga shrono löng kjwe, tja shäng ba bokshto no llgwezlong shtoyoshko ga llëye wlëna bor tjok, tja shdungko wleni ga le lok bop kong ga pjlúe.

<sup>21</sup> Gueniyo ga tja le lok li kjrinaso ga pjlúe. Tja shäng ba bokshtoshko ga tja tjlë ba kong dbo go ga “Tja wotjlik ga shji wolono ga dbar tjwe ga shji woshre Sbörë iröng obi lër. Ga tja iak shäng bomi bokshto llgwemi wlo, tja wotjlik eni kjïshko” lër ba kong eni eröe» le.

<sup>22</sup> Irbo Tjaglën le li miyde Félixde sök pjlúe. Eshko ga tjlë ga «Llgwer eniwa tjok llëme. Iër ber Tjlapga Lisias tjwe guing, ga llgwer eshko já» le.

<sup>23</sup> E irgo ga tjlë ëngkwaga kägäyo shäng li kong ga «Pablo kjwe ios ber shäng jüshko dak dak lë, gueniyo rayos shäng iguing. Ga ëbo tjwe ba ik ga som llëm, sëya, kjimte woydë ga wëyë» le.

<sup>24</sup> Öötong dbar kjwöbö ga Félix äär shäng Pablo shwoy, ba boy Drusila tjok. Walë, e judío. Eshko ga Pablo rokara Félixde jek ba shwoy. Ga Pablo lano ba tjok, shji mär Cristo Jesús go sorë kjïshko.

<sup>25</sup> Eshko ga Pablo tjlë ba kong ga «Shji woyde Sbörë ga shji jëk löng pjlo bek, llëbo shäryëy woydë owashko ga shji drön ëë, shäryëy llëm wlo. Ga llono ga shji llgweya Sbörë» le.

Lara eni li kuya Félixde ga beno shäng sëya llëm, woydë arae. Eni ga tjlë ga «Ber eni guing. Pja nomo. Tja dbar tjok ga pja rokotë obi» le.

<sup>26</sup> E irgo ga Félix shäng Pablo koshë, kong dbur twe, raye wlo le. E kjïshko ga roke enido, lan ba tjok wlo.

<sup>27</sup> Shärye beno shäng eni öötong lu pjloglo pjök. E irgo ga Félix opshino ba shto dwayo, ga äska beno

sök Porcio Festo. Ga Félix ber pjlú judíoga tjok wlo le ga Pablo iara beno shäng no shdüzlong uyo roshko.

## 25

### *Pablo opwlikono Festo boksho*

<sup>1</sup> Eshko ga Festo öötong beno sök kjok eshko so ichaga öötong dbargwo mya ga opshino Cesarea kjokyo dwayo jem öötong shäng Jerusalén kjokyo.

<sup>2</sup> Eshko ga syöshtaga kägäyoga, judíoga oblë tjwlö ara wleniyo, e töno Tjlapga Festo tjok, ga tjläno lok ara Pablo wloyo.

<sup>3</sup> Tjlë lok ba kong ga «Tjawa kjimtëp sira. Pablo ichëp tëm söya lok borwa kong Jerusalén kjokyo» le, gueniyo e wopro ga epga löng poshäryë ba zrök irbo wlo le.

<sup>4</sup> Kuya Festorë ga tjlä ba kong ga «Lläme. Pablo, e iak beno shäng no shdüzlong uyo roshko Cesarea kjokyo, ga tja wotjlik ga tja jongya wop ä iröng eshko lër.

<sup>5</sup> E kjïshko ga bomi tjrëko ëreshko tjlapgaga tjwlö këskes wleniyo ichëmi jer bor tjok kjlöbö Cesarea kjokyo. Lläbo shäryara domer lirë owa ga rotëmi eshko ga pjlú» le.

<sup>6</sup> Ga Festo beno shäng Jerusalén kjokyo judíoga li tjrëko dbargwo kjwong (8), sak kjwara (10) dik. E irgo ga to jer iröng Cesarea kjokyo. Wëshko ga öötong sök no llgwezlong shtoyo lishko, ga no ichara jek Pablo wlokjrë.

<sup>7</sup> Eni ga Pablo opzrëk jek äär shäng tjlapga sök lishko ga judíoga jer öötong löng Jerusalén kjokyo dwayo li jek Pablo zlong bäng, ga tjläno lok ara

llëbo owa kësbang, gueniyo llëye wlëna ba kong, ber shdungko wlo drete.

<sup>8</sup> Eshko Pablo opwlikë wlo ga tjlë ga «llëye owa shäryoror llëme. Llëye shäryoror judíoga kjok llgwekklo li wloyo llëm, llëye shäryoror Sbö u li wloyo llëm, llëye shäryoror tjlapga pjlu kësbangyo sök Roma kjokyo li wloyo llëm bakoe» le.

<sup>9</sup> Gueniyo Festo ber pjlu woydë judíoga tjok kjishko ga tjlë Pablo kong ga «¿Pja jem woydë Jerusalén kjokyo, pja llgwer eshko wlore?»

<sup>10</sup> «Llëme. Tja shäng pjlu kësbangyo sök Roma kjokyo li no llgwezlóng boksho, tja llgweya wlo. Miydëp pjlu ga llëye shäryoror owa judíoga kong llëme.

<sup>11</sup> Llëbo owa shäryoror, tja ber zrökko wlo wleni ga tja zrökko. Gueniyo tjlokwo le lok bor wloyo li, tja rote li jyö erö wleni ga tja twako ba kong wlo llëme. Ga rokër bop kong ga tja llgwegaga ber pjlu kësbangyo sök Roma kjokyo lirë om go» le.

<sup>12</sup> Eni ga Festo lano ba poshdunggaga löng li tjok. Lano pjir ga tjlë Pablo kong ga «Rokorop bor kong ga pja llgwegaga ber pjlu kësbangyo sök Roma kjokyo lirë om go. E kjishko ga pja ichër jongya ba shwoy Roma kjokyo» le.

### *Festo lano Agripa tjok Pablo kjishko*

<sup>13</sup> Dbar kjwöböso ga shto oblë so pjluo ko Agripa öötong shäng Cesarea kjokyo Festo ik. Agripa dor Berenice, e jek shäng ba tjok bakoe.

<sup>14</sup> Ga beno löng eshko dbar kjwöböso. Dbar kjwara ga Festo tjläno ba kong Pablo kjishko. Tjlë ga «Domer shäng ëreshko kjlara ko Pablo, iara Félixde beno shäng no shdüzlóng uyo roshko.

15 Ga tja öör jem shäng Jerusalén kjokyoshko ga syōshtaga kägäyoga, judio tjlapgaga kjok llgwegaga wleniyo, epga ba rotono bor kong ara. Woyde lok ga Pablo, e shdungko jlōe lēr ba kong.

16 »Ga dboryoror. Tja tjlēno ba kong ga “Tjawa Roma so, tjawa sgak löng ēye iērwa zrökoba wlo jekdo, ba rotaga li tjwe löng ēng boksho llēm guing llēme. Woyde ga rote lok ēng boksho, opwlikē wlo” loror.

17 »Eni ga epga öör löng jūshko ga tja dbar zano llēme. Wēshko dö ga tja jem öötong sök no llgwezlong shtoyo lishko, ga nopga ichoror jek domer li wlojkrē, ga söra lok jek öötong shäng eshko.

18 Gueniyo ga ba rotaga shrono löng li tjlēno ga llēye owa lara ba kjishko woyotjlinor dik llēme.

19 Tjlēno lok ga ba kjok llgwekklo li söya shäng bēy llēme. Ga lano lok domer kjlara ko Jesús kjishko. Tjlēno lok ga domer li wolono, gueniyo Pablo tjlē ga shäng sē obi le lok eni eröe.

20 Eshko ga llēye shäryēr ga pjlu li miydēr sök llēme. E kjishko ga tja tjlē Pablo kong ga “¿Pja jem woydē Jerusalén kjokyo, pja llgwer eshko wlore?” lēr.

21 »Gueniyo ga tjlē bor kong ga “Rokēr bop kong sira ga tja ios ber sök na, tja llgweya pjlu kēsbangyo sök Roma kjokyo lirē om go guing” le. E kjishko ga ioror beno shäng dak dak lē, ichēr tjlapga pjlu li shwoy llono ga bue guing» le.

22 Kuya ga tjlē ba kong ga «Tja ëmdē ga domer li tjlē sorē kur woydē bakoe» le.

Kuya ga tjlē ba kong ga «Bong erö ga tjlē sorē li kuba» le.



*Pablo tjlěno Pjlu Agripa bokshto*

<sup>23</sup> Wěshko ga Agripa, Berenice, e opzrěno jek lōng no llgwezlong shtoyo roshko. Eshko ga shrēraba ara, romguē jong trāk llēme. Lōng eshko li tjlapgaga ēngkwaga kągāyo kēsks wleniyo, domerga eshko so tjlwō kēsks wleniyo bakoe. Öötong tōno lōng ga nopga ichara Festorē jek Pablo wlokjrē, ga sōra lok öötong shäng eshko.

<sup>24</sup> Eshko ga Festo tjlē ga «Pjlu Agripa, pjāy tjlapgaga tōno lōng bi tjok na, domer shäng kjwe īzīa. Woyde judíoga kjlobirē ga domer kjwe ichēr zrōkoba wlo. Eni li woyde lok jūshko Cesarea kjokyo, Jerusalén kjokyo bakoe.

<sup>25</sup> Gueniyo ga bor kong ga llēye owa shāryara, ber zrōkko wlo llēme. Gueniyo tjlěno om go ga “Tja llgwega ber tjlapga pjlu kēsbangyo sōk Roma kjokyo lirē om go”lara. E kjishko ga ichēr to eshko lēr.

<sup>26</sup> »Woyde ga llēbo tēr ba kjishko, ichēr tjlapga pjlu kēsbangyo li kong, gueniyo llēye lako ba wloyo bor kong drete. E kjishko ga rokoror tek shäng bop bokshto, Tjlapga Pjlu Agripa, pjāy uunkong bokshto bakoe. Eni ga jakrokoromi yōtso pjir ga llēbo ber tēr wlo ga tjlōkwo tjok wlo.

<sup>27</sup> Bor kong ga no ichēr to, llgweya tjlapga pjlu kēsbangyo lirē wlo ga woyde ga llē kjīy loroy ba kong yōtso guing» le.

## 26

<sup>1</sup> Eshko ga Pjlu Agripa tjlē Pablo kong ga «Woydēr ga pja tjlēs bop kjishko om go shara» le.

Kuya ga orkwo poyono, pjāy kjinkozong loklo wleni, ga tjlē ga

<sup>2</sup> «Tjlapga Pjlu Agripa, tja shäng jÿshko bop bok-shto, “Llëye lara judíogarë bor kjÿshko li, e eni llëme” lër bop kong miydëp wlo, ga tja wopjlúe.

<sup>3</sup> Tjawa judíoga, tjawa llëbo shäryë sorë li miydëp sök pjlúe. Tjawa ëng dboryë kar kar llë kjÿshko li miydëp pjlú bakoe. Eni ga miydër ga tja tjlë bop kong ga tja kup sök pjlúe. E kjÿshko ga rokër bop kong ga tja kus sök wop tjok sira guing.

<sup>4</sup> »Tja miyde judíoga uunkongdë tek chirawashko dwayo. Tja shäng bor kjokshko, llëm ga Jerusalén kjokyoshko ga tja opshäryë sorë, e miyde lok pjlúe.

<sup>5</sup> Miyde lok pjir ga tja fariseo tek dëna tjän, ga le lok woydë wleni ga le ga pjlúe. Ga tjawa fariseoga, judíoga kjok llgwekklo li jnenwa yõtso anmoyö, judíoga llamo li kjinmo.

<sup>6</sup> Tjlökwo lara Sbörë borwa tjlapgaga tek dënashko so kong jlökoyo li, e koshër sök ÿyado. Era eni tjok ga tja söra lok, tek shrono shäng, tja llgwekoba e kjÿshko wlo.

<sup>7</sup> »Israel tjëyoga uunkong kjrिंगgwo sak kjwara kjingsho pjök (12) li, tjlökwo lara li koshe löng ÿyado. E kjÿshko ga Sbö, e poshrëya shkë dba, ga parkë löng ba kong ÿyadoe. Ga tjlökwo koshe löng li, tja omkoshë shäng bakoe. ¡Tjlapga Pjlu Agripa, tja rote judíogarë löng e kjÿshko!

<sup>8</sup> ¿Shji judíoga wotjlík ga shji wolono ga shji woshre Sbörë iröng obi jlöe lëy llëm ega?

<sup>9</sup> »Dënashko ga tja wotjlíno om go ga bek wlo ga tja parkë Jesús, Nazaret so li nopga wloyo loror.

<sup>10</sup> Ga shäryoror eni eshko Jerusalén kjokyo. Tja ichaga syöshtaga kägäyogarë, ga Jesús tjlökwo kjra-

gaga li ichoror no shdüzlong uyo roshko arae. Ga zrökobashko ga tja tjlëno ga “Kjwe zrökko” loror bebi.

<sup>11</sup> Enido ga tja öör shäng ba wlëk judíoga syõ uyo lok oblë oblë li roshko. Wlënor ga shdun ara, Jesús läywe owa wlo lër. Ga tja iirkono ara ba kong lok, ga irpjanor Jerusalén kjokyo lishko dö llëme. Irpjanor jek shäng kjok shto oblë oblë, oba tjëyo eniyo llëm wleniyoshko bakoe.

<sup>12</sup> »Shäryër shäng eni kuzong ga pjlara ga tja jek shäng jongya Damasco kjokyo, tja ichak syöshtaga kägäyogarë, pak twara lok bor kong li shäryër wlo.

<sup>13</sup> Gueniyo dlo dluw dik ga ïn ga iök shjiy ter tjwe kjok dogo dwayo, kälä dbo dlo kjinmo, jek lletlet, ga tja kopjrina beno pjang pjribri bor yorkagaga jek löng li tjok.

<sup>14</sup> Eshko ga tjawa dgono jer löng töshko, ga kur ga ëbo tjlë bor kong arameo tjlökwo go ga “Saulo, Saulo, ¿tja irpjam ega? Pja opyë shäng bor wloyo ga pja opshdung shäng om goshko, e so öng llë, ba shpokklo dbo stek li te om go kjoyoe” le.

<sup>15</sup> »Kur ga tja tjlë ga “Tjlapga, ¿pja ë?”

»“Tja Jesús. Irpjam to shäng wle, e tja.

<sup>16</sup> Pja kojözong. Tja weno shäng bop kong ëre, pja kjröror ber shäng bor parkaga wlo kjïshko. Woydër ga llëye ïnop ëre, llëye pin bop kong li, e lëp oba kong.

<sup>17-18</sup> Ga pja to shäng ba lëshko ga pja wlikër judíoga wloshko dwayo, nopga judío llëm wleniyo wloshko dwayo bakoe. Pja ichër jongya nopga judío llëm wleniyo kong jlökoyo. Woydër ga epga ber löng bokkwo roshwing pjir wleni, ga jëk löng

kjok ro sī roshko wleni ame, jëk löng iök shjiy roshko wleni shara. Woydër ga löng Å wloshko ame, ber löng Sbö wloshko shara. Woydër ga owa pjang ba go li lön ber dret, epga iër ber löng ba pjeyoga mär bor go erö li tjok wlo. Pja ichër jongya nopga judío llëm wleniyo kong, llëbo uunkong ère shärye wlo” le bor kong.

<sup>19</sup> »Tjlapga Pjlu Agripa, eni ga llëbo ichara Sbörë bor kong kjok dogo dwayo ñnor shji yoïno wleni li jlöe loror, ga koloror.

<sup>20</sup> Bäm go ga tjlökwö ère loror judíoga löng Damasco kjokyo li kong, e irgo ga judíoga löng Jerusalén kjokyo li kong, judíoga löng Judea kjokyo kjok kjwang jïkong li kong, nopga judío llëm wleniyo kong bakoe. Tja tjläno ba kong ga “Llëbo owa shäryëmi löng li, e owa jlöe lozï, ga rayozï, ga pjäy optwos Sbö kong dey. E irgo ga llëbo shäryozï pjlo bek, pjäy kjlopswono jlöe lëba wlo” loror.

<sup>21</sup> »Tja shara judíogarë Sbö u zlong bäng, tja zröya lok wlo lara e kjïshko.

<sup>22-23</sup> Gueniyo tja kjimte Sbörë shäng. E kjïshko ga tja beno shäng ba tjlökwö lë nopga uunkong kong, tjwlö kësks li kong, tjwlö chila li kong bakoe. Llëye shäryë wlo lara Moisés, Sbö tjlökwö lagagarë dëna tjän li, e shäryono eni jlöe lër oba kong. Tjläno lok ga “Llono ga no pjluoyo iche le Sbörë li shronoshko ga woyde ga shdungoba, wolon, ga woshre Sbörë iröng obi, shinmoga tjeng kës li bäm go. Shäryë eni, ga shji döya Sbörë sorë li roy shdöya ba pjeyoga judíoga kong, nopga judío llëm wleniyo kong bakoe. Shji jëk löng kjok ro sī roshko wleniyo kong ga roy ber iök shjiy wleni” le lok beno pjang

ba kjibokwo go eni» le.

<sup>24</sup> Eshko ga Pablo tjlē shäng opwlikē eni wopro ga tjlōkwo skokza Festorē, tjlē ba kong dbo go ga «Pablo, ¿pja skwēre llēro? Pja oppino ara ga pja iara beno shäng skwē erä» le.

<sup>25</sup> Gueniyo kuya ga tjlē ba kong ga «Tjlapga Festo, tja skwē llēme. Tjlōkwo lēr li, e jlōe. Tja tjlē li, e bek lotē.

<sup>26</sup> Tjlapga Pjlu Agripa sök kjwe. Tjlōkwo lēr li, e miyde sök pjluē. E shäryak lütshko llēm, e wēlēe. E kjishko ga tja tjlē shäng wlēp ba bokshto. Miydēr pjlu ga sök kjwe ommydē pjluē» le.

<sup>27</sup> E irgo ga Pablo tjlē tjlapga Agripa kong ga «Tjlapga pjlu, ¿woyotjlīp ga llēye lara Sbō tjlōkwo lagagarē li, e jlōe lēpde? Miydēr ga e jlōe lēp» le.

<sup>28</sup> Kuya ga tjlē ba kong ga «¿Tja kjlopswēp ber Cristo tjlōkwo kjruga maling jūni lēpdo?»

<sup>29</sup> «Wop chirare, de wop arare, gueniyo rokēr Sbō kong ga pja, nopga uunkong tja kuya löng jūshko eerishko, pjāy äär ber löng Cristo tjlōkwo kjruga botoya dik, gueniyo pjrik löng dröng sho bomi orkwo go jūni botoya dik llēme» le ba kong.

<sup>30</sup> Eni ga pjlu li kojono opshik kjoko wlo, kjok eshko so ichaga tjok, Berenice tjok, nopga sirkeno löng ba tjok li tjok bakoe.

<sup>31</sup> Ga to opshino löng lan dboshko, tjlē lok eng kong ga «Domer kjwe llēye owa shäryara ber zrökko wlo llēm, shdungko shäng kjērshko emdē llēm bakoe» le lok eni.

<sup>32</sup> Eshko ga Agripa tjlē Festo kong ga «Domer kjwe “Rokēr ga tja llgwega ber pjlu kēsbangyo sök Roma

kjokyo lirë om go" lara llëm kjwe ga rayoroy ga pjlúe» le.

## 27

### *Pablo icharaba to jongya Roma kjokyo*

<sup>1</sup> Woyotjlína tjlapgaga lirë pjir ga tjawa iche jek jongya Italia kjokyo wlo leshko ga Pablo, e twara lok ëngkjwagaga ara kägäyo kjlara kong, de wlo. Domer, e ko Julio. E ëngkjwaga parkë löng pjlu kësbangyo sök Roma kjokyo li daga wleniyo. Ga kong nopga oblë shdung löng eshko, e twara lok, de wlo bakoe.

<sup>2</sup> Eshko ga kyyong pjang kjlara kësbang jek äär Adramitio kjokyo dwayo brik pjang kjwlë jongya Asia kyyong tjyozlong shtoyo kjrinishko kjrinishko le, ga tjawa opyono e roshko, ga tjawa opshino toe. Aristarco jek shäng borwa tjok bebi, e Tesalónica so. Tesalónica kjokyo, e Macedonia kjokyo obi.

<sup>3</sup> Wëshko ga tjawa öötong löng kyyong tjyozlong kjokyo ko Sidón. Eshko ga Pablo songe le Juliorë, ga rayara to ba pjeyoga wleni löng eshko li ik, kjimte lok wlo.

<sup>4</sup> E irgo ga tjawa opshino to Sidón kjokyo dwayo. Eshko ga pjluk tjwe jong dbo ara dlung buk kës li shwo lëkong, ga tjawa bakwe jong iröng eröe. E kjishko ga tjawa to jek dipzono dlung tjreko ko Chipre, e pjlor dew lëkong pjluk ara llëmshko.

<sup>5</sup> E irgo ga tjawa dipzono jek dlung buk Cilicia kjokyo, Panfilia kjokyo, e bokshto, kjwo kalëkong, ga tjawa tjyono öötong löng Mira kjokyo, e Licia kjokyo obi.

<sup>6</sup> Eshko ga kyyong wlēna ēngkjwaga kägāyo lirē pjang kjlara oblē kēsbang jek āār Alejandria kjokyo dwayo, brik pjang kjwlē jongya Italia kjokyo le. Eni ga tjawa opyono e roshko ba tjok, tjawa jek kēgong shara wlo.

<sup>7</sup> Dbar kjwöböso ga pjluk ara kjīshko ga tjawa jēktong kyyong li go wor, ga pakyo ara, eni ga tjawa jek öötong löng Gnido kjokyo gomyo. Ga tjawa jek bek lororwa, gueniyo tjawa bakwe pjlukdē ara obi kjīshko ga tjawa dipzono jek dlung tjrēko pjang kjrina obi ko Creta, e pjlör dew lēkong pjluk ara llēmshko, kjok ko Salmón li boksho.

<sup>8</sup> Ga tjawa jek löng, gueniyo dlung sor go soyo arae. Eni ga tjawa jek āār löng kjok buk kjrina kowēba Kyyong Tjyozlong Shtoyo Pjlúshko, Lasea kjokyo buk ba soshko.

<sup>9</sup> Eshko ga tjawa barwara pjlukdē ara kuzong ga dbar to jek kop ara tjän. Shji iē llēm Sbö kong dbaryo shrēya judíogarē li, e to jek tjän, ga miydororwa e go ga kjok owa shunyo shrē ara dbaryo li döröe. Kjok eni ga dlung iirkē arae. E kjīshko ga shji jek dlung kjing go ga shji sjēke. Eni ga nopga jek löng li poshduna Pablorē, tjlē ga

<sup>10</sup> «Domerga, ñn ga shji jek löng ēre kong llēbo wen owa, shji kyyong kēsbang ēre jer bi shjiryo, bi llēbo tjeng kēs wle tjok. Erö llēme. Shji emdē ga jer bakoe. Shji ber löng na dey» le.

<sup>11-12</sup> Gueniyo ga kyyong tjyozlong shtoyo eshko li, kjok owa dbaryo ga shji löng shto eshko ga pjlú llēme. E kjīshko ga kyyong sogo li, ba kyyong söga shäng li, e tjlē lok ēngkjwaga kägāyo li kong ga «Shji jek dey» le. Nopga llamo löng kēs li wotjlík jong e kjoyo bakoe. Tjlē lok ga «Shji opshik jūshko dwayo

dey. Tjľy, shji jek Fenice kjokyo ga buere ĩy wľo. Eshko ga kjok owa dbaryo ga shji ľong shto eshko ga pľľe» le. Fenice kjokyo, e kjoyong tjyozlong kjokyo buk Creta kjokyo obi. Eshko ga dľo jer shwo ľekong li ĩy ga wěľe. Kuya Juliorě ga tjľkwo baĳya lok li kolara, Pablo ĩlira kolara ľľeme.

*Đlung kjing kjok owa, pľluk ara*

<sup>13</sup> Eshko ga pľluk li tjwe jong đlung buk kės shwo ľekong, gueniyo wore. E kjĳshko ga wotľľk lok ga «Shji to ga bue» le. Eni ga ba dröng sho kjoyong shakkľo kėsbang ľona jer đlung roshko li shira lok tēm kjoyong li roshko iröng obi, ga tjawa opshino jek ľong đlung tjrěko Creta li kjako.

<sup>14</sup> Gueniyo wop tjok ga pľluk tjwe jong kjrina obi, đlung tjrěko li shwo ľekong shara, dbo ara anmoyō, pľluk li kowěba Nororiental,

<sup>15</sup> ga tjawa bakwara arae. Eni ga kjoyong kėsbang li bojonwa ber buk pľluk li shwo ľekong ľerwa ga äe. E kjĳshko ga kjoyong li rayorowa sōya pľluk ľirě om go äär kjone ga eshko.

<sup>16</sup> Ga tjawa sōra to jek đlung tjrěko buk chirawa ko Cauda pľlor dew ľekong. Eshko ga pľluk dbo ara ľľeme. E kjĳshko ga kjoyongwa chirawa sörwa pjang kjlara li irgo kjro go, e poyonwa jem kjlara li roshko ľerwa. Ga tjawa kong pak twara ara, gueniyo ga poyonorwae.

<sup>17</sup> E irgo ga kjoyong kėsbang li doyo pjirira domerga ľirě lok tuk, war ľľem wľo le. Eshko ga tjľe lok ěng kong ga «Shji sōya pľluk kjwerě jek äär jong bo buk kjweshko ko Sirte ľishko. Kjweshko ga kjone kjoneshko ga ro chira, ga shji kjoyong pjě, war bi shjiryo» le eni, ga bangkjrara lok arae. E



kjĩshko ga shwong kjoyo shtëgro ara pje lok pjang kjomo pjluk shakklo kjoyong jëk wlo li, e lona lok ter töshko, söya pjlukdë jek eshko llëm wlo, ga kjoyong li rayara lok söga pjlukdë om go shara.

<sup>18</sup> Wëshko ga dlung kjing go li pjluk ara obi, tjawa bakwe dbo ara iyadoe. Eni ga kjoyong sögaga kjarga löng ba llëbo söya tjeng soynekklo kës li dbuk lok jer dlung roy.

<sup>19</sup> Wëshko ga ba orkwo om go li goshko ga shwong kjoyo shtëgro ara li dbura lok jer dlung roy, kjoyung sho llë, kjor llë kjoyong shakklo llë li tjok bakoe.

<sup>20</sup> Dbar kop ara ga kjok owa owa, pjluk tira llëm dlung kjing go, dlung iirkë arae. E wopro ga dlo wen llëm, dbala ëmdë llëm bakoe. Eshko ga tjawa to jek löng kjone miydërwa sira llëm, ga tjawa där, e koshërwa ame, e woyojerorwa pjire.

<sup>21</sup> Eshko ga tjawa löng ioydë llëm dbar kop ara tjän. Eni kuzong ga Pablo kojono shäng nopga löng li tjrëko, ga tjlä ga «Domerga, shji löng Creta kjokyo obishko ga tja koloromi kjwe ga shji to löng song jüni llëm, ga bomi llëbo jeno bomi shjiryö llëm bakoe.

<sup>22</sup> Gueniyo eni tjok ga rokër bomi kong ga pjäy dbokjrozong. Eye löng jüşhko ga wolon kjlara llëme. Gueniyo kjoyong kësbang ërera jer bi shjiryö.

<sup>23</sup> Sbö, e bor sogo, ga tja parkë shäng ba kong iyado. Luna shkëyo ga ba parkaga kjok dogo so ichara weno shäng bor kong kjlara,

<sup>24</sup> ga tjlä bor kong ga “Pablo, llëye bangkjirëp llëme. Pja jongya pjlü kësbangyo sök Roma kjokyo li boksho, pja llgweya wlo. Bop kjĩshko ga nopga

lõng kjang kësbang roshko kjlobi kjwe wolon llëm, döya Sbörë uunkong” le.

<sup>25</sup> E kjïshko ga pjây dbokjrozong. Sbö, e koshër ga shji kjimte jlökoyo, lara ba parkaga lirë bor kong sorë li eni.

<sup>26</sup> Gueniyo ga shji söya pjlukdë äär dlung tjrëko pjang kjrina, ga kjang ëre pjë dlar ber buk eshko» le.

<sup>27</sup> Eshko ga öötong dbar sak kjwara kjingsho pkëng (14) ga tjawa bakwe pjlukdë jek lõng dlung ko Adriático\* li kjang go obi. E shkëyo kjok rong dik ga kjang sögaga li tjlä ëng kong ga «Shji ääto pjöshko dikjoyoe» le.

<sup>28</sup> Ga dlung li ro kjöm, e tjläna lok ba tjläkklo go, ga beno ro wop orkwo jyäglo† pjloglo sak kwong (80). Wop tjok obi ga tjläna lok jek obi, ga beno ro wop orkwo jyäglo pjloglo sak tjer (60).

<sup>29</sup> Eshko ga bangkjre lok ara, pjë ak go le, ga dröng sho kjang shakklo këskes lona jer dlung roshko kjwo pkëng (4) kjang silëkong, kjang li jëk ame wlo. Eni ga beno lõng eshko syöshtë, epga kjok shrän lõng së obi wlo le.

<sup>30</sup> Eni ga kjang sögaga li tök woydë kjang li roshko dwayo le, ga opyorgö lõng kjang chirawa li long jer dlung kjang kjang kësbang li ne lëkong. Shäryara eni, dröng sho kjang shakklo löya wlo lara, miga tök wlo le.

<sup>31</sup> Gueniyo eshko ga Pablo tjläno ëngkjwagaga lõng li kong, ba kägäyo li kong bakoe. Tjlä ba kong ga

---

\* **27:27** Eshko dbaryo ga dlung kowëba **Adriático** li, e dlung kowëba Adriático eerishko li llëme. E oblë. † **27:28** **Orkwo jyäglo pjlara**, e **centímetro sak pkëng kjingsho shkëng (45) dik**.

«Kjwepga kjwe ber löng kyyong kësbandg ẽre roshko llẽm ga pjãý dãr llẽme» le.

<sup>32</sup> Eni ga kyyong chirawa löya kyyong sögagarẽ löng'li, e kyyungyo zara ẽngkjwagaga lirẽ tas tas, jer lono dlung kyying go, ga jenoe.

<sup>33-34</sup> E irgo ga kjok shrãnto ga Pablo tjlẽ nopga löng eshko uunkong kong ga «Öötong dbargwo sak kjwara kjingsho pkẽng (14) tjãn ga pjãý löng woydẽ, ga pjãý ioydẽ llẽm bakoe. E kjishko ga rokër bomi kong ga pjãý ios sira. Pjãý löng sẽ wlo ga woyde ga pjãý iẽ. Eni ga pjãý wolon kjlara llẽm, bomi kãkzong ẽmdẽ ga jer pjlara llẽm bakoe» le.

<sup>35</sup> Lara eni pjir ga pjlung shosho suk pjir kjrara tjeng kjwara ba wloshko, ga syõshtono Sbõ kong, tjlẽ ga «Dli ẽre tworop borwa kong. Tjawa ber wopjlú bop tjok e kjishko» le nopga tjeng kës li boksho. Eni ga tora bẽy ga uarae.

<sup>36</sup> İya uunkong lirẽ ga wokjankono, ga iono lok bakoe.

<sup>37</sup> Tjawa löng kyyong'li roshko uunkong ga doglo sak dbãw pjloglo pjök kjingsho sak kjãk kjingsho tjer (276).

<sup>38</sup> Ga iono lok woydara bayo kjõm ga eni. E irgo ga pjlung shosho söya tjeng kyyong roshko kës li dbura jer dlung roy dret, kyyong'li wẽnyẽ wlo le.

<sup>39</sup> Kjok shrãno pjir ga tjawa löng kjokyo kjone miyde kyyong sögaga lirẽ llẽme. Gueniyo İya lok ga bo jem buk eshko kjrina, la sho tjok. Eni ga wotjlik lok ga «Kyyong ẽre tjyẽy kẽgo sit ga buere İy» le.

<sup>40</sup> Ga ba drõng sho kyyong shakklo kës kës lona jer tjeng dlung roshko li, e kyyungyo zakza lok tas tas beno tjeng dlung roshko eshko. Ga ba

kjlongkwang lok si lëkong ba llgwekklo li kjungyo döra bakoe. E irgo ga shwong kjoyo pjluk shakklo li, e poyona lok kara ba kjoyong li ne lëkong, bakwe pjlukdë jek këgong pjöshko wlo lara.

<sup>41</sup> Gueniyo to jek jong la sho töno tjeng dlung roshko li bët ga kjoyong li lliktong beno buk la sho li roshko. Eshko ga ne lëkong li lliktong beno jong wir ame, ga si lëkong li, e shpoya dlung pjluublunyorë ara, ga dløktong kjwangyo dboy dboye.

<sup>42</sup> Eni ga ëngkjwagaga li tjlä ëng kong ga «Nopga dëy, söy tjeng kjwe zröy dret dey, llëm ga ichëy jek wë ï ga tök lok drete» le.

<sup>43</sup> Gueniyo woyde ba kägäyo lirë ga Pablo zröya llëme le, ga tjlä ëngkjwagaga li kong ga «Wëyë, zröy llëme. Eye wë pjlu ga optë jer dlung roy bäm go, jek wë ï äär pjë jong pjöshko.

<sup>44</sup> Llamo löng oblë jek kjorkwang kjing go, llëm ga kjoyong dløktong kjwangyo go bakoe» le.

Eni ga tjawa kayo döktong pjir, öötong pjöshko beno löng së uunkong.

## 28

### *Pablo shäng dlung tjrëko ko Malta*

<sup>1</sup> Eshko ga tjawa kayo döktong pjono löng pjöshko uunkong irgo ga miydororwa ga dlung tjrëko li ko Malta.

<sup>2</sup> Kjøk eshko li noyo tjok, ga tjawa dara yötso tjë jïkong. Eshko ga shunyo shrë pjang ara, smo ara bakoe. Eni kuzong ga iök boktöna lok, ga tjawa rokara uunkong ba zlong bäng, iökkok eshko wlo.

<sup>3</sup> Eshko ga Pablo löng dogro tönö kjlöbö, ga dbuya shäng iök li roshko. Eshko ga iök li kjlik ara kjishko ga dgur brik buk eshko kjlara, ga Pablo uara ba orkwoshko, ga dgur li beno pjang ling ba orkwo go.

<sup>4</sup> İya kjok eshko sopgarë ga tjlä lok ëng kong ga «Domer kjwe owa, no zrök ä wleniyo dikjoyoe. Döktong tek dlung kjing kjok owashko dwayo ëmdë ga bi sbö shäng kjlara kowëy Kjok Llgwega Bek li, domer kjwe woyde ber shäng së llëme» le.

<sup>5</sup> Gueniyo ga dgur li sringza Pablörë buk iök pjë jong ri ri li roshko, ga llëye shäryono Pablo kong llëme.

<sup>6</sup> Eshko ga löng tjë jïkong li wotjlïno ga «Kjwe orkwo dguë jekdo, llëm ga jek buk rish wolon jekdoro» lara. Gueniyo koshe löng kjër ga dguë sira llëme. İya lok ga llëye shäryë ba kong llëm ga wotjlik lok oblë, tjlä lok ga «Bi sböpga kjlarayo li kjwe» le.

<sup>7</sup> Dlung tjërëko eshko so ichaga ko Publio. Ga tjawa tjyono löng lishko ga kjok ber buk soshko kjrina baıya. Eni ga tjawa wlojkrara, dara yötso ba ushko dbargwo mya.

<sup>8</sup> Eshko ga Publio data buk swlo ara ba bukklo kjing go, kjlik ara, roshkwë ara bakoe. Eni ga Pablo jek öötong shäng ba ik. Eshko ga syöshtono Sbö kong ba kjïshko. E irgo ga orkwo iono ba kjing go, ga poptara beno pjluë.

<sup>9</sup> Roy kuya swlopga tjeng dlung tjërëko oblërë ga shrono löng Pablo shwoy uunkong, ga poptara pjire.

<sup>10</sup> Eni ga kjok eshko soppa beno löng woowa llëm borwa kong. E kjïshko ga tjawa kong llëbo twara

arae. Ga tjawa brikshko ga llëbo woydororwa borwa kjimtoklo irbo wlo li, e twara lok borwa kong pjire.

*Pablo jek öötong shäng Roma kjokyo*

<sup>11</sup> Eshko ga kyyong kësbang pjang kjlara tek Alejandría kjokyo dwayo, pjang kjok owa jek pjir li koshë. Kyyong li poglo go ba sböpga do pjök li jyäglo tak lok. Ba sböpga li kowe lok Cástor, Pólux. Eshko ga tjawa löng dlung tjrëko li öötong moglo myashko ga tjawa opyono kyyong li roshko, ga tjawa opshino to dlung tjrëko li dwayo.

<sup>12</sup> Ga tjawa jek öötong löng kyyong tjyozlong kjokyo ko Siracusa, ga tjawa beno löng eshko dbargwo mya.

<sup>13</sup> E irgo ga tjawa jek löng dlung sor go jek äär löng Regio kjokyo. Wëshko ga pjluk tjwe jong borwa irgo, ga tjawa opshino toe. E wëyo obi ga tjawa jek öötong löng Puteoli kjokyo.

<sup>14</sup> Eni ga tjawa opshino kyyong roshko dwayo. Eshko ga pjeyoga Jesús tjlökwo kjraga wlënorwa löng kjlöbö, ga tjawa mana ber löng ba tjok sondë kjwara wlo le, ga tjawa beno löng. E irgo ga tjawa opshino to jek Roma kjokyo pjö lëkong.

<sup>15</sup> Eshko ga tjawa roy kura pjeyoga Jesús tjlökwo kjraga löng Roma kjokyo lirë tjän. Eni kuzong ga kjone kjone opshino jer löng borwa koshë irbo. Kjong kjong jer löng borwa koshë llëbo soynezlong shtoyo ko Apio, kjong kjong jer löng kjok kjrina obi, oba pozlong uyo lok mya lishko. Ga jer löng borwa koshaga li ñya Pablörë ga beno shäng wopjlú, dbokjrono jek obi, ga tjlë Sbö kong ga

«Tjawa kjimtorop kësbanġe. Tja wopjłú bop tjok» le. Ga epga jek iröng borwa tjok.

<sup>16</sup> Tjawa öötong löng Roma kjokyo ga kjok llġwegaga löng eshko li, Pablo iara lok beno shäng no shdüzlong uyo roshko llême. Kong u wlëna kjwara, iara beno sök eshko tjoksa, daga beno shäng ba tjok kjlara erä.

*Pablo Sbö tjłökwö roy löno shäng Roma kjokyo*

<sup>17</sup> Öötong dbargwo mya ga judíoga löng Roma kjokyo tjwłö këskes wleniyo li mana Pablorë tek ba shwoy. Ga töno shrono löng ba shwoy ga Pablo tjłë ba kong ga «Pjeyoga, llëye shäryoror owa bi pjeyoga judíoga kong llëm, bi tjlapgaga tek dënashko so sdëkwö wloyo llëm bakoe. Gueniyo ga tja sharaba shäng Jerusalén kjokyo, ga tja twaraba beno tjeng Roma sogga wloshko, tja shdüya lok wlo.

<sup>18</sup> Eshko ga tja kong llëbo kjakrokara lok ara, ga llëye wlëna bor tjok, tja ber zrökko wlo llême. E kjışhko ga tja raye lok woydë.

<sup>19</sup> Gueniyo ga woydara judíoga lirë eni llëm, ga tjłëno lok ara bor wloyo. E kjışhko ga tja llëye shäryër wlo ame, ga rokoror Roma so li kong ga tja llġweya pjlu kësbangyo sök Roma kjokyo lirë om go loror eni, ga tja ichara lok tek na e kjışhko.

»Eni gueniyo ga tja tek shäng bor pjeyoga rotaga tjlapgaga li kong llême.

<sup>20</sup> E kjışhko ga pjây manor, pjây ïn wlo, shji lan ëng tjok wlo bakoe. Woydoror ga pjây ommydë pjłú ga no pjłuyo iche le Sbörë koshëy shji Israel tjëyoga uunkongdë löng li, koshër shäng li e. Tja pjrik shäng na dröng sho pjang ëre go, tja parkë ba kong kjışhko» le.

21 Kuya lok ga tjlě ba kong ga «Tjawa kong kji-bokwo ichayde lok tek Judea kjokyo dwayo bop kjishko llěme. Pjeyoga judiogara shrono tek ey dwayo ěmdě ga llěye layde owa bop kjishko borwa kong llēm bakoe.

22 Gueniyo miyděrwa ga kjone pogo ga oba tjlě ara nopga tjlőkwo kjrágaga lōng bopoya dik li wloyo. E kjishko ga pja wotjlik llě miyděrwa woydě» le.

23 Eni ga dbar iara lok beno jong kjwara, tōn ěng tjok obi wlo le. Dbaryo öötong ga nopga tōno ara Pablo sök lishko. Kjuk shrōngteng äär jong kjok sēng go ga Sbō ber no pjluyo sorě li roy lara ba kong ara. Ga llěye lara Moisés, Sbō tjlőkwo lagagarě tek dēnashko li, e pjllgwera ba kong, no pjluyo iche lara Sbōrě li, e Jesús jlōe le lok wlo.

24 Kuya lok ga kjong kjong Pablo tjlőkwo kjrono, gueniyo llamora omtjlokwo kjrě woydě llěme.

25 Eni ga woyotjliya beno lōng kjrinaso llēm kuzong ga opshik toe le lōng. Eshko ga Pablo tjlěno ba kong, pjir wlo. Tjlě ga «Dēnashko ga tjlőkwo lara Sbō Sēyarě ba tjlőkwo laga tek dēnashko so Isaías kong, le bomi tjlapgaga lōng li kong wlo. Ga tjlőkwo lara pjlo beke. Tjlěno beno eni:

26 » «Pja nom tjlě bor nopga ěre kong ga ‘Kumi lōng kjěr ga llě loklo miyděmi lōng llěme.

Īmi lōng kjěr ga llě ĩgōmi llěme’ lěp ba kong eni.

27 Nopga ěre, llěye kuya woydě llěme.

Kwomgwo bāng bāngzak lok tuke.

Bokkwo llino lok tuk bakoe.

Shāryara eni,

llěbo ĩya lok ba bokkwo go llēm wlo,

llěbo kuya lok ba kwomgwo go llēm wlo,



opping lok sira llëm wlo,  
 optwë bor kong llëm wlo,  
 epga dör llëm wlo bakoe.”\*

<sup>28-29</sup> »E kjĩshko ga woydër ga miydëmi pjlú ga no döya Sbörë li roy beno nopga judío llëm wleniyo kong bako tjän, ga epga omkjrë» le.†

<sup>30</sup> Eshko ga Pablo beno shäng eshko ba daga shäng li tjok lu pjloglo pjök ba u jong potjwlëya ï li roshko. Nopga tjwe kjlobi ba ïk ga wlokjre enidoe.

<sup>31</sup> Ga Sbö ber no pjluyo sorë li roy lara oba kong ara, ga lara Tjlapga Jesucristo kjĩshko ara bakoe. Tjlëshko ga llëye bangkjre llëm, ga barwaga ërë llëm bakoe.

---

\* **28:27** Isaías 6.9-10. † **28:28-29** Tek dënashko ga kjibokwo ëre jyã shiraba oblë oblë ara. Ga kjone kjone tjlë ga «... le. Kuya lok ga to lok pjir, jek löng tjlë ara ëng kong irbo, tjlökwo kjlopswë kar kare.»

**Sbö Tjłõ<sup>kwo</sup>  
New Testament and Shorter Old Testament in Teribe  
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Teribe

© 2008, 2007, Wycliffe Bible Translators, Inc.  
**All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Mar 2025 from source files  
dated 29 Jan 2022

539cf8e3-01bf-5f34-8833-610f18367f8c